

Bu New Testament



The New Testament in the Bu language of Bauchi State,
Nigeria

Bu New Testament

The New Testament in the Bu language of Bauchi State, Nigeria

copyright © 2025 The Seed Company in collaboration with Language Developers and Bible Translators Association

Language: (Bu (Bauchi State))

Contributor: Language Developers and Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 26 Jul 2025 from source files dated 10 Jul 2025

7da64ee9-3eda-533f-931e-8f6ddcdf993c

Contents

Malkus	1
Mi'shinkən	33
YAKUBU	84

*Shilən ki Lya ki Yahaya
Mul Baptisma*

Shilən ki Lya a toh də Malkus

Mul lashti lwasbatu ki shilən mul təptu tiki Malkus gunə bal shinwasi iki Yohanna Malkus. Ti yelən ki Bitlus kəni mulkina (Ya 1 Bit 5:13). Lashti mbokən toh tən, lacən lwatbatu kapən nda ki ulushelima də hwonki 70 kal ki zi' Yesu, a tya ge' lukı Loma, lacənti kapən na lwatbat maki ki shilən mul təmti ki Yesu. Lwatbatu gopin nə usu "Guki shilən mul təmti atən Yesu Almasihu yakən ki Lya." Shilən u də ussu Yesu mbalənni mul kyautən nə kuma ndəlti. A yen ndəltwasi age kushtiwasi, nə pekətl migatlı, nə pacı' mbalən bezən ləbawasən. Yesu a shilən tən gawasi tənti Yakən mbalən gunə mbo təngaki tə' bəl mbatlwasi tə pekətl mbalən dəge' bezən ləba. Lwatbatu ti ngətli nə bətl ndəlti a tən ulnə Yesu pəli u ngətli shilənwasi nə kushtiwasi. Pati ki shilənni səpəlini tən kyautən ki Yesu age' pati ki mutti məkkawasi ki dəm ləba i mbəl cin ki mushtwasi nə hlillyawasi.

Unnə A gib i

Likə' shitu ki pətl dadabəl ki Yesu 1:1-13.

Kyautən ki Yesu a Galili 1:14-9:50.

Hillyawasi a Galili də ləttya Ulushalima 10:1-52.

Pa'ti ki mutti mkka ki Yesu 11:1-15:47.

Tlil lya ki Yesu ge' mil mushti 16:1-20.

¹ Gopti shilən ki Yesu almasihu, yakən ki Lya kənngu.

² Kan u nəda ki laci ge' lwatbatu ki Ishaya mulnjeshinkən u, ti ussu, "In ngu an shin mulshinkən i ni tənnda kina, mulnə ti likəni ki shitu u.

³ Yal mul tati bi age' dəlgən ti ussu, likəni Lya shitu nə mbatldlwakən, likənə shituwası."

⁴ Yahaya mul baptisma mbi gawasi ge' dəlgən, ti dləp shilən ki Lya, "Tə mbalən za pəl bezən ləba a pəlsi baptisma tingaki tə pacisi bezən ləba wasən da."

⁵ Mbalən ki galt ki Yahudiya nə kum mbalən ki Ulushalima is go' mbə' mati, a si dləp bezən ləba u nəs pəli u, i pəlsi baptisma a dlilka ki Uldun.

⁶ Yahaya ti nə ulki laki a dli ki medlən ki Lakumi, nə ulkəndədləm ki batı amisi, ulki dəmi wasi zhita nə mal du.

⁷ Ati dləp shilən ki Lya, i' usu, "Mulən də mbəti ge kalini mul nalti ngədləni, zhim kaptalan wasi ambəci ta ngusi a batli wai.

⁸ A mibo ge mal kən ami pəlikin baptisma, tibo nə Yal ki mbatl ki Lya ki zeki ti pəlikini."

A pəli Yesu Baptisma

⁹ Nəgu dəmi Yesu i' mbə te' Nazillat ge atl ki Galili, i Yahaya pəli baptisma a dlilka ki Uldun.

¹⁰ Də petuwasi to' ge mali i' en lya abuli, i Yal ki mbatl ki Lya pesul lya kənə kulu.

¹¹ I kum yalon sul lya də ussu, "Kiki yakuyini gunə ami lyamti, nəti ami holtugi iye."

Shedan Cibəl Yesu

¹² Aləbi aləbi i Yalkimbatl ki Lya dloti i' te' ge' dəlgən,

¹³ A tiki dəmi, mutti kutl kutl ləbi upsi, a Shedan də cibəlti, atine' tlu kige' dəlgən a mi' shinkənki Lya də pəlliti kyautən.

Yesu Gop Kyautən Wasi a Galili

¹⁴ Kalki dləl Yahaya, I Yesu te ge' atli ki Galili, ati dləm shilən ki Lya.

¹⁵ Ati ussu "Cini apoyi gunki Lya bəlnja i. Zakən pətl byazən ləba ndənə nə shilən ki Lya."

Yesu Taki Mi' Lati Lekku Bi Gudul Upsi

¹⁶ Ati beuti abi dlilka ki Galili, i' en ki Bitlus nə Andalawus yelse wasi, asi lati lekku a dlilka təngəki si mi' gopti Kes kənə.

¹⁷ I Yesu ulsisu "bələnnən kali, an palkini adəmni mi' ngau mbałən."

¹⁸ Aləbi aləbi is za lati lekku wasən is bəlti kali.

¹⁹ Nəs beu kina ten i' en Yakubu nə yelse wasi Yahaya, mil ki Zabadi, a ge Kudələn ki mali asi likə' lekku.

²⁰ Nə' takisi bi'u Aləbi aləbi is bəlti kali. Is za bwaswasən Zabadi age Kudələn ne' mil pəlti kyautən.

Mul Du Mi'gadli

²¹ Is tege gatl ki Kapalnahum cin shuti, i' Yesu tege lu dopga ki Yahudawa ati kulcisi shələn ki Lya dadanu.

²² Is en ulki gagashinti tən ulnə ti kulcissi u, tən gaki ti kulcissi kənə gunə ti kumti nə ndəlton u, bə kənə mi' lashti zhil ki Musa wai.

²³ Mulən da, mul du mi'gatli a ge'lu dopga wasən, i' la yali,

²⁴ I' usu, "Yalamineki Yesu yakən nazalet? Ki mbəni ki hwotimi bezən ləba ya? A manini ki wokəni, ki yakən ki Lya mul zo'mbadlı kənə!"

²⁵ I Yesu mati mi'gatli ki geti, i' usu, "Dəm shot! Pe' də ge mulu!"

²⁶ I ki i bezən mi'gatli i' u mulisi. I' la yali, i' petaka geti.

²⁷ Kum mbałən en ulki gagashinti, is go' gyep yelsəni, a si u'su, "Yakən nəgu u? A səti pyal kushti won ngə! Mulu tıñə ndətli ki pi' du mi'gatliyi shilən, a si kup shilən wasi!"

²⁸ Aləbi aləbi shilənni zəga ko una ge' atl ki Galili.

Yesu Ndokəl Kom Ki Bitlus

²⁹ Nə petwasən ge' lu dopga ki Yahudawa, ki Yakubu nə Yahaya is te libi ki Bitlus nə Andalawus.

³⁰ Kom ki Bitlus ki mudi atli ti gonti, nə te ki Yesu, is piti.

³¹ I' lə mati, i' gopi' toh i' tliltilya, i' ndoki, i' hilya ma i' pəlisi kyautən.

Yesu Ndokəl Mbałən Dibəli a Suti

32 A suti, kalki ki nda ki cin, is mbəlli Yesu mi' gonti, nə mil mi'gatli.

33 I mbalən ki ge' gatli kup si domga a kina dlabi.

34 I' ndokəl mbalən dibəli, ko wongi nə unndi gontuwasi, iki pe'kəl mil mi'gatli dibəlli. Ta ndəgi tə mi'gatli shilən wai, tən gaki simanənti.

Yesu Zəga də shilən nə Lya

35 Nə kyau, balu a pa' cil-tuwai, I Yesu hilya i' peki, i' zəga gelu u nə bə mbalən dawai u, i' zəga də shilən nə Lya tyaka

36 I Siman nə mbalən u nə tinesi u is zəga də ngauti.

37 Nəs mbitu, is ultisu, "kup mbalən də ngauki."

38 I Yesu ulsisu, "Mələn ge' gatlu gunə kina u, ta dləm shilən ki Lya da danu. Ulnə laki yambəda ungu."

39 I kup ti tya'tya ge' atl ki Galili a ti dləm shilən ki Lya a ge' lu dopga ki Yahudawa, a ti pyakəl'i mbalən mi'gatli.

Yesu Ndokəl Mul Go' Ki Dakəlti

40 Mul go' ki dakəlti i'mbə ma Yesu, i' ngusiti i'ngemti, a ti ussu, "Inka ndəgu, kin ma'paltən mul ləshi də'ti.

41 I ci' gontuwasi gop Yesu, i' ta toh wasi i' tənti, i' ultisu, a ndəgi, a ndokəlki, dəmi mul ləshi də'ti!"

42 Aləbi aləbi i dakəltisi zati, i' dəm mul ləshi də'ti.

43 I ki i Yesu pi' shilən mul ndəlti, nə təs zəga u.

44 I' ultisu, "Bə pi mullən wai. Məllə le' en ləba, a bəl Lya ulki okət bezən ləba kan-wunə Musa dləmi u tən gaki wokəlti. Pəli nəgu təngaki tə mbalən mani da ka ndoki."

45 Ge' shuki nəgu, i muli peki i go' dləp shilənni tyai. I gu la Yesu ta man te' ge gatlon a dwadən də ye' dwadənwai, i' go' dəp gelu u nə mbalən da wai u. Ngo nə nəgu, mbalən go' mbə mati, te' ge lu en.

2

Yesu Ndokəl Mul ki Tle' ki Mi'gatli.

1 Kal ki mutti ten, nə palte' Kapalnahum, is kummi ti a libi.

2 I' mbalən dom ga dibəlli, lu zə' a sən ma dawai, abi dlabi ma. A Yesu də pi'si shilən ki Lya.

3 Mbalən upsi is mbə, is kam Mulən tyai ki tle ki mi'gatli.

4 Saman təla'ti ma Yesu wai təngaki dibətli ki mbalən, is mbulən gabini tu' malu u nə Yesu da u nəs mbul gabini u, is shim muli sudı, nə lu muttuwasi.

5 Nə Yesu en lati mbat-luwəsən u i' ulmul ki tle ki mi'gatlisu, "Yakuyini a paci bazən ləba wagi."

6 Mbalən mi' lashti zhil ki Musa siki dəmi a ləbi, a si shilən a mbadli,

7 A si ussu, "Ya lakiða mulu də shilən nəgu? Pəli' Lya bezən ləba ti da! Wokən* ma' wokəli yakən mbalən*

* 2:7 2:7 Yakən mbalən Gu shilən tən yakən mbalən kəndə

bezən ləba wasi ənbə Lyə kən nəmmwai u?"

⁸ Aləbi aləbi i Yesu man ulnə si dləmti a mbadlu, i Yesu ulsisu, "Yakən laki da ki unndi shilən u a mbadlwakən?"

⁹ Gukən ngətlı nə mbələ, ti ulmul ki tle usu, 'A wokəli bezən ləba wagi' nə ta usu, 'Hilya kam lumuttwagi ki zəgaya?'

¹⁰ Ami lyamti ki manini Yakən mbalən[†] ti nə ndətli ki wokələ bezən ləba a dəplabə." I' ul mul ki tle ki mi'gatli su

¹¹ "A ulkisu, hilya kam lumuttwagi ki zəga libi."

¹² I Aləbi aləbi tə hilya, i' kam lumuttuwa si, i' peki a kum mbalən də yetti, a si kup gagashinti, a si natlı Lyə asi ussu, "Ma en ulən nəgu gason wai."

Taki' Lawi bi

¹³ Yesu peki i' lə bi Dləlkə ki Galili da danu, Mbalən dibəli is domga a malgən wasi, ati kulcisi.

¹⁴ A ti beuti, i' en Lawi yakən ki Halpa ki dəmi ati kyautən ki ka' upki ban. I Yesu ultisu, "Bələn kali." I hilya i' bəlti kali.

¹⁵ Gason Yesu də dap ulki dəmi a libi ki Lawi, mul ka' upki ban ne mi'bezən ləba nə mbalən dibəli si dəmti ne'ti ne mil kushti wasi, tən gaki mil dibəlti gesi mi' bəlti ni;

¹⁶ Nə mi' lashtı zhil ki Musa si palisiyawani is enti də dəmti nesi, nə mi'bezən ləba nə mi' ka' upki ban u, is ul mi' kushti wasisu, "Ya laki ti dəmti nə tleti ne' mi' kap

upki ban nə mi'bezən ləba da?"

¹⁷ Nə Yesu kumi nəgu u, i' ulsisu, "Mi' ginə bə da gontwai u sikən lə' mamul pətl igən wai, mi' gonti si də ngau mul igən. Tən gaki mi' pətl ze kautənkən a mbədawai, tən gagi mi' bezən ləba ni."

Gyemti a Tən pətl Kuzən Mali

¹⁸ Mi' kushti ki Yahaya mul baptisma nə ki palisiyawa si pətl kuzən mali. Mbalən en ngem Yesu is usu, "Yalaki da mi' kushti ki Yahaya nə ki palisiyawa si kuzən mali gwabo si da pətl ti wai?"

¹⁹ I Yesu ulsisu, "Yelənsi ki mul kutleti sən pətl kuzən mali a mul kutleti nesiya? Tunne mul kutleti nesi u səkən pətl kuzən malilwai,

²⁰ Cin də mbəti sinkap mul kutletiyi taka də masi. Cinişini sən pətl kuzən mali.

²¹ Kən ca'ti mbulən gəsi nə pyal lulutwai. In a caki nə nali u, pyal luluti nən kyeshti gus lulutisi, nən ngətli ki kal nə kyeshti.

²² Kən bəna pyal mal ki mil pə' ki annabi ge gus kal ki bati wai. Mun nə a bine u, mali si nən tatlti kal ki bati si, a hol kal nə mal innabi isi. Pyal mal ki mil pə' ki innabi, sai nə pyal kal ki bati."

Mi' Kushti Ki Yesu Go' Cotlti Alkama Cin shuti

²³ Gason cin shuti, Yesu ne mil kustiwasi si beuti ge' gu ki alkama. Sige beuti i mil kusti ki Yesu is go' catl ga alkama en.

[†] 2:10 2:10 Yakən mbalən Gu shilən tən Yesu da

²⁴ I palisiyawa ultisu, "En ulnə mil kushtiwa də pəlti u. Ya laki da si pətl ulnə zhil ki Musa a ndigi ti pəlti cin ki shutwai u?"

²⁵ I Yesu njesi shilən nisi i' ulsisu, ka kummən shilən ki ulnə Dawuda pəli u waiya, cin u nə kuzən gopti, ti ne' yelənsi lətwaswaiya?

²⁶ Hwon u nə Abiyatal tiki bal ləba, Dauda tege' Libi ki Lya, i' dam biledi gunə zədli u iki bəl yalənsiwası ginə ne'tu, ki dəmi ki ləbasi ni nəgwasən mulən kən dəmtwai.

²⁷ I Yesu ulsisu, "Pələn cin shuti təngaki mbalən, ba pələn mbalən gaki cin shutuwai.

²⁸ Yakən mbalən kənki mulban ki shuti nə ki cin shuti."

3

Mul nə Mi'Gadli tle Toh

¹ I Yesu te ge' lu dopga ki Yahudawa, mulən da aləbi mul toh kitle ki mi'gadli.

² Tən gaki səmbi shitu ki gopti Yesu da. I mbalən yen zid dwadən, tən ndokəl mulisi cin shutwə?

³ I Yesu ulmul toh ki tle yisu, "Pete' ki akina."

⁴ I Yesu ulsisu, "Ambuni tə pəl ze' ləba ko bezən ləba cin shuta? Ti pekəl mul məshki, ko ti tlota?" Is dəm shot.

⁵ Nə' yasi nə mbadli ki lewi u, ati du mbadli nə dashti ki mbadlwəsən, i' ul mulisisu, "Ta' toh wa'tedi." Ittakit tye, i toh was pal ləbi.

⁶ Nə palisiwa yani nəgu u is peki, Aləbi aləbi is dlil shilən nə mbalən ki Hildus a tənti, kau u nə si' tlotu.

Mbalən Dom ga Dibəli Abi dləlka

⁷ I Yesu hilya ne' mil kushtiwasi, is za'gatli is lə tyə bi dləlka ki Galili. Mbalən mi' dibəlti iye ki Galili is bəlti kali.

⁸ Nəs kum ulnə ti pəlti u, mbalən is mbə te' Yahudiya nə Ulushalima, nə atl ki Edom, nə te' bə gasi ki dləlka ki Uldum, nə te'ge luki Taya nə Sidom, bal dopga mbə mati, tən gaki si' kum ulnə ti pəlti u.

⁹ Tən kitəlli' əa mbalən dibəli gyemti, i ul mil kushtiwassu shakəli nən kudələn ki mali nəm tedfi.

¹⁰ Ti' pəlin nəgu u tən gaki ta ndokəl mbalən dibəlli, i laki da kum mbalən mi' gonti si shimga te' mati tən gaki si' tənti.

¹¹ Du mi'gatli, ko anəmi si enti, as nda kinawasi asi lati yali, asi ussu, "Ki yakən ki Lya kənə."

¹² I' dləmisi bəs pi mbalən okənki ti wai.

Yesu zabəl mbalən kutl nə Lop

¹³ I' Yesu totən zəngə, i' taki ginə ti lyap siyi bi, is lə mati.

¹⁴ A gesi is zabəl mbalən kutl nə lop si' dəm neti, tən gaki ti'go' shi'si asi dləm shilən ki Lya,

¹⁵ I' bəlsi dəlti ki pekəl du mi'gatli.

¹⁶ Ginəs zabəl siyi kəngyi, Bitlus,

¹⁷ Nə Yakubu yakən ki Zabadi, Nə yalkewasi Yahaya, i' bəlsi shin Buwanaljis' mil ki ndaltannaca.

¹⁸ Iki dadanu i' zabəl Andalawus, nə Pilibus nə Baltamawas, nə Matiyu, nə Toma, nə Yakubu yakən ki Halpa, nə Taddawus, nə Saminu Bakan'anə,

¹⁹ Nə Yahuza Iskaliyoti gunə bəl Yesu.

Yesu nə Ba'alzabul

²⁰ I Yesu te' libi won, iki i mbalən dopga dadanu hal saman dap ulki dami wai ti ne' mil kushtiwasi.

²¹ Nə yelsənə wasi kumi nə gu u, iki is lə də goptiti, tən gaki si usu, "Ga agəliti."

²² Mi' kushti zhil ki Musa gənə pete' Ulushalima is usu, "Ba'alzabul kən totənti! Nə ndətl kí guu mi'gatlkən ti pekətl mi'gatli."

²³ I Yesu takisibi, i' cimbəlisi i' usu, "A u kən ti Shadan man pekətl Shadan?

²⁴ In gu' a bwasi a tən nge yelsəni u, guntu kən lə' kinawai.

²⁵ Nəgu in libi a bwasi a tən nge' yelsəni u, libi u kən lə' kinawai.

²⁶ In shaidan a dlani ga wasu, a bwasi, kən lə'kinawai, patwas kənmbə.

²⁷ Mul ma' te' ge libi ki mul ndəlti a' em galwasi dawai. In ba' kəndi mul ndəlti wai u, iki annda yep gal ki libini.

²⁸ Bali ami pi'kini nən paci ko mulu kən bezən ləbwasi, nə bezən shilən u nə' təpəli u.

²⁹ Gunə a pəli Yalkimbatlı ki Lya ki gunti bezən ləba u, kən paci tiwai, nə ngatləti ki dəp ləba."

³⁰ Gi bo si usu, "Du mi'gatli ni'da."

Dya ki Yesu ne' Yelsəniwasi

³¹ Iki dya ki Yesu ne' yelsəniwasi is mbə. Is dlil a dla, is ta' shinkən timmbə.

³² Dop ga ki mbalən ki dəmi a malgən wasi, is ultisu, "Dya wa' kəngu nə yelsəni wagi si kauki a dla."

³³ I' gyemsi, "ki wokən ki dya ini nə yelsəni ini?"

³⁴ I' ya ginə a malgən wasi, i' usu, "Dya ikəngu nə yelsəni ini!"

³⁵ Ko mulu kən pəl ulnə Lya də lyamti u, tiki dya ini nə yelsəni ini, tiki koli ini dadanu."

4

Cimbəlti ki Mul Otlı Ləba (Mt 13:1-9; Lk 8:4-8)

¹ Dadanu Yesu a gop kulci'si shilən ki Lya abi dlilka u balu, I' mbalən mil dibəlti domga amati, I lati, i'te ge' kundələn ki mali, Adləlka, i' dəm a gibə. I' dopga ki mbalən dləl atən bəgəsi abi dləlka isi.

² I' kulcisi ləba dibəli nə cibəlti. A ge kulcisiwasi i' ulsisu,

³ "Ga kən kum! Mulən mul kotllu won da is zəga gegu tən gaki ti' wotl o'.

⁴ Tige dlati wundi ləba, Ina wundiyen nda tən shutu, i yatli dəkən unndiyisi.

⁵ Un ndiyen is nda age lu mul zənga luwu nə bə atl da iye wai u. Aləbi aləbi is te' tən gaki atli loluwai.

⁶ Nə cin peku, Is landəli, tən gaki dləlgwasən loluwai, Is kwakən.

⁷ I gyen nda age ili, I ili sənkəlsi, Sa man pətl gwewai.

8 I gyen dadanu is nda gye lu atl ki zeki, Is te' kizeki, Is nali, Is pəl gwe, I gyen pəl gwe kutl kutl ləbi maki, Gyen kutl kutl ləbi məkka, Gyen kutl kutl ləbi kutl." I Yesu usu,

9 "Mul kəm ki kumti tə'kumi."

Ulnə Lati Də Cimbəlti u

10 Nəs pal mal gəni u, Mil bəlti nə kutl nə lopiyi iki is gyemti yakən cimbəlti u də dləmti.

11 Iki i' ulsisu, "Kini bo, a ndəgikini i kimannən tuki libi ki Lya, Gyen ginə bə da gyekini wai u, Sai nə cimbəlti.

12 "Yenti nə dwaðən bo, Sa yeniyi, bə a mbatldlwai. Kumti bo, Sa kumiyi, Sa man ulnə də dləmti u wai, Tən gaki, baspaltyai a pacisi bezən ləba wasən da."

Yesu Dləm Cimbəlti Ki Mul Wotlti Unndi

(Mt 13:18-23; Lk 8:11-15)

13 Yesu ulsisu, "A!, Kimanən cibəlti uwayya? Tu i mi kənkimanən na cibəlti en da?

14 Mul wotlti o' u, Shilən ki Lya kənti wotlti.

15 Ginə ndatən shutu u bo, Siki cibəlti ki gənə wotl shilən ki Lya a mbatl dlwasən u. Sən kup shilən nisi, Aləbi aləbi a shaidan kam shilən u nə wotldli a mbadlwəsən u.

16 Nəguni dadanu gunə wotl unndi o' a ge lu zənga u, Siki ginə sən kup shilən ki Lya as kami nə hwoltugi.

17 Si bo, Gəs nisi dawai, si kən dəm iye wai, ko ulukən hwossi təngaki shilən ki Lya u, Aləbi aləbi as pal nə kali.

18 Unndi ginə nda gelu ili u, iki cibəlti ki mbalən u nə kum shilən ki Lya u,

19 Dəp ləba a hwosi u, nə lyap usən u, Nə laki ləba u, Nəntə'ti gesi asənkəl shilən nisi, Ashilən nisi kən dəmti kizeki masiwayi.

20 Undi u nə nda age lukı zeki u, iki cimbəlti ki mbalən u nəkum shilənisi, Sən kamti, As pəl kyautən nə nali, As mbi mbəlti tənki gyen kutl kutl ləbi maki, Gyen kutl kutl ləbi məkka, Gyenbo kutl kutl ləbi kutl."

Cibəlti Atən Pitila

21 Yesu ulsisu, "Nən mbətl pitila tedi a idlati nə bal gala, ko nənzədli agəs lumutti, kin zəti atən lu dəmtuwa swaya?

22 Kum ulnə ki hwundəli u, nən pekəlti. Ulnə ki kuppi u, nən dutiti.

23 Mul kəm ki kumti, ti' kumi."

24 Yesu ulsisu, "Kumini, ko'talaku' nə cimbəlin da u, nə nali si' cimbəlliki, hal ma as mbəli da.

25 Təngaki mulnə ulən ni'da u, sim mbəli' tida, mulnə ulən ni' dawai u, na' ulnə nitu sin kamiti taka."

Cimbəlti Ki Unndu nə Ate u

26 Yesu ulsisu, "Gu' ki libi ki Lya kənə mul dlati u'kəni a atlı.

27 Mutti nə hillya i undi te, i nali, timan kan u nə pəl dli uwai.

28 Atlı nə gawasi ti bətə ləba, ki nəm iki ulnə də te'ti, sai ga, nə balgye laba tənki.

29 In gwe yi a nyau, iki aləbi aləbi atlo'dli nə kwaltən, gis acilu ngu."

Cimbəlti nə Gwe' Mastad

³⁰ I' usu dadanu, "Nə yakən tən cimbələn gu' ki Lya? Ko nə yakən tən cimbələnti?"

³¹ Kənə gwe mastad kənda, gunə, iki yakən gwe ləba gunə də wotlti adəp ləba u,

³² Ngo nə nəgu in wotl tu, an ngətlə kap na dwa nə nalti, ap pəlbas mil toh, yatl ma as man nda a gwasən wasi."

³³ Nə cimbəlti dibələ Yesu dləm misi shilən ki Lya, ndace nə mantiwasən.

³⁴ Ti da pissi ulənwai, sai nə cimbəlti. İki ti pi' mil kushti-wasi ko yanngi a malgəni bə nə cimbəltiwai.

³⁵ Age'cini, nə cin balnja ti nda u, i Yesu ul mil kushti wassu, "Mi' dakəcin tyatən bi dləlka ka."

³⁶ Nəsza dopga ki mbalən akalu, is zəga neti kau u nə tida u age kundələn ki mali, na kundələn ki mali si amalgən wasi.

³⁷ I bal lya ki mali mul yetəl dlitodi, i bəski mali go' tliti lya də lyap jakə' kuðələ nisi.

³⁸ Yesu bo ati tu kal age kundələn ki mali atən lumutti, ati nde enbudı. İki mil kushtiwası is dlilti də enbudı, is ultisu, "Mul lashti, mun məshti kin da entiwaya?"

³⁹ I' hilya də enbudı, i' mati etəlli, i ultisu "dəm shot!" İki i yetəlli mudı, i kumlu dəm shot.

⁴⁰ I' ulsisu, "Tən gaki yakən lakıda ikumən bənti nəgu? Hal nəgun lati mbatl kən nuna?"

⁴¹ Iskum bənti iye, is ulyelsənisu, "Wo kəngü? Yetəl nə mali ki dlika si bətl shilən wasi!"

5*Yesu Ndokəl Mul Besən Mi-gatlı*

¹ A Yesu ne mil kushti-wasi is bəci bidilikə age atl ki Galasinawa.

² Nə pe'tuwasi dige kundələn ki mali, iki mul du mi'gatlon kəngü te' gelu gum mbalən i mbə ma Yesu.

³ Ti bo lugum mbalən kən ki lə dəm tuwasi. Mul ma'kəndəttı dawai, ko nə ulkəndə mbalən kidom.

⁴ Tən a tle kəndətə toh nə asən nə ulkəndə mbalən ki dom, ati babatlti, a cacal dom ki tən asəni. Mul ma'pələti ulən dawai.

⁵ Gasi nə dləncin a gelu gum mbalən ti dəmti, nə tən zəga, ati latiyali, ati gələşti dli wasi nə zəngə.

⁶ Nə en Yesu te' lolu u, i' em kitəl tya mati i' gus aki-nawası.

⁷ I' layali i' usu, "Yesu yakən ki Lya mul nalti, ya lakənmiki? A maki nə Lya yi, bə hwoti besən ləba wai."

⁸ Tə ndan akinawası nəgu u tən gaki Yesu ultisu, "Zə mulu, Ki du mi'gatlı!"

⁹ I Yesu gyemti, "Ya kən ki shinwagi?" I' ultisu, "Shin i kənki, hututu, iki mi dimbəli."

¹⁰ İki i' go' gyep Yesu bə'katsı də kiwai

¹¹ Amaləbisi lu byatlı dəs kiban da suttən mis calgadlı.

¹² Mi'gatlı gyemti is usu, "In kandəgu katmi swa ge dəs kiban yi, tən te gesi."

¹³ I Yesu ndəgisi. İki yi du mi'gatlı peki, is te ge dəs kiban nisi. Dəbətl ki dəs kiban nisi sən pətl zangu lop, is hilya nə kitəl, suttən

mis calgadli is ndage mali ki dlilka is gəli.

¹⁴ Aki kən mil byatl dəs kibən ni tlə nə kitəl, is su dləm shilənni age bas gatli nə mil gatli. I mbalən bə si' en ulnə nda u.

¹⁵ Nəs bə ma Yesu u is en mul nəs pekəli mi'gatli ngu ki dəmi, nə luluti ki laki adli, ti ge dliwasi dadanu, is kum banti.

¹⁶ Ginəs pəl ulisi a tən dwadən wasən u, is go' palli' mbalən shilən ki ulnə nda u nə mul mi'gatli nə dəs kibən yi u

¹⁷ I mbalən nisi pi Yesu ti' zaki atlwasən.

¹⁸ Ti te'ge kundələn ki mali kən ngu, mulnə da du mi'gatli da u bəltibi ti' dəm mati.

¹⁹ Yesu a ndəgi tuwai, i Yesu ultisu, "Lə libi ma yalsənə wagi, a pisi bas ulnə Lya pəliku, nə ci'gontuwagu nə' eni u."

²⁰ I' zəga libi, i' tege dləm shiləni a Dikapolis ki bas ləba u nə Yesu pəlitu. I kum mbalən i kum ulki gagash-inti.

Ndokəl Yakən ki Yayilus nə Kəli mul Bəna' ki Hwula

²¹ Nə Yesu dəkəci tyatən bəgasi gwa u ge kundələn ki mali dadanu u, I bal dopga ki mbalən gandəlti. Ati abi dlilka.

²² Iki mulən ngu age bas mul kina ki lu dopga ki Yahudawa, mul shin Yayilus. Nə en Yesu u in nda akina wasi,

²³ I' bəlti bi balbalı, i' ultisu, "Yakuyini yakənkəli ti abiki

məshti. Ami bətlik bi ngadi ki zittoh təngaki tin ndoda."

²⁴ Iki is zəga neti. Bal dopga ki mbalən də bəlti kali, asi gyepeti.

²⁵ Iki kəli won ngu ta pəl hwon kutl nə lobpi a hwula də binetti,

²⁶ Kəli u ta tle bal bəna a toh ki mil bəlt igən dibəli, ta gəl kum ulnə ni' da u, i ngo nənəgu tambi ndotuwai, kina kina gonti da.

²⁷ Nə kumi də dləm Yesu u, i' molti te' kalki Yesu age dopga nisi, i' tən bi lulugəl ki Yesu.

²⁸ Tən ti usu a mbatl tluwasi, "Lulugəl ma atəni u, an ndoti."

²⁹ Aləbi bina' ki hwulawasi dləli, i' kumi a dliwasi ta ndoki gontuwasi.

³⁰ Aləbi aləbi nə Yesu kumi ndəlton a pedi getu, iki i' go' yalu age dopga, i' usu, "Wokən tən lulugəlni?"

³¹ Iki i mil kushtiwasi ultisu, "Ki ye' dopga ki mbalən nəgu, a usu, wokən tənka?"

³² Iki i Yesu yalu kali təngaki ti' en mulnə pəli' nəgu u.

³³ Kəli yi nə man ulnə ndaniti u, iki i' bə nə banti, ati nyepeti ki dli i' nda a kina ki Yesu, i kəliyi pi Yesu bali.

³⁴ I Yesu ul kəli usu, "Yakuyini, lati mbatluwagi a ndokəlkı. Mboci lau, ka ndo də gontuwagi."

³⁵ A tige shilən, iki gyenkənngi te' libi ki Yayilus, is usu, "Yakuwagi ta məci, yalakıda ki'la' mul lashti də bənada?"

³⁶ Yesu a pal kəm tən ulnə si dləmti uwai, i' ul Yayilus su,

"Bi kum bantuawai, la mbatl katl"

³⁷ Ta za mulən a bəlsi kaluwai iki Bitlus, nə Yakubu, nə Yahaya yalse ki Yakubu si bəlti kali

³⁸ Nəs mbəci libi ki Yayilus mul kina ki lu dopga ki Yahudawa u, is kumi wotilu, nə kulu, nə latiyali yenti dawai ba kumti dawai.

³⁹ Nə te' givi u, i' Yesu ulsisu, "Yalaki da ki wotilu nə kulu da nəgu? Yakəni kiməci tidawai, nde yemmbukən tida."

⁴⁰ Iki is pəli gyetlti ki mbəlti. Kalki ki Yesu a pekəl mbalən nəsi kumwasən tuwa dlayi, iki i' kan bwasi ki yakənkəliyi nə dyawasi nə mil kushtiwasi guni netu, is te' gelu u nə yakən kəliyi da u.

⁴¹ I' Yesu goppi toh, i' ultisu, "Talita kumi", iki, "Yakənkəli, ami utlkisu, hilya."

⁴² Aləbi aləbi yakənkəliyi hilya i' go' ləti. Təngaki timul hwon kutl nə lop kəni. Gu lakisi ulki gagashinti iye

⁴³ Iki i' matisi bə mulən kum shilən uwai, i' ulsisu dadənu si' bəl yakən kəliyi ulki dəmi.

6

A Nazalat is nge' Yesu

¹ I Yesu za' ləbisi ippal tiya ge' gatluwasi, I mil kushtiwasi is bəltikal.

² Nə Cin shuti pə' u, i' gop kulcissi age'lu dopga ki Yahudawa, dibəl mbalən yi nə ləbi u si ga'ti kəmu is kum gagashinti, asi ussu, "A ukən mulu mbi ulu nəgu u?" Is ngemti, "Undi mallaba ukən

ninnəgu? Undi gagashintu kən ti pəlti nəgu?

³ Guki mul tlatti ləba u waiwa? Yakən ki Malyamu nə yelse ki Yakubu, nə Yusupu, nə Yahuza nə Saminu? Yelsəni was mudli simi ne'sə a kiwu waiwa?" Is nge'ti.

⁴ I Yesu ulsisu, "Mulnjeshinkən nənda mbin nalti ge'gatluwaswai nə ge' yelsəniwasi nə a libi wasi."

⁵ Taman pətl ulki gagashit tiya kawai, iki is zi mi'gonti ginə bəs dibəllwai u toh is ndoki.

⁶ I' kum gagashinti nə hotl la'ti mbadlawasən. I'go' duk tiya ge mil gatli ati kulcissi.

*Yesu Shin Mil kushtiwasi
Kutl nə Lob*

⁷ Immbe mil kushti kutlh nə lopi bi is shinsi lob lob. İbbəlsi ndəlti tən du mi'gatla.

⁸ Ippisi i' usu, "Bə kamən ulənwai də lə tuwasənwai kumbəlkən ki kamin katl bəs kan ulki dəmiwai bə kamən kulu wai bə kamən ulpwai.

⁹ Shimən kaptəlan, ngo nənəgu bi mbələn lu'ləgəl tənkiwai.

¹⁰ Libi u nə ka shitin ləbi u a' dəmni ləbi hal a' za'kən gatliدا.

¹¹ Lu u nə bəsa njekiniwai u ko sa nge kupkini u, za'kən gatli abatən kushka ki asənwakən taka gaki tədəm dətləkəm da ma'si."

¹² Nəgu si peki asi dləmi' mbalən shilən ki Lya gaki sə' za' pətl bezən ləba.

¹³ Is pekəl mi'gatli dibəli, is suwati mi'gonti dibəli mili is ndoki.

Mushti Ki Yahaya Mul Baptisma

¹⁴ Nə guu Hilidus kumi nəgu u, tən gaki Yesu apəl shin i, gemma si usu, "Yahaya mul pəli mbalən baptisma ti tliliya ge' mi' məshsti, I lakida ti nə ndəlki kyautən ki gagash-inti də pə' ma'tida."

¹⁵ Gen də usu Iliya ni, gen ne si usu, "Nəm kən ge mul njeshinkən ki Lya ki digini."

¹⁶ Nə Hilidus kumi nəgu u, I' usu, "Yahaya u na patti ga taka u hilya ge' mil mushti!"

¹⁷ Ti Hilidus nə gawasi illaki sə' gop Yahaya, is ki ndəti as la'ti ge'lu kənndə'mbalən. Tə pəllən gu gaki Hilidiya kəli ki yelse wasi Philip, gunə' kanti ippalti də kəliwasi.

¹⁸ Tən gaki Yahaya ul Hilidus su, "A mbuni ki dəm nə kəlik'i yelse wagwai"

¹⁹ Tən gaki nəgu Hilidiya ngap Yahaya a mbatldli, ti lyamti tə' tloti, ngo' nənəgu tamaniwai gaki Hilidus.

²⁰ Hilidus də' banti Yahaya, gaki ti mani Yahaya mulzo' mbatl kəni mul pətl ləba kizokini, I lakida bə tida za'ti ulən ti nda nətiwai. Hilidus intikum shilən ki Yahaya u də hwottiti, ngo nənəgu ti baldə kupti də shilən u, ti kup hwol mbatl nə kup ti.

²¹ Iki ipmbi shitu nə cin ki zə'ti mbə u, ip pəli Gumsisi wasi nə bas mi'kina ki dlati ne' bas mbalən ki Galili daddabəl.

²² Nə yakən ki hiludiya tete' dlom də nyeptu, i mbuni Hilidus ne'səbəlswasi. I Guu ul yakən kəlisu, ngem ulnə ki

lyamti u an bəlki.

²³ I Hilidus ndəgiti nəzal ulnə ka ngemi u an bəlki, "Ko ti bwasti dlom ki guntikəni."

²⁴ Ippeki, in ngem dyawasi, "Yakən ta ngemi?" I dyani usu, "Gaki Yahaya mul pəli mbalən baptisma."

²⁵ A ləbi aləbi is susu' nə dleuti, ma' guu i' ultisu, "Ami lyamti nəgun nəguni ki bələn ga ki Yahaya mul pətl baptisma, age' gal ki pəti."

²⁶ I mbatl ki guu lewi, Ngo nənəgu gaki ta ultisuyi nəzal akina də səmbəlswasi, təkən lyapti ti' ultisu zakiwai.

²⁷ A ləbi i guu la' mul shinkən wasi, illaki səm mbəl ga ki Yahaya. I mul shinkəni le' kotl ga ki Yahaya tedi a ge'lu zəm mbalən.

²⁸ Im mbəl gami age' galpəti, ib bəl yakən kəliyi, i yakən kəliyi bəl dyawasi.

²⁹ Nə mil kushti ki Yahaya kum shilən u, is mbə is kan dli i, is guti.

³⁰ I mil shinkən ki Yesu is pal te' ma'ti, is dlimi' mus ulnəs pəli u, nə ulnəs kulci u.

³¹ I Yesu ulsisu nganni tən na' shu'ni ge' lu u nəbə mbalən da wai u, gaki mbalən diçəli si ləti asi palti, mbi' dlil də dəamtima mil shinkən ki Yesu ma sambiwai.

³² Is zəga ge' kundələn ki mali si nəgwasən lu u nə bə mbalən da wai u.

³³ Iki mbalən diçəl, is yen zə'ga wasən, si mansi, mus mbalən kige gadli nə ləbi u is dululu is ngətəl nə mbəkəsti.

³⁴ Nə pe'ti ki Yesu dige' kundələn ki malu, i'yen diçəl

mbalən i' kum ci' gon twasən, gaki si kənə mbəla u nəbə mil be'lsi dawai u. I' go' kulcissi ləba dibəli.

I Yesu Bəl Dibəl Mbalən Ulki dami

³⁵ Nə cin bal nja tənda u i mil kushti wasi mbə ma'ti, is ultisu, "Ləbisi ngu mbalən dawai, i ngu cin bal nja ti ndayi.

³⁶ Za' mbalən nisi sə' zəga tiya ge' gatlu nə nja aki u, sə' uli gawasən ulki damida."

³⁷ I' ulsisu, "Kinibo bələnsi ulki damida" Is ul Yesu usu, "Ulki damiwasən nə pətl bwasti dlom ki upki lii hwon nəm kikyautən ki yakən mbalən, tən ullisi ulki dami dangwa?"

³⁸ I Yesu ngemsi, "Ulki dami nəmi nikini? Su' yanini." Nəs yani todu, is ultisu, "Ləpa nantam kəni, nə kes lob."

³⁹ I Yesu ul mil kushti wasi usu sə' bwas mbalən tiya as dəm atli tiya tən di'me.

⁴⁰ I mbalən dəm atli swai nami kutl kutl ləbə kutl, nami kutl kutl ləbə nantam.

⁴¹ I Yesu kan ləpa nantami nə kes gudəl lopisi, it taki lya, i' gode Lya, i' caccal ləpa i, ib bəl mil kushti wasi sə' buwasi mbalən, is buwasisi kes lopi dadənu.

⁴² Muswasən is dami i kəmsi.

⁴³ I mil kushti wasi yem dəs kutl nə lop ki ləpa gunə sa u nə kesi.

⁴⁴ Dibəl ki mwani yi nə dami u sa təla zangu nantam.

Yesu də lə' tən mali

⁴⁵ Nəguni i Yesu la' mil kushti wasi sə' tege' kudələn

ki mali sə' ngətl ti də dəkəshti tiya Basaida, tiya ge'lu yiwon ki bal mal, i ul mbalən su sə' zəga.

⁴⁶ Nə' zasi u i totən zənga də gyem Lya.

⁴⁷ Nə gas pə'u, kudələni tiya dlom mali, Yesu tən bəgasi nəm nə gwasi.

⁴⁸ Nə' en dəl kudələn də hwottisi u, tən gaki ndəl ki yetəl, adlom gasi i'go lə te'tənsi, a ti lə'tən mali. Ippəli kənə ta' dəkəsh si,

⁴⁹ Nəs yen ti dəl lə' tən malu, is yeni kənə nul kəni, is la' yali.

⁵⁰ Tən gaki kapuwəsən i ba'gobsi nəs yentu. I Yesu bulisi bi aləbi, i' ulsisu, "Bə bənniwi amin."

⁵¹ Iki it tege' kudələn ne'si, i yetəli mudi. I gagashi' gob mil kushti wasi,

⁵² gaki saman ulən tən ləpa gunə bəl mbalən zangu nantam is damti da uwai, gaki mbatldlowasən a kangəli.

Yesu Ndo'kəl Mi'gonti a Jenisalata

⁵³ Nəs dəkəci, is mbəci ge' atl ki Jenisalata, is kəndə kudələni tən bigasi.

⁵⁴ Nəs pe' dige' kundələni u i mbaləni mansi.

⁵⁵ Is ngwal atlisi nə kitəl, is go' ka' mi'go' tottən lumut si tala'si tiya ge'lu u nəs kumi ti da u.

⁵⁶ Mus lu u nə Yesu lədə u, bal gatli ko yakən gatli, as mbəllic mi' gonti abi lu dobga, as ngemti səttin bi lulə gəlwasma. Ginə təntu is ndoki.

7

*Ulnə də Beza' yakən
Mbalən u*

¹ Nə palisiyawa nə gyen mi' bətl lashti zhil ki Musa ginə mbə te' Ulshelima is domga ma' Yesu.

² Is yeni na mil kushti wasi si dəməti sida o'kəl towai təngaki bətl ləba ki mi' kina.

³ Palisiyawa ne' Yehudawa sən da dəməti pawai senə sa o'kəl toh pa, gaki si bətl ləba ki mi' kina.

⁴ In sa pal te'ge'lü dobga ki ulti nə ulti taka u, səndə dəmətipawai senə sa utisi mal takapa. Undə laba endə dibəli nəsmbima' mi'kina wasən asi pəlti, kənə ki o'kəl gali ne' ki twom mali ne' kal ki dom.

⁵ I palisiyawa ne' mi' kulci' mbalən zhil ki Musa is ngemti, "Ya lakida mil kushti wagi sida bətl ulnəs mbima mi'kina wasən u wai, si dəməti bəsida o'kəl towai?"

⁶ I' ulsisu, "Bali Ishaya dləmi tənkini, mi' bəna ki dəwədən, kan u nə da ki laci u:

"Mbalənyi agabi ki naltəni, mbadlwakən lolu nə ami."

⁷ Bətl Lya wasən u bali wai, ge'shu ki zhil ki Lya, zhil ki mbalən kən si kucciissi."

⁸ Ka lakən zhil ki Lya taka i, ka ngapən zhil ki mi' kina i."

⁹ I' ulsisu, "Kimanən shitu ki la'ti zhil ki Lya taka huti aki ngapti zhil ki mi' kina.

¹⁰ Gaki Musa usu, 'Nal bwagi nə dyawagi,' 'Mulnə, abyal bwasu ko dyawasu, a tloti.'

¹¹ Ngo nənəgu kini ki usu, in mulnə azi ulən təngaki ti' dəl bwasi nə dyawasi adəm Kolban i', (iki, abəl Lya i)

¹² nəgu katl, kəkən za'titi tə'pəli bwasi ko dyawasi kyautən ki ulənwai.

¹³ Nəgu lakida ki da katshilən ki Lya baliwai gaki bətl zhil ki mi' kina. Ki njikə' pətl undigi."

¹⁴ Dadfanu i Yesu taki dibəl mbalən bi, i' ulsisu, "Kumənnəni muswakən, a'manangu.

¹⁵ Ulnə də su' ge' yakən mbalən tu'dla u i də bezətiwai, ulnə də pe'tito' ge'tu də bezəti."

¹⁶ Mul kəm ki kumti, ti' kumi,

¹⁷ Kalki za'ti hwu'mbalən i, nətte libi u, i mil kushti wasi is ngemti yakən cimbəlti u də dləmti.

¹⁸ I' ulsisu, "Kinima ki maniniwaiya?" "Ulnə də suge' mbalən tu'dla u, kən bezətiwai,

¹⁹ Nəbə ambadlwas kən suwai u, atu'da'ka su, tu'nəgu təpekkı." Nənəgu Yesu pal mus ulki dəmi ki zeki.

²⁰ I' usu, "Ulnə dəpe'ti to'ge' tu'ki yakən mbalən u idə bezət'i.

²¹ A tugi, age' mbadl ki yakən mbalən, kən bezən ləba dəpe'ti, kənə kwonti, nə məgəlti, nə tlom mbalən,

²² nə pəti, nə lyap ləba, nə ngashti, nə ship totugi, nə nge Lya, nə ndau bishitu, nə bezən dəmti, nə nalkiga, nə kon nəmbalən, nə ndokənti.

²³ Mus bezən ləbagi atu'kən sipe'titodi, si də bezən mbalən."

Lati mbatl ki Kəli Solopinikiya

²⁴ I Yesu za'ləbi illə Taya nə Sidon. It tege' libiwon, ta lyami təmulən maniwai ngo' nənəgu a hwunwai.

²⁵ Kəliwon, gunə du mi'gatli gob yakuwasi, nəkumi Yesu da ki u, illə in ndakina dəkka.

²⁶ Kəliyisi yakən Helinawa ni, atlki zətti iki Solopinikiya ni. In ngem Yesu təp pekkəli yakuwasi du mi'gatli taka.

²⁷ I Yesu ultisu, "Hwe təkəm mil pa, gaki a'mbuni akan ulki dəmi ki milwai təbəl kəfiwai."

²⁸ I kəliyi ndəgiti i'ultisu, "Mul nalti, ey nəguda, ngo'nənəgu kəfi nəndə dab bi ki mil."

²⁹ I Yesu ultisu, "Gaki shilənwa'gu, paltya, du mi'gatli aza' yakuwagi yakənkəli."

³⁰ Nə' paltya libi u ille'mbi yakuwasi kəmuđi tən lu-mutti, du mi'gatli apeki.

*Yesu ndokəl mul nə bəda
kup kəm nə ma'shilənwai u*

³¹ I Yesu za' lukə Taya, i' bəli Sidon tən shitu i' bəli Dikapolis illə dlilka ki Galili.

³² Is mbəlli' mulnə bəda kub kəmwai u mul dəddətibi, is ngemti təszitto.

³³ I Yesu Kanti ispal malgəni' ki hwu' mbałən, i Yesu shim mil toh age' kəm ki mulisi, ibbeza makkən, ittən ləgawasi.

³⁴ Illa'ga lya immibə mbadli, i'ultisu, "Ippata!" (Iki, "buli!")

³⁵ I kəmwəs əuli, i ləgawas laki, i'gob shilən.

³⁶ I Yesu dlimisi bəs dlimi mulənwai. Sine se mbətl dəmtitənki sida.

³⁷ Is kumgagashinti, is usu, "Tapəl mus ləba mbuni! Mulnə bə da kubkəmwai u ma ta kumi i, mul dəddətəi bima taman shilən I."

8

*Damti nə Mbalən ki Zangu
Upsi*

(Mt 15:32-39)

¹ Age cinisi i hwu' mbałən domga dadanu. Ulki dəmi nisi dawai, i Yesu imbe milkushti wasbi, i' əlsisu,

² "Ami kub go'kə' hwu mbałənyi, gaki asəti mutti maki ngu asi ne'kəni, ulki dəmi nisidawai.

³ In a zasi sa zəga libi nə kuzən u, səkən ma'mbəkəşti libiwai, i ngu nami pe'ni lolu."

⁴ I mil kushti wasi ndəgiti is ultisu, "A ukən tə mbałən mbi ulki dəmi u nətə kəm mbałən age'dəlgən u?"

⁵ I Yesu ngemsi, "Ləpa nəmi nikini?" Is usu, "Ninngi."

⁶ I' ul dibəl mbałənsu sə'dəm atli. Nə'kan ləpa ninngiyi, i' gode Lya da, iccacali, i'go' bətl milkushti wasi sə' bwasi mbałən, is pəli nugu.

⁷ Kwesen nisida ten ngulen. Nə' gode Lya u, ippi milkushti wasi sə'bwasi mbałən.

⁸ I mbałən dəmi i kəmsi, i milkushti wasi yemi is njikən dəs ninngi nəgunə sa u.

⁹ Mbałənisi sa pəl zangu upsi. Kal ki pallisibi,

¹⁰ ittege' kundələn ne' mik
kushti wasi, illəge' luki Dal-
manuta.

*Palisiyawa də Lyap
Ye'lwadi*

¹¹ I palisiyawa gop ngep
Yesu. Tən sə' cimbəlti də, is
ngemti, tən gaki tən mbokisi
toh tən lwadon sul lyā.

¹² I Yesu mbə mbadli lolu,
i'usu, "Ya lakıda kini mbalən
kinəgun ki ngep lwaddə?
Bali amipi' kini, kənbətəlkin
lwadon sul lyawai."

¹³ Iki is izza'si, it-
tege'kundələn ki mal,
iddakaci tiyatən bigasika.

*Yis Ki Palisiyawa Nəki
Hilidus*

¹⁴ Imilkushti was musni sa
kan bilediwai, ləpa nəm kən
nisi katl ge'kundələni.

¹⁵ I Yesu dəllisi kəm, i'ulsisu,
"Yanən lu kizoki, apən
deməm nə yiski palisiyawa
nəki Hilidus."

¹⁶ Is shilən dəddəsi, "Is usu
tən gaki biledi nimindawai."

¹⁷ Yesu man ulnə si dlımti
u, i Yesu ulsisu, "Ya lakıda iki
usu biledi nikin dəwai? Hal
nəguni ka manini uwaiya?
Hal nəgun kin da yentini-
waiya? Mba dlwakən a
ndədəli kikən mantiniwaiya?

¹⁸ Dwadən nikında bəki en-
luwaiya nə kəm nikinda bəki
kumtiwaiya? Kəndə dabətl
kiniwaiya?

¹⁹ Na chali mbalən zangu
nantam ləpa nantamu,
mbutu nəmi ki yemini ki
bigeyi gunə sa u?" Is ultisu,
"Kutl nə lop"

²⁰ I Yesu ngemsi ləpa ningi
u na chali zangu upsi u pa?

Mbutu nəmi ki yemini? Is
ultisu, "Ningi."

²¹ I ulsisu, "Hal nəgun ma,
ka manini u waiya?"

*Yesu Ndokəl Dwawon a
Batsaida*

²² Is mbəkəci a Batsaida, i
mbalən en mbəlli' dwawon, is
bəlti bi təttənti.

²³ In ngapi dwanisi
toh, it mbəti malgən gatli.
Ibbezze'makən a dwadən,
izzə'toh, i Yesu ultisu, "Kən
də ye' ulunya?"

²⁴ I dwani ya lulya, i'usu,
"Ami yen mbalən; kənə pəti
asi duti"

²⁵ I Yesu zə'toh tən dwadənə
dadənu. I dwanisi bul
dwadən wasi, in ndoki, i'yen
lu kizoki.

²⁶ I Yesu ultisu, "Paltya libi,
bə tege' yakən gatluwai."

*Shilən Ki Bitlus Tən Yesu
Tiki Almasihu*

²⁷ I Yesu ne' milkushtiwasi,
is tege' mil gatlki Kaisaliya
Pilibi. Tən shitu in ngemsi,
"Ya mbalən də mbətəni?"

²⁸ Is ultisu, "Yahaya mulpətl
baptisma; gyenne, İliya;
gyenne dadənu, si usu nəm
ge' mik nje'shinkən ki Lya
kəni."

²⁹ In ngemsi, "Kinipa yaki
mbətəni?" Bitlus ndəgiti
i'ultisu, "Kikə Almasihu."

³⁰ I Yesu dəlisi kəm bəs
dləmi mulən ulən təntwai.

*Yesu Dləm Undi Məshtu na
Təppəli U*

³¹ I'gop kulcissi, yakən
mbalən nən tlebbəna dibəli
a ngeti, ma mikkina, ne' bas
ləbəsi, ne'mik bətl lashti zhil
ki Musa, sən tloti, kalki mutti
maki tən tləti lya dadənu.

³² I Yesu dləmisi shiləni kan unə sə'mani da u. I Bitlus dəlti malgəni, i'gop matiti.

³³ Ngonənəgu nə Yesu yalu kalu i'ya milkushtiwasi, im mati Bitlus i'ultisu, "Pəlolu nə ami shedan! Ge mbatlwagi laba ki Lya dawai sai ki mbalən."

³⁴ Imbe hwu mbaləni bi ne'milkushtiwasi, i' ulsisu, "Mul lyab dəp mul kushti ini, tənge' gawasi, a'kan gədlənnga ki bənawasi, abbələn kali."

³⁵ Mul lyab gawasi, tənholti, mulnə a hol gawas gayi u, gaki shilən ki Lya u, ziti tida.

³⁶ Yakən ti yankən mbalən mbi intambi dəb ləba mus, ge shu ki gawasu?

³⁷ Yakən dadanu ti yakən mbalən bəli tən gaki ti'ul mbatlwas da?

³⁸ In mulnə a kubsha i u nə shilən i u, age' hwon ki nge' ngapti ga nə pətl bezən ləba, yakən mbalən ma tənkub shaki matti, inta mbə ge' natl ki mulzətti u ne' milshinkən ki Lya kizoki."

9

¹ I' ulsisu, "Bali bali ami dləmikini, genda ki dləli aki səkkən yen məştwai, sai nə sayen gukki Lya a mbə nə ndəlti."

Shotti Ki Dli ki Yesu

² Kalki mutti məkkə i Yesu kan Bitlus, nə Yakubu, nə Yahaya, sinə gwasən it tolsi tən pyasti zəngə. I dliwas shoti.

³ I luləgəlwas hwali sol adı kaddwadən, kan u nəbə mulən kən ma' pəlti nəgu tən dəp ləbwai u.

⁴ I Iliya nə Musa is pekkisi, a shilən ne' Yesu.

⁵ I Bitlus ul Yesu su, "Mul lashti, a mbuni nəmini ki u. Hwe tən pələn kəs maki, gudəl nəm gwagi, nəm ki Musa, nəm ne ki Iliya."

⁶ (Ta hwol ulnə tətl dləmi u yi, gaki sa kum bənti.)

⁷ I lyawon tləttodi i idłasi, i kum yalon ge'lyanisi, ti usu, "Guki yakuyini ki lyami. Kumənti."

⁸ Bənə mantiwasənwai sige nəgu is yalu malgən dasi sayen mulənwai, Yesu ka'tl ne'si.

⁹ Sige' pe'ti suttən Zəga, I Yesu pisi bəs dləmi mulən ulnəs yeni u wai, sai nə yakən mbalən a hilya dige' mi'məşhti.

¹⁰ Is za'shiləni ge' dlomwasən, asi shilən ne' yelsəni yakənki "Hillya ge' mi' məşhti."

¹¹ Is ngemti is ultisu, "Ya lakida mi' bətl lashti zhil ki Musa də ussu Iliya ki mulpatlı su' pa?"

¹² I' ulsisu, "Iliya ki mulpatlı pa, appal mus ləba. Imikənda ki laci tən yakən mbalən, tən tle'bəna dībəli, as nəti?

¹³ Ami pikkini, Iliya a ləge tambəyi, sa pəlit ulnə təmisidə u i, kan unə da ki laci təntu."

*Yesu Ndokəl Yakən
Mulmi'gatla*

¹⁴ Nəs palte' ma' na mil kushti wasu, is yen hwu mbalən aga ndəlsi i, mi' bətl lashti zhil ki Musa də shottibi ne'si.

¹⁵ Nə ye' Yesu, mus hwu mbalənyi is kum gagashinti,

is lətemma'ti nəkitəl, sə' shin-nitti.

¹⁶ In ngemsi, "Shoti bi kiyakən kinida ne'si?"

¹⁷ I gudəl nəm ge'mbaləni ndəgiti, i'ultisu, "Mul lashti, i ngu, a mbəlli' yakuyini, gunə mi'gatli ki nge' shilən nidda.

¹⁸ Nəta totəntu, sai nə tala'ti atli, a biwas dəpət pukətkət, a ti ashti shinwasi, ati pə'sanganga. Adlimi milkushti wagiyi səppə'kəlti, sa maniwai."

¹⁹ I Yesu ndəgisi i'ulsisu, "Kini mbalən ki nəgun u nəbə kida la'ti mbadlwai u! Anəmi taman dəp ne'kini? Anəmi taman ngashtibi nəkinin? Mbəlli nən yakəni."

²⁰ Is mbəlli' yakəni. Nə mi'gatli yen Yesu u, aləbi aləbi i mi'gatli bat yakəni, i dlı-was gon nyepti, in nda atli i'go' bədəlti, a biwas də pət pukətkət.

²¹ Yesu ngem mul zə'yakəni, "Kənə anəmi uli mbitu?" I bwasisi usu, "Addi na' yakən.

²² Ta tle la'titi ge' utu ko mali, gaki tə'tlotida. Ngo nənəgu kən ma'pəl ulən u, kum gontinən a dəlmi."

²³ "In kən manti u?" I Yesu ultisu, "Mus ləba mul pə'kəni ma'mul la'ti mbadlə."

²⁴ Aləbi aləbi i bwasi ki yakəni usu "A la' mbadlə. Kati ləshi la'ti mbadlə takə!"

²⁵ Nə Yesu yen hwu mbalən də kitəl tedu, im mati du mi'gatli i'ultisu, "Ki, mi'gatli mul nge' kup kəm nə shilən u, a piki bwaski kiti, bə tege'ti nəwai."

²⁶ Kalki la'ti yalki mi'gatli, illi'ti nə ndəlti, dləwas də nepti, ibbwasti nəti. I yakəni

palkəni hwum mbalən, i ge' mbalən kiləbi difəli nami usu, "Taməcci"

²⁷ I Yesu gobto wasi it tləti lya, i' hilya gal.

²⁸ I Yesu telibi u i mil kushtiwas ungemi a malgəni is ultisu, "Ya lakida ma man pekkəltiwi?"

²⁹ I Yesu ulsisu, "Undiyi nənda pe'twai sainə ngeb lya."

Yesu a Dlim Undi Məshtu Nətə'pəli u Dadanu

³⁰ Is hilya dıləbi, is þeu tiya Galili, Yesu alyami tə mullən maniwai,

³¹ gaki ti kulci' mil kushtiwasi, ti ulsisu, "Sənbəl yakən mbalən ma'mbalən, sin tlotti, in sa tlötü kuma, kalki mutti maki tən tləti lya."

³² Sine saman shilənəwai, si banti'ngēpti.

Wokən Ngəli nə Nalti?

³³ Is mbə kapalnahum. Nə'te'libi u in ngemsi, "Yaki dlimtin tən shitu?"

³⁴ Ama sa shilənəwai, gaki tən shitu sa shilən i tən okənki baliwasən.

³⁵ Iddəm atli, imbe milkushti was kutl nə lopi bi, i'ulsisu, "Mulnə də lyamti tət dəm mulkina u, tikə mul dəb yakəni, addəm zheli ki mbalən."

³⁶ I'kan na'yakuwon, izziti adlom dasi, illuti adli, i'ul sisu,

³⁷ "Mulnə a nje na'yakən kənə gu u gaki shin i u, ami tə njeni. Mulnə nje u, ami təh njewai, mulnə shinən suduh tə njeti."

*Mulnə da gemmini wai u,
ginən kənə*

³⁸ I Yahaya ultisu, "Mul lashti, miyen mulən də pekkətl mi'gatli nə shin wagi, in ultisu təs zaki, gaki tida bəlmi kalwai."

³⁹ I Yesu usu, bi hane twai. Mulən kən pəl gagashiti nə shinyini, apa aləbi aləbi ab-byalənwai.

⁴⁰ Mulnə bə da leu badl nəməni wai u, ginən kəni.

⁴¹ Mulnə abəlkin mbəga mal nəm gaki kini ki Almasihu u, bali ami pikkini, təkən hol ulnə səbbəltwai.

Shitu ki pəl Bezən Ulən

⁴² Nətə mulnən la'gon ge'na'mili mi'la'ti mbatl nə ami təppəl bes ləba, nən ngətlli səllaki'bal yegən nə'ti hwu a yaldakka, a la'ti swage'bal mali.

⁴³ In towa'də la'tiki dəpəl besləba u, a pocitaka. Nən ngətli' ki, ki tege' gukki lya nə ndola toh, də gunə ki' tege' utu nə toh lopu, utuyi mul pəshtiwai.

⁴⁴ [Aləbi zhibəl mi'cissi nənda məşhtwai, nənda mbəshti utuyiwai.]

⁴⁵ In asənwa' də la'tiki də pəl besləba u, a pocitaka. Nən ngətli' ki, ki' tege'gu'ki Lya nə ndola asən, nə səllaki ge' ban utu nə asən lop.

⁴⁶ [Aləbi zhibəl mi'cissi nənda məşhtwai, nənda mbəshti utuyiwai.]

⁴⁷ In dwadən wa'də la'tiki də pəl besləba u, a ngongoli takə. Nən ngətlikki ki'tege' gukki Lya nə dwadən nəm, nətə' laki age'ban utu nə dwadə lop.

⁴⁸ Aləbi zhibil mi'cissi nənda məşhtwai, nənda mbəshti utuyiwai.

⁴⁹ Nə utu sə'okkəl mbalən, kan unə də okkəl ləba nə kukkudu u.

⁵⁰ "Kukkudu ulki zekkini, in kukkudu i a hammu, nə yakən tə mbili' təptənki? A' dəmni nə kukkudu ge' mba dlwakən. Pələn dəbki zeki ne'yelsəni."

10

*Kushti ki Yesu tən Bwasti
kutletti*

(Mt 19:1-12; Lk 16:18)

¹ I Yesu hilya dələbi, illə ge' Atl ki Yehudiya, ne' tən bigasi ki dləlka Uldun. I hwu' mbalən maga ma'ti dadanu, i'kulcisi kan u nə'kuda u.

² I palisiyawayen mbə ma'ti gaki səccimbəlti, is ngemti is ultisu, "Kizoda tə yakən mbalən la' kəli wasa?"

³ Inndəgisi i'usu, "Ya Musa pikini?"

⁴ Is usu, "Musa bəl mbalən səllash lwabbatki tlot kutleti, ala kəliyisi."

⁵ Yesu ulsisu, "Gaki ndəlki gawakən lakida i Musa lacikin zhiluda.

⁶ Amma tedj 'Lya kənənsi, mwani nə kəli.

⁷ Gaki nəgu a mulən za'dywasi nə bwasi, an ngap kəliwasi.'

⁸ Nəguni si lopi as dəm dlinəm. Akinaki nəmkəni səkən dəmti dli lopkənwai.

⁹ Ulnə Lya a mani u, bə mbalən bwasiwai."

¹⁰ A gip libine i milkushti-was ngemti dadanu tən shiləngu.

¹¹ I' ulsisu, "Mulnə ala kəliwasu, in ngau kundu u, ko'kən ti pəlti nəki lopi.

¹² In kəliyi ala mwani wasu in ngau kundu u, tapəl kontu balu."

*Yesu Alaki mil Albalka
(Mt 19:13-15; Lk 18:15-17)*

¹³ Mbalən də mbəllit Yesu na' mil gaki təttənsida, i milkushtiwasi matisi.

¹⁴ Nə Yesu yeni nəgu u i uli cillo'si. I' ulsisu "Zakən na'mil səmmbə makkəni, bi hanesiwai. Gu'ki Lya ki' unduwasənkəni.

¹⁵ Ami dləmikkini, mus mulnə andə nə gukki Lya kənə gunə na yakən dəpəlti wai u, təkən teti ge'guntiwai."

¹⁶ I Yesu kansi twadli, ati zissito, ati laki'si albalka.

*Yakən gidənsi mul usən
(Mt 19:16-30; Lk 18:18-30)*

¹⁷ Nə Yesu gollətu, i mulən pe'tetnəkitəl, inngus kinadakka, in ngemti i'ultisu, "Mullashti mul zo'mbadlə, yakəntapəli tambi dləwu nəbə kənpə'twai u?"

¹⁸ I Yesu ultisu, "Yalakida i'mbeki zo'mbadlə? Mul zo'mbatlı nəndawai sai Lya nəgwasi.

¹⁹ Man zhilgi, 'bətlo mbalənwai. Bə pəl kontwai. Bə məgəlwai, bədləm laga' tən mulənwai, bə dlu mbalənwai. Nal mikzə'ki."

²⁰ I'ultisu, "Mullashti, mus apəl undigi a ami na yakən."

²¹ I Yesu yati ya'ki lyamti, i'ultisu, "Ul nəmkən ələki lə ki'ul ulnə ni'zi u takə, a'bəl mingi nəbə ulən nisi dawai u, kən mbi ləba a Lya. Apa a'mbə a'bələnkəl."

²² Nə kub shiləni i kinawasnda, izzəga ati du mbadlə, gaki usən nəddə eye.

²³ A ləbi I Yesu ya milkushtiwasi, i'ulsisu, "Nən lotida təmi' usən tege'gu'ki Lya!"

²⁴ Milkushti yi kum gagashit ki shilənwasi. I Yesu ulsisu dadanu, "Kini milini, nən lotida te'ge guki Lya!"

²⁵ Nəte'kə mul usən ge'guki Lya, nən ngətlə' tə lakumi təbbəeu ge'shuki allula."

²⁶ Is kum gagashit mulndəlti, is ultisu, "In nəgu ubo, wokən mbi pekkəlkən ngu?"

²⁷ I Yesu yasi, i'usu, "Ma'mbalənbo mulpəkkənwai, ama bə ma'Lya wai. Gaki musləba mulpəkəni ma' Lya."

²⁸ I Bitlus ultisu, "Mi ngu ma za'ləbayi mabəlkikali."

²⁹ Yesu usu, "Bali ami dləmi'kini, mulən kən za'ti libi, ko yelsəniwas mudlə, ko yelsəniwas mwani, ko dyawasi, ko bwasi, ko milwasi, ko guwasi, gayini nəkuma shilənki Lya,

³⁰ apa a'hwol mbi' dibələba kutlkutl ləbi kutl ge' dəpki nəguni, nə libi, nə yelsəni mudlə, nə yelsəni mwani, ne' mi'zətti mudlə, ne'mil, ne'guh, i ngu kuma nə bəna. A lahila ne, ammbi diwunəbə kən pa'twai u.

³¹ Dibəli kəkina nənpaltikali, kikali nənpalti kina."

*Yesu a Dlim Undi Məshtu
na Təppəli u Dadanu
(Mt 20:17-19; Lk 18:31-34)*

³² Si to'ulshelima, Yesu də lə'akinəfəsi, a milkushtiwasi də kup gagashinti, mbalənyi

nə də bədl si kalu sima asi kupbanti. Im mbə' kutl nə lopyi, amalgəni i'go'dlimissi ulnə tə mbitu.

³³ I' usu, "I ngu mi sutin Ulshelima, sən bədl yakənmbalən ma'bas ləbasi ki Lya ne'mi'lashti zhil ki Musa, sin pocitti shilənki məshti, as bəl mingi nəbəs man Lya wai u."

³⁴ Sin lakkitti bi, as bezze'makən, as li'ti, as tloti, kalki mutti maki kuma atli lya."

Ngepki Yakubu nə Yahaya (Mt 20:20-28)

³⁵ Yakubu nə Yahaya, milki Zabadi, is sha'temma'ti, is ultisu, "Mullashti, mingeppki ki pəlimi ulən."

³⁶ I ulsisu, "Yaki lyamtini ta pəlikini?"

³⁷ Is ultisu, "Ndəgimi, cinkə te'ge' naltwagi, tə nəm dəm tən toshimtwagi, nəm tən tonawagi."

³⁸ I Yesu ulsisu, "Kimanən ulnə ngemtini uwai. Kən ma'tleti ge'mbəga malunətta tlewa? Ko nən ma'pəlikkin baptisma unəssə' pəlitənwa?"

³⁹ Is ultisu, "Mən manti." I Yesu ulsisu, "Mbəgamalunə tatle nənali u, nənali ki tleni, baptisma u nəsə'pəli u, nənali səppəli kini.

⁴⁰ Ama dəptən toh shimtini, ko tən tohna yini, gikənwai gunə nə halta bəli u. Ai, kəginəs pəli gawasən uni."

⁴¹ Nə milkushtiwas kutli kumi nəgu u, is gob kub dutu'ki Yakubu nə Yahaya.

⁴² I Yesu takisibi i'ulsu, "Ki manini ginə mansi nə

bə Yahudawawai u gumi-sisi wasən səndə nu ne' mbalənwasən kəmti səndə pəlisi ndəlti.

⁴³ Kəndəmti nəgu ge' dlomwakənwai, amma mulnə də lyamti tə'dəm bali age' kini u, sainə tadəm zheli wakən.

⁴⁴ Mulnə dəlyab dəb mulkina wakən u, sainə tadəm zheli ki kowonngi.

⁴⁵ Gaki yakən mbalən ma tə mbəni səppəli'bəna dawai, gaki tima təppəl bənadəni, abbəl dləwasi gaki dibəl mbalən."

Yesu Ndokəl Baltimawus Dwa u

(Mt 20:29-34; Lk 18:35-43)

⁴⁶ Is mbəkəci a Yaliko. Ti pe'ti də Yaliko ngu, nəti ne'mikkushtiwasi, nə bal dwobgakə dibəl mbalən, i dwa won mul ngeplu shin-wasi Baltimawus, yakənki Timawus, tiki dəmi a bishitu.

⁴⁷ Nəkkumi Yesu mul Nazalat kən u, i'go' tləl yali ati usu, "Yesu yakənki Dauda, kum gontini!"

⁴⁸ I dibəl mbalən matiti, tən bəshilənnuwai. Amma i'gob mbətl tləl yaltinki, ti usu, "yakənki Dauda kum gontini!"

⁴⁹ I Yesu dlili i'usu, "Takitibi teh." Is taki dwanisi bi tecfi is ultisu, "Albishiwiagi! Letedfi, ti mbekkibi."

⁵⁰ Illa' ul idlatti taka, it-tlətyama' Yesu.

⁵¹ I Yesu ultisu, "Yaki lyamtı ta pəlik?" Idwani ultisu, "mullashti, tambi yellu!"

⁵² I Yesu ultisu, "Zəgawagi, la'ti mbalwa' a ndokəlkı."

Aləbi i'ellu, ibbəl Yesu kal izzəga.

11

Yesu te' Ulshelima Ge'shu ki Gunti

¹ Nəs ələnja' nə Ulshelima u nə Betapaji, nə Betanya, a ma' Zənga Ki zaitun, i' Yesu shin mil kushtiwasi lob,

² I Yesu ulsisu, "Tenge' yakən gatlu nə kina wakən u, Nətə' twakən kən en' yakən zhaki ki kəndi, gunə bəmulən a to tənti gason wai u. A' təgələn ti sudi.

³ In mulən a ulkinsu, 'Ya kipəlin da nəgu?' A ulənsisu 'Mulban kən də lyapti, tən patltisut nəguni.' "

⁴ Is zəga, is le'mbi yakən zhaki a kina dlabi a bishitu, is təngəlti.

⁵ Mbalən inə ki dləli a ləbi u, is ulsisu, "Ya laki ki təngətl yakən zhaki u da?"

⁶ Is dləmisi ulnə Yesu pisi u. I mbałənni za'si is zəga,

⁷ Nəs mbəlli Yesu yakən zhaki u, is lala lulutwasən tənti, it toh tənti.

⁸ I hwu' mbałən lala lulutwasən tən shitu i'nami caldwa te' ge' dəlgən i' gen' dizhan dwai nəscalı te'ge' dəlgəni u.

⁹ Mi' ki kina nə mi' bətl kalwasi asi tləl yali asi ussu, "Hosanna! Albalka tən mul mbə ge' shin ki Lya!"

¹⁰ Albalka ki gut mul mbəti, ki bwasinən Dauda! Hosanna ki Lya!"

¹¹ I Yesu te' Ulshelima, i' te'ge libi ki Lya. Nə yaya lutya u nə' enlu a gemtu,

ippeki illə Betənya nə kult nə loppi.

I Yesu Pəli Pa' ki Kah bi

¹² Cilkəlu nə za'ti betanya wasən, a Yesu də kum kuzən.

¹³ Nə' en pəkkə kah tel lolu u mul dwa lede, Nəllə' ya ni u tambi mil tənkiwai. Nəm mbəci ma'tu, tambi ulən tənkiwai amma dwakatl, gaki lubal kəpətl mil ki kah u wai.

¹⁴ I ul kah nisisu, "Bəmulən dəm mil Iwanəwai hal patwagi!" Amilkushtiwas də kubti.

Yesu Likən Libi ki Lya

¹⁵ Is mbəci Ulshelima, I Yesu tye ge' libi ki Lya i'gop katti mil ultitaka aləbi, i'dəzhanisi kundən ki ulpwəsən taka, ne' mil shotti ulpi, ne'mil utl balutaka,

¹⁶ Taza'si səllə ge' libi ki Lya nə ulən nəwai,

¹⁷ Ippisi shilən, i ulsisu, "Kilacida: 'Libi ini nəndemti libi shilən ki Lya ki mi' dəpləbə' ki ni bo ka palliniyi lu dəpkı məgəlsi."

¹⁸ Nəbas ləbəsi nemi' lashti zhil ki Musa nəskumshiləni u is gop ngau shitu kigoptiti sə'tloti, gaki mbałən dibəli sikupbultwasi, mus dopga ki mbałən si kup gagashit ki kushtiwasi.

¹⁹ Nə su' pə u Yesu ne' milkushtiwasi is pe' də ge'gadli.

Shilən Tən Ko'Kən Pa' ki kah

²⁰ Nəkyau si beuti, is ye'kah nəsi akokkənyi hal nə tlilgisi,

²¹ Bitlus dambəlti i' ul Yesu su, "Mullashti, nəyə! Kah u nə' pəlibbi u. Akokkən i!"

²² I Yesu ndəgi. I' ulsisu, "Lakən mbadli tən Lya"

²³ "Bali a mipi'kini, in mulnə a ndə nə Lya u, tən ma' utl calgatl usu, 'Ndus dəki nda swa ge' dləka u' abə ta bwas mba dlwa swai u nən pəlli ulisi.

²⁴ Gaki nəgu a mi pikkini ulnə ka gyemin ge' shilən nə Lya u, i' ndə nə nali u, kəm mbitini.

²⁵ Kogassi u kən kidləlni də gyep Lya u, in ka ngapən mullən mbatlu, a tusintaka, Gaki bwaswakən ki lya ma tən tusi'kin bezən ləbawakən takə.

²⁶ Inkida tusti mulnə ngapənti mbatl takawai u bwaswakən ki lya ma tikən ndusi'kin ulnə ki pəliti u takawai."

Ngemti tən Ndətli ki Yesu

²⁷ Nəspalswa Ulshelima u, ti dut tyagelu libi ki Lya, i Ləbasi ne'mi'bəl lashti zhil ki Musa, nə mi'kina ki mbalən is mbə ma'ti,

²⁸ Is ul Yesu su, "Nə shitu u kən kipəl usida u? Wokən bəlkishitu kəpəlti nəgu?"

²⁹ Yesu i' ulsisu, "Ta pəllikin undi gyepton. A ndəgi nəni, amine adləmi'kini nə ndətli ki okən amipəl usi da.

³⁰ Baptisma ki Yahaya sul lya, kənpəka koki mbalən kəni? Dləminəni!"

³¹ Is gob shottibi ne' elsəni asi usu, "In ma ulnəsu, 'Sul lya kən pe'ku' tən ulminsu 'Ya lakiда bəma ndə ninəti dawai?'

³² Ngo nənəgu sa ussu, 'Ki mbalən kən u' " (Sibulti' hwu'mbalən, nə kowongi

simani Yahaya mul nje shinkə ki Lya kəni.)

³³ Is ndəgi' Yesu, "Simani wai." I Yesu usu, "Akən pi'kini nə ndəltu kən amipəl usi dawai."

12

Cibəlti tən mi'ka'gu ki inabi

¹ Yesu pəlisi shilən nə cibəlti, i ulsisu, "Mullən də mulnə pəlgu inabi. I' gandəli, i' dushu ki cetti mill inabi isi. I' kən yakən kəs ki mul butti gu. Ip bəl mbalən yen mi' kwolu kə ləbi. Iləge Atliwon.

² Nəgis cilu, i shin zheli-wasi ma mi' kwolu i tə'kami' na mil inabi i te'di.

³ Ngo nənəgu mi'kwolluyi is gobti, is liti is katti tohwas koni.

⁴ I' shin zheli won' danu ma'si; is li'muli aga, is lati ge'sha.

⁵ I' shin gon'danu, tibo, is tloti. I shin gen danu dibəli; genwasən gen'bo is tlosi, genwasən ge'si bo is li'si.

⁶ Hal nəgunma Yakən, nəm diti. Gunə ti lyapti u. Ibpa' shi' yakəni swamasi, i' usu, 'nəgon as yen naltwasi.'

⁷ Ngo nənəgu mi'kollu i ma is ul elsəsu 'Yakuwas kəngü, mulgu tıdə nje' bwasi nganni, Mi tloti, aləbayi dəmginən.'

⁸ Is gobti is tloti, is latitaka tyakalbi.

⁹ Yakən tə mulgu i pəli? Tən mbəti a tlwami' kwollu i si, ab bəlmbalən yen gu isi.

¹⁰ Kinibo ka yanən shilən ki Lya ki laci gasonwaiya? Ki laci da də ussu, 'Zənga u nə

mi' kəbbi nge u, i dəm zənga gəsbi ki ze'ki.

¹¹ Gu kyautən ki Lya kəni, ma'mini ulki gagashi'kəni.' "

¹² Bal ləba, nə mi' bətł lashti zhil ki Musa ne' mi'kina is ngau shitu ki gobtiti, simani cimbəlti u tənsi ni, is kum bulti ki hwu mbałən. Gaki nəgu is zati, is ziga wasən.

Ngepti tən Bətl up Ki ban ki Kaisal

¹³ Is shin palisiyawa yentey nə mbałən ki Hilidus, gaki si hwodəl Yesu geshilə wasi.

¹⁴ Nəs mbə u, is ultisu, "Mul, lashti mimani ki mul dləb balini, kiða olt mbałən wai, i' kan kowonngi ndatce, sai kullcit mbałən shitu ki Lya kənkida. A ndalini ki tənbalt upki banya, ki Kaisalya bal gu ki Loma, ko imi?

¹⁵ Təm batliya kobən batliwai?" Ti'ma nəm mangashtwasən u nəsikən ndətti u, I'ulsisu, "Yalaki i ki cimbəltən da? Nə kaminən ulpu te'di tanəyani."

¹⁶ Is kamiktai. I ulsisu, "Shin ki wokəni nə shishipty ki wokəntənki? Is ultisu, ki Kaisalkəni."

¹⁷ I Yesu ulsisu, "Bələn Kaisal, ulnə ki Kaisal u, a'bələn Lya ulnə ki Lya u." Is kum gagashinti ki Yesu.

Ngep tən Hillya Ki mi' Məshti

¹⁸ Sadukiyawa, si ussu, tləllyä ki mi' məshtidawai, is mbə ma ti, nə gyemti,

¹⁹ "Mul lashti" is usu, "Musa alacimi, ən yelse ki mulən aməcu, isza kəliwasi bə yakən

nı'dawai u, adəmi hwel ki kan kəlisi, azi yelse wagisi mil.

²⁰ Is, pəl mbałənyen elsəni ini mwani gudəl ninngi. Nəm pəl kutleti, imməci taza yakənwai.

²¹ Kilopisi ma i kənkəli i, tima imməci, tambi Yakən sitwai. Ki maki ma nəgu.

²² Nəgu must ningi i sambi yakən ne'twai. Patibisi ikəli i məci.

²³ Gas, tləllyä kəmik mashti, kəli kəwo kəntidəmi age' si? Gaki muswasən sadəm nəkəli isi i."

²⁴ I Yesu ulsisu, "Gaki nəgu ki gəlni dawaiwa? Gaki kimənən lwabatwai, bəmanən pəlti ki Lya wai.

²⁵ Gas tləllyä kəmik məshti kuletti nən dawai, abəkəndəti nən dawai, sitdəm kənə milshinkən ki Lya kəni.

²⁶ Gaki tləl lya kimi məshti, kataba, dlap lashti ki lwabakki musa waiya, kənəqunə Lya ultisu, 'Ami ki Lya ki Iblahim, nə Ishaku nə Yakubu waiya?'

²⁷ Gi'nə Lya wasən bə mul mushtiwai u, Lya wasən kamini. Balini kagəlni i."

Zhil mul Nalti

²⁸ I mul bəl lashti won ki Musa immbə immbisi də shotti bi ne yelsəni. Nə' en Yesu apəlisi shilən ki zeki u in gyem Yesu, "Zhilu kənki mul natl kəni?"

²⁹ I Yesu ndəgit i ultisu "Mul nalti tikə, 'Kumini mi' Islaila, Lya i nən, Lya nəmkəni."

30 Lyam Lya wagi nə mbadlwagi, nə dliwagi, nəmanti wagi, nə ndəl twagi.'

31 Mul bəltti iki, 'ki Lyam yelsewagi kənə gawagi.' Zho ulən nənda ti ngətl gu nənaltwai."

32 I' mul lashti zhil ki Musa i ultisu, "A ndəgi balini mul lashti, Lya nəm kəni, gonnən dawai saiti,

33 A' lyam Lya nə mus mbatlwagi, nə mus man-tiwagi, nə mus ndəltwagi, a' lyam yel'sewagi kənə gawagi, Ai ngətl ulnə ki kyeli Lya u nə poshti poshti u nə kini da u lolu."

34 Nə Yesu Ye'ni tapəlli shilən ki zeki u, I ultisu, "Kida lolu nə gu'ki Lya wai." Pa'ti bisi mulən a ngemti nə ndəl ki mbatl ki ullən nuwai.

Gyep tən Ya'kən ki Dauda

35 Nə Yesu də, kulcik mbalən age libi ki Lya i' usu, "Yalaki i mi' lashti zhil ki Musa usu almasihu yakənkə Dauda ni?

36 Dauda gawasi, tən ndəl ki yalki mbatl ki Lya ki gunti I usu,

"Lya ul Lya i usu,

"Dəm tən toh shimtini, he nə azəkki a ga də mik ngekki."

37 Dauda gawasi immbe' ki 'Lya.' Yala'ti atdəm yakuwasda?" Hwu mbalən is ga'ki' kəm nə holtugi.

Yesu Buli mi' Lashti Zhil ki Musa Galdəga

38 A ge'lu kulcik mbalən ki Yesu, i' usu, "Pən demdem nəmi bətl lashti zhil ki Musa, mi' lyap dunnə bas lulugəl,

lyamtiwasən tə mbalən gob shinnissi age'lu ulti nə ultitaka,

39 lyamtiwasən tə mbalən bəltsi ludəp kizeki age'lu dopga ki Yahudawa, nəlu daddabəl.

40 Siki mi'dap ləba ki mudliyi nə mwani məcisi u, nə pətl pyasi' shilən nə Lya gaki gəl assan. Sisə' pocisi batlti mulndəlti."

Bətl up Ki kəli u nə Mwani Məcitu

41 I Yesu dəm malgun kəlu kap up ki libi ki Lya, ati ya' ulpu nəsi uttti agibbi u. Hwu mbalən mik ulki toh asi utti ulpi milnalti.

42 Amma guli kəliwonmbə gunə bə ullən nədawai u gunə mwaniwas məci i bəl bwasti dlom ki kobo, iki kobo nəm,

43 I Yesu taki milkushtiwasi bi, i ulsisu, "Balini, amipikkini, ulnə guli u utti u gunə bə ulən nəda wai u ngəl ki mbalən kap.

44 Musswasən si bəlini təngaki usən wasən, ti bo jwa ulnə nətoh u təbəli, gunə itidəmiti."

13

Yesu Dləm undi Batti Libi ki Lya u nə tə pəldli u

1 Yesu dəpeti tet libi ki Lya, nəm age'mil kushtiwasi i ultisu, "Mullashti, nəyen undi zənga i nə kəpbi il!"

2 I Yesu ultisu, "Kən dəye' unndibas kəpbi iwa?" Ba zənga u nə bəkən dizhatti takawai u.

3 Yesu kədəmi atən zəga Zaitun gunə də ya' libi ki

Lya u iki Bitlus, nə Yakubu, nə Yahaya, nə Andalawas is gyemti amalgəni

⁴ "Dləmimi anəmi səppəl usi u? Undi ulu kəntən yeni gasi u nədə lyap ndatu?"

⁵ I Yesu ulsisu, "Maninca bə mulən gəl kiniwai.

⁶ Mbalən dibəli sən bəti ge' shin ini, asi ussu 'Siki ami, hal Səngəl mbalən dibəli.

⁷ Inki kup shilən ki dlati dlati nə kumini kumini wasən u bə batlwakən tləwai. Hwel nəgu tənda, amma pati bisi i' balla u wai.

⁸ Mbalən nəntli yelsəni mbalən, gunti, nəntli gunti. Nəngotti kup nyapti ki atli agə luyen, nə kuzən. Ngo nənəgu la'ti gəs ki bənani."

⁹ "Pən dəmdəm nə gawakən, gakisən tilakin kina də mik atli, as likin age lu dopga ki Yahudawa. Gaki shin ini, kin dliti akina dəmik kəndədlom nə gumsi tən gaki ki pisi ulnə' manini u.

¹⁰ Adəmi hwel gopti shilən ki Lya kən pa tən dləmi mbalən.

¹¹ Ga'si unə satəlakin kina də gumsi' u, bə hwok kiniwai, ngo nənəgu kini kəmil shilənwai, Yalkimbatl ki Lya kən bətl kin ulki dləmi.

¹² Yel'se nən bətl yel'sewasi as tloti, bwasi tən bətl yakuwası mil nən tləlli' mikzi'si as laki a tlosi.

¹³ Mbalən nənnge'kini gaki shin ini, ngo nənəgu mulnə a ngashbi nəpatwasu tənpeti."

Besən Bəna

¹⁴ Ka yenən a dlləl bezən kyautən mull cik zhenti gelu unə bə a mbunwai u (mull

dləm lashti təmmanica), Ginə ge' atl ki Yahudiya u as kitəli as tege'zənga.

¹⁵ Mulnə ge libi ki lya u bəppe' sudı atte' libi gaki ka' ullənwai.

¹⁶ Mulnə agegu u bə pal te' də ka' lulutwai.

¹⁷ Mi' tugi nə mi' mil kali age'cin u ulki cik go'kəni!

¹⁸ Shilənni nə Lya bə ulu nda age' watlənwai.

¹⁹ Age cin u nənpəl bezən ləba u nə bə a pəldə gason wai u, tun nə Lya pəl dəpləba, i mbəl cin ki səti, kənpəl u nd-was nəwai, nəpatiki dəpləba.

²⁰ "Tə' Lya abosən mutti takawai u, da mulən kənsatwai, gaki ginə olsi i, in ndokəl mutti taka.

²¹ Age cin u inmillən a ulk-isu, 'Yen Almasihu ngu u!' Ko 'yenən, ti ngwa!' Bə ndəniwai.

²² Gaki almasihu ki ləgati nə mik njeshinkən ki Lya ki ləgatti sən peti tedi asi pəl ulkə gagashinti tən gaki sə'gəl ginə' olsi i, ənnən pətu.

²³ Təngaki nəgu a' pən dəmdəm; apikini mus ləba u nə nən ndatu."

Patl ki Yakən Mbalən

²⁴ "Amma age' muttyi, kalki bəna,

" 'Cin nəndəp dəmshal,
Liy kən cil nuwai.'

²⁵ Cadləl nən gobti nda sullya,
Nən wu' bas ləba ki lya.'

²⁶ "Age' cin u mbalən nən ye' Yakən mbalən də mbətige' ku'kuti, nə naltwası nə ndəlti.

²⁷ Tənshik mil shinkənwas sudı as dom ginə' olsi kal nə kina, tohna nə tohshimti, nə ngwatlti ki dəpləba nə ki lya."

Cimbælti tən Pət ki Kah

²⁸ "Kulcin ulən tən pət ki kah: Kayenən təbal dəltu, manini watlən bal nja i.

²⁹ Dadanu kayenən u ndigi də ndatu, manini təbal nja i, tən bidlabi kən tibali.

³⁰ Balini, amipikkini, hwonnu kənpatwai, sainə mus usi a nda.

³¹ Lya nə atli nən pati amma shilən yini kənpa'twai."

³² "Amma cini nə gasi isi, mullən maniwai ko mik shinkəni ko Yakəni, mul zətti mani katl.

³³ Pən demdem! Dəmni nə mantı aki shilən nə Lya! Gaki ki manən gasi u nətə cin u mbə uwai.

³⁴ Kənə mullə'lo kəni: Isza' libiwasi ipbəl zheliwasi kyautən ko gukəni nə kyautənwasi, i'ul mul kitən dlabi usu Dləlgal.

³⁵ Dləlnigal, gaki kəmanən gasi unə təmullibini paluwai, ko asuti ko agasi ko abilucili ko nə kyau.

³⁶ Bəm mbə katl, ambikin də nde' Yemmbudswai.

³⁷ Ulna dləmmikini u, I ami pikkin: 'dləlni galt!' "

14*Mikkina a Dlil Shilən i Si' Tlo Yesu*

¹ Mutti lob kən də as pəl daddabəl ki dəkəshti ki biledi u' nə bə Yis dagibiwai u, I bas ləbasi ki Lya nə mi'lashti zhil ki Musa is ngau shitu u nə sə' gob Yesu da u ki hwuni sə' tləti.

² Is usu "Bəspəli ge' daddabəl luwai, gaki ba mbalən tləl dlati."

I Swati Yesu Mil mul Ulpi Abetani

³ Yesu a Betaniya a libi ki mulnə si mabeti ki Saminu dakəl. Ti dəmti ngu, I kəliwon mbə nə yakən ləda gunəs pəli nə zəngə ki onis, nə mil a gibi ki naldi mul ulpi. It tatlı ləda mili, it ci ndəlli' Yesu aga.

⁴ Ginə a ləbi u is kum lwetl ki mbadla, is ul yelsəni su, "Ya lak kon nə milu da nəgu?

⁵ Tə'sa ulin taka u, ngətl upki ndacin ki hwon nəm as bəlginə bə ulən nisi dawai u, da nən gəlti!" Is mati kəli isi.

⁶ Iki i Yesu usu, "Zakənti, Ya laki iki hwottiti da? Ulki zokki təpəlini.

⁷ Ginə bə ulən nisidawai u sinekkini ko gasiukəni. Ko gasiukən ki lyamtini kin pəlissi zo'ləba, gaki ko gasi u kən kine'kənwai.

⁸ I kəliyi pəl pəl tiwasi. It bene mil adli it li'kənəni kamin gutəni.

⁹ Balini amipikkini, mus lu unə tə dləp shilən ki Lya tən dəpləba u, sin gobti dləb ulnə kəli u pəli u gaki da mbəlti."

Yahuza Dəgi Ti'bəl Yesu

¹⁰ I Yahuza Iskalyoti, nəm ge' mil kushtiwasi kutl nə lobpi, illəma bas ləbasi ki Lya gaki təbbəl yesu masi da.

¹¹ Nəskumi nəgu u is pəlhəwl mbatli, is ndigi sə'bəlti ulpi. I' Yahuda ngwau shitu ki bəlti.

Yesu ne Mil Kushtiwasi Dam Ulkidami Gelu Dadabəl ki Dakəshti

¹² Cin ki nəm ki dadabəl ki biledi gunəbə yis dagibiwai u, a kudi pətli dli i də poshti yakən mbəla gaki dadabəl

ki dakəshти, i mil kushtiwasi gyemti is usu, "A ukən ki lyamti tən le' likəni' lu dəp dadabəl ki dakəshти?"

¹³ I' shin mil kushtiwasi gudəl lob, i' ulsisu, "Ten ge'gatli, kin mati nə mullən ki kami nə tobmal a' bələnti kali.

¹⁴ Ulən mullibi u nə' te gəbi usu, 'Mul lashti də ngau: kəbsi nətə' dəmi ti' dəp ulki dami ki dadabəl ki dakəshти ne mil kushtiwasu?'

¹⁵ Tən mbokikin toh tənbəl kəpson ki libi ki lya, gunə ki likəni ki zoki. A ləbi ki likənimi."

¹⁶ I' mil kushtiyi za'ləbi, is su ge'gatli, is mbi ulisi kənə gunə Yesu dləmisi u. Is likən dadabəl ki dakəshти.

¹⁷ Nə bisu pə u, i Yesu mbə ne' milkushtiwasi kutl nə lob.

¹⁸ Asi dəp ulki dami ngu, i Yesu usu, "balini amipi'kini, nəm agekini tin bəltəni, gunə ti dəmti nə ami u."

¹⁹ I' mikushwasi ispəl du'tugi, asi ultisu nə nəm nəm, "ko a mini?"

²⁰ I' ulsisu, "Nəm ge' kutl nə lobpi gunə ami dəmti ge' gal nəm miti.

²¹ Ya'kən mballən nən zə'ga, kan u nədə kəlacı təntu. Amma ulki zə'go'kəni tənmulnə nən bətl yakən mballən u, nən ngətlə' muli tə azəntwai."

Ulki dami ki mulban

²² Si ge' dəmti, i Yasu kan biledi, nən ngem Lya u, iccacali, ibbəl mil kushti wasi, i' usu, "Kamini; gubo dliyikəni."

²³ Iki i'kan mbəgamal, kiməl ki innabi iki in ngem Lya, ibbəlsi, muswasən is tə a gəbi.

²⁴ "Guki hwulayini ki njikə' alkawali, gunə bəna dli gaki mballən u" i' ulsisu.

²⁵ "Bali ami pikkin, akən tle' malki innabi nuwai, sai gasiwu nəta tə pyale' i ge' gu'ki Lya u."

²⁶ Nəs ulwul ki ndwa'ti Lya u, is peki is totən zəga ki zaitun.

Bitlus Nən Nge' Ma' Yesu

²⁷ I Yesu ulsisu, "Muswakən kən ndatini, ki lacida: 'An li'ti mul byatlı mbəla i', mbəla i nən dla'ti ga.'

²⁸ Amma kal ki tləl lya ini, an ngəttikin də mbəkəshти a Galili."

²⁹ I Bitlus usu, "In muswasən sən ndatu, ami akən ndatwai."

³⁰ I Yesu ultisu, "Bali ami dləmi'ki, age' gasu, kapən tə guda la'yal asən lop, kən usu kəmanən wai asən maki."

³¹ I Bitlus go' dləmti nəndəlti ati usu, "In nən tlotən im-imiku, akən nge' makkiwai." Muswasənma nəgu sə dləmi.

Yesu Ngem Lya a Gatsemani

³² Is ləge'luwon nədə mbəttiki Gatsemani, i' ul mil kushtiwasisu, "dəmniki ta shilən nə Lya."

³³ I' kan Bitlus nə Yakubu, nə Yahaya, a ge'nəgu i wuli gəp hwottiti a mbadlwasi, i wuli tlwedli.

³⁴ I' ulsisu "Mbadli də bəna, kənə ta məci. Dlilni aki, a dlilni gal."

³⁵ Nə' beukina ten ngulen u, in nda atli, in ngem Lya, i' usu, in nən pətu akami' bəna u taka.

³⁶ I' usu, "Abba, Bwas-inən, mus ləba mul pəkəni amaki. Kami mbəgamalu taka. Musnə nəgu bə manti ki gayiwai, gwagi."

³⁷ Ippal te ma' mil kushti-wasi im mbəsi də nde' yemmbudi, i' ul Bitlus su, "Bitlus! Nde' embukən kidaya? Kəkən maddəb kəpədəliwaiya?"

³⁸ Dəmni ki pədəli a ngemən Lya, ən-dan ge' cibəlti, yalki mbatlı ki lya akami i' amma dli a ndəlwai."

³⁹ Ippal tyə dəddanu, in ngem Lya, kənə kidigi.

⁴⁰ Nəppal te'du, im mbisi də nde' yemmbudi, gaki yemmbu' a njikən dwadən wasən. Is hwol ulnə sə' dləmitu.

⁴¹ Patl te' ki makisi, i' ul-sisu, "Kidi nde' yemmbudi aki shu'ta? Anjikən i! Cin ambə i. Yanini, sabəl yakən mbalən a toh də mi' pətl bezən labə i'.

⁴² Hillya! Məzənga! Mul bəltən u balu!"

A Gob Yesu i

⁴³ Ti ge' shilən, Yahuda ngu, nəm ge' mil kushtiwasi kutl nə lopi, im mbə ne' hwu' mbalən siki ngapi nə bas pəga nə kumbəl, bas ləbasi ki Lya, mi' lashti zhil ki Musa, ne' mi'kina shinsi sudı.

⁴⁴ Mulbəltti u, takəndi nesi i, "Mulnə akucenttu, tiki mullisi: a'gobpənti, a'zəngane'ti a'ngappənti kizeki."

⁴⁵ Nə mbəkki Yahuza, I'ləmak Yesu, I' ultisu, "mul-lashti!" I'kucenti.

⁴⁶ Imbaləni gob Yesu is ngapti nə ndəlti.

⁴⁷ Nəm ge' milkushti ki Yesu ki dləli nja nəti, in ndust pəga wasi ittele zheli ki bali ki bas ləbasi ki Lya nde'ti, ippa'ti kəm.

⁴⁸ I Yesu ulsisu, "kipe'ni ton nə bas pəga nə kubəl wakən ki' gobpənnən dama ami məgəlkəma?

⁴⁹ Ko gasiu kəni amine'kini, age' libi ki Lya ami dləp shilən ki Lya, kagobnənwai. Pələn dli nəgu gaki tə shilənki Lya njikənənda."

⁵⁰ Musswasən aləbi is za'ti, is kitəli.

⁵¹ Yakən gidənsiwon gunə bə ulən niddə dliwai u amma ul idlatlti katl, ati bətl Yesu kal.

⁵² Nəs'gob Yesu u, i' kitəli bə ulən niddə dliwai, is zakkisi ul idlatti.

Yesu Akina Də mi'Dlit Shilən

⁵³ Is təla Yesu ma' ki bali ki bas ləbasi ki Lya, mus bas ləbasi, ne' mi'kina, ne' mi'lashti zhil ki Musa is domga ma'ti.

⁵⁴ I Bitlus bəlti kali, alolu lolu, swa dlomban də ki bali ki bas ləbasi ki Lya. Aləbi iddəm ne' mi'butti dlabi, a ti ko'utu.

⁵⁵ Bas labasi ne'mi'dlil shilən si ngau ulnə səm mbi tən Yesu u tədəmkı ta pəl byasləbayi səm mbi sə'tlotti da, sa mbiwai.

⁵⁶ Mbalən dibəli is lige'ga, biwasən anda nəmwai.

⁵⁷ A ge' kale igyen, shali Yesu ləga'ga:

⁵⁸ "Məkum ti usu, 'Tən batti libi ki lya u nə mbalən kəni nə toh u, a'kən kundu ge'mutti

maki, gunə'bə kəntiki toh wai u.”

⁵⁹ Mus nə nəgu biwasən a nda nəmwai.

⁶⁰ I ki bali ki bas ləbasi ki Lya hiliya akinawasən, ingem Yesu, i'ultisu, “Ulki dlimi ni'dawaiya? Shilən u nəsi dlimti tənkupa?”

⁶¹ Yesu a shilən wai ta dləmi' ulənwai. I ki bali ki bas ləbasi ki Lya ngemti dadədanu, “Ko kiki Almasihu yakən ki mulnaltwa?”

⁶² Yesu usu, “Amini, kən ye' yakən mbalən kidəmi təntohship ki mul ndəl ki Lya, ti sussudi ge' kukkuti.”

⁶³ I ki bali ki bas ləbasi kye'kyesh lulugəllwasi. In gyemi, “Undə sheda ukən tən ngayin dadədanu?

⁶⁴ Ka kumən musən Lya u nəppəli uwaiya. Ya kiyanəni?” Mus i mbaləni pochi shilən gaki sə'tloti.

⁶⁵ I gen gob bezetti makən, is kəndi' dwađən, is lili'ti, si ultisu, “Dləmimi okən liki!” Mik butti dlabi ki libi ki Lya is gob lilititi.

Bitlus Usu Təman Yesu Wai

⁶⁶ Bitlus a atli adlomban ge' libini, I zheli Yakən kəli kə bali ki bas ləbasi mbə.

⁶⁷ Nə en Bitlus diko' utu u, I' yati kizekki. I' ultisu, “Kima a yenənki nə Yesu, Banazelet tu!”

⁶⁸ Amma i musən matti, i' usu, “Aman ulnə ki dləmti uwaima.” Nədl dləmi nəgu u, i' hilya illəbidla, aləmdəmtwai i guda la'yali.

⁶⁹ I zheli yakən kiliyi yenti, itl dləmi ginə ki dləli aləbi u, “Guma age' si tida.”

⁷⁰ Immusənte dadədanu. Alən dəmtwai, iki dlili i is ul Bitlus su, “Kima nəmwəsən kəni, gaki kimul Galilini.”

⁷¹ I Bitlus pəli gawas bi. Ati Lenceti, ati ussu, “Aman mulnə kishilən təntuwai.”

⁷² Aləbi aləbi i guda la'yali asən lob. I Bitlus dambəl shilən unə Yesu pitu, “Kapən təgunda la'yali ki asən lob, kənmusənti nə ami asən maki.” Nə' dambəlli u, iki immbutlgekulu.

15

Yesu Akina ki Bilatus

¹ Nəcil kəlu, bas ləbasi ki Lya nə mikkina ki lashti zhil ki Musa, mus mi' dlil shilən is dləl shilən. Təngəki sə' kəndə Yesu, is ziga nəti, is bəl Bilatus ti.

² I Bilatus gyemti i' ultisu “Kiki guu ki Yahudaway?” I Yesu ndəgit i'usu, “Nəgu ki dləmi.”

³ I bas ləbasi ki Lya is gob dagətli tənləba dibəli.

⁴ I Bilatus gyemti danu i' ultisu, “Ki ngu, si dagətli tən ləba dibəli, kikən ndəgissi waiya?”

⁵ Amma hal nəguni Yesu appallisi shilənwai, i uli hwot Bilatus.

Apoci Yesu Məşti

⁶ Ulnə guu kudi pelti agas cin ki dadabəl tən zakkissi mulnəməni nəm kige' kulkuku gunə mbalən ngemi u.

⁷ Mulənda si mbettiki Balnabas gunə ki kəndə age' kulkuku u, ne'mi'ndəlkiga ginə mbə məşti age' cin ki ndəlkiga.

⁸ I dobga ki hwu mbalən is mbə ma'Bəlatus təppəlisi ulnə' kudə pəlti u.

⁹ I Bəlatus ngemsi i'usu, "Ki lyamtini ta zakikkin guu ki Yahudaway?"

¹⁰ Gaki tamaniyi si usu gaki ngettī lakida i bas ləbasi ki Lya bəl Yesu a tohwasi.

¹¹ I bas ləbasi ki Lya is datti mbalən shilən bi, sə'usu təzzakisi Balnabas ge'shuki Yesu.

¹² I Bəlatus ngyemsi dadanu, "I mikən ta pəli nəmulnə ki mbetti ki guu ki Yahudawa u?"

¹³ Is mbəl la'ti yal tənki dadanu asi usu, "Tolənti tən gadlənnga!"

¹⁴ I Bəlatus ngemsi, "Yalakida? Bezən ləba yakən təpəli?" Is mbəl tləlyal tənki asi usu, "Loti!"

¹⁵ Bəlatus də lyamti təppəli mbalən ulnə mba tlwasən də lyamti u, is zakisi Balnabas. Illaki is lə' Yesu u, ibbəli, sə' tolti tən gadlənnga.

Sojoji is Laki Yesu Bi

¹⁶ I sojoji zəga nəti a tyə bidla də guu, (iki bidla ki gunti) is domi dibəl sojoji ga.

¹⁷ Is laki'luləgəl undi ki gumsi mul hwula gagi, is pəl kulu gawon ki gumsi ki ili, is shimi'ga.

¹⁸ Is go'shinniti si usu, "Tə Lya pəli'pyasti ki mutti guu ki Yahudawa!"

¹⁹ Is go'li'titi aga nə kumbəl, asi bezetti makən. Is ngus atli tənsi bəttli nalti.

²⁰ Nəspa' lakkittı bi nəgu u, is tusi' luləgəl ki guntisi takə,

is lakki' luləgəlwasi. Iki is sulti dla gaki sə'tloti.

Atol Yesu tən Gadlənnga Yi

²¹ Sige'zəgga, sai mulən kəngü də beuti, mulshin Siman, mulki Sayilin, mul zəg Elekzanda nə Lupus, ti petite'ge' yakən gatlon, is la'ti nəngesi dəka' gadlənga ki Yesu.

²² Is təla Yesu ge'luwon si mbelləbisi ki golgota, (iki "Luga mbalən").

²³ Aləbi sitaki' malki inabi kigushli nə mul in nəg tleti.

²⁴ Iki is tolti tən gadlənga. Is bwəs luləgəlwasi age' dlomwasən, is pəl kuli a tən gaki sə'en ulnə tə kowon ngi mbi u.

²⁵ Nə dom ki nətapsi ki nikyeukən si tolti tən gadlənnga.

²⁶ Is lash shilən ki dagəlti aga da'ka, "Tiki Guki Yahudawa."

²⁷ Is tol məgəlsi lop tən gadlənnga ne'ti, gudəl nəm tən toh shimti, gudəl nəm tən tohna.

²⁸ [Gukə njikə'ki nasi u nə' usu, "Sa bəltli ge'mi' pəl byas ləba."]

²⁹ Mi'beuti is go'pitti du shilən du shilən ya' shuge mbalən, asi wuga, asi ussu, "Kiwunə kin batti libi ki Lya, a'kəni ge'mutti makwa,

³⁰ Pe'sutdətən gədlənnga uđa, a' Pe'kəl gawa' da!"

³¹ Nəgu bas ləbasi ki Lya ne'mi' lashti zhil ki Musa is gob lakkittibi age' dlomwasən asi ussu, "Tapekəl gen i', bətaman pekəl gawa swai!

³² Almasihu u, guki isla'ila, tæppe'suddə tən gədlənngə nəgun da, mima anyeni anla' mbatlda." Ginəs tloti ne'tu sima is gob byalти.

Məshti ki Yesu

³³ A bal dloncin, i dəmshal idla atli, i dom maki ki su'pəda.

³⁴ Nə dom maki ki su'ti, i Yesu shilən nə ndəlti i'usu, "Eloi, eloi, blama sabaktani?" (Iki, "Lya yini, Lya yini, ya lakida i'lakəntaka?")

³⁵ Nə ginə ki dlili aləbi kumi nəgu u, is usu, "In ngu, timbe' Iliya bi."

³⁶ Nə mwasən kitəli, i lap soso ge'mbya mal ishimi tən kumbəl It taki Yesu gaki tətle, i ussu, "Dilin tən ya nini ko Iliya nən pekəlti sudı."

³⁷ I Yesu shilən nə ndəlti, iki məshtwasi.

³⁸ Iki labule kige libi ki Lya bwasi ləbi lop, nə alyu nə tli.

³⁹ Mwani mul ndəl ki mbalt, gunə ki dləlli akina də Yesu u, nə' yen məshti, ki Yesu u i' usu, "Balini, mulu yakən ki Lya kəni!"

⁴⁰ Mudli yen is dləltel lolu də yallu. Ge'si Malyamu Magadaliya, nə Malyamu dyaki Yakubu Yakəni nə Yusupu, nə Salomi.

⁴¹ A te' Galili mudliyi bəlti kali asi pəlitti kyautən. Mudli yen dadanu dibəli nəs mbəne'ti a Ulshelima asi ləbi.

Agu Yesu I

⁴² A suti, də mbətti təlu cillu cin ki shuti ki Yadudawa.

⁴³ Yusupu mbə, mulki Almatiya, mul dlil shilən kəni, mul pəli'mbalən zo'ləba, mul butti gukki Lya u, tə

mbə. Ippəl ndəlti mbadli illəma'Bilatus, in ngemi sə'bəlti dliki Yesu.

⁴⁴ I Bilatus kum gagashinti nə'kumi Yesu a məccu. Imbe soja yibi in ngemti balima Yesu a məccuwa?

⁴⁵ Nəm mani nəgu u abidi soja u, ibbəl Yusupu dli i.

⁴⁶ I Yusupu wul likkapani ki lili. Nə'shi' Yesu u, illa'ti ge'li'kapani ki lili i, illa'ti ge'lu gum mbalən gunəs dugi ge' zənga u, ibbədəl zəga i tən bishu gun mbaləni.

⁴⁷ Malyamu Magadaliya nə Malyamu dyaki Yusupu is yen lu u nəs guti da u.

16

Hillya ki Yesu Ge'mi'məshti

¹ Nə cin shuti be u, Malyamu Magadaliya, nə Malyamu dya ki Yakubu, nə Salomi, is ul mil ki tukəni dli mul təmti, gaki səlle' tukə dli ki Yesu.

² Gas cin ki kina ki shuti, a bilucili petito' kəccin is ləge'lü u nəs gutida u.

³ Asi tən shutu is ngem yelsənisu, "Okən jakənimmin yegən u taka dəbi shu ki gum mbalən u?"

⁴ Nəs til ga lya u, is yeni, a jakən yegən taka malgəni i, in ngu, balini.

⁵ Sisu'ge'lu gum mbaləni, is yen yakən gidənsiwon ki dəmi tən toh shimiti, ki dlili nə hwol luləgəl. Is kum banti.

⁶ Tine i'ulsisu, "Bə kumən bəntwai. Yesu mul Nazalat kənki ngauhtiya? Gunəs tolti tən gadlənngawa? Ta hilya

tidawai. Yenən lu u nes la'ti da u!

⁷ Nəgun u zəngə ki dlimi mil kushtiwasi, nə Bitlus, 'Yesu yinən ngəltikin nə mbəkəşti a Galili, tyaka ki yenənti kənə kan u nə' dlimikini u.'

⁸ I mudliyi pe'nə kitəl, uli a hwossi i asi nepti ki dli. Sa ul mulənsu ulənwai, gaki sikub banti.

I Yesu Mbəl Gawas ma' Malyamu Magadaliya

⁹ Nə Yesu hilya ge' mi'məshtu nə kyeu gascin kəkina ki shuti, im mbəl gawas ma' Malyamu ki Magadala, kəli u nə Yesu pe'kəli' mi'gatli ningi u.

¹⁰ Tine is zəga ille'dləmi mbalənyi nə, sine' Yesu tədu, ginə si du mbadli, asi kulu.

¹¹ Nəs kumi Yesu a məci ta hilya u, tima kəliy i'enti, sine sala' mbatl nətiwai.

Yesu Mbəl Gawas ma' Mil kushtiwasi Lop

¹² Kalki nəgu i Yesu bə gedli kishotı Immbəl gawasi ma' mbalən yen'lob age' mil kushtiwasi asi ləti ge' ya'kən gatlon.

¹³ I lopi paltya is dlimi na yelsəniyi nə sine' siyi, is nge nditi nə dlimtiwasən.

Kyautən u nə Yesu Bəl Mil kushtiwasu

¹⁴ Age' kale imməl gawas ma'kutl nə nəmisi, sigawasən, nəsi damti u. Immatisi tən ngela'ti mbadl-wasən nə ndiləkə gawasən, sa ndi'nə ginə yen hillya wasuwai.

¹⁵ I'ulsisu, "Zəngə ge'dəpləba, ki'dləmi mus mbalən shilən ki Lya.

¹⁶ Mus ginə ala'mbadlu, i pəlisi baptisma u, səm mbi' pe'ti. Mulnə a nge la'ti mbadlu təkən mbi' pe'twai.

¹⁷ Nən ye' ulki gagash-inti ma' mi'la'ti mbadli, nə shinyikən səppəkkəl mi'gatli, sən shilənti nə undi biyen,

¹⁸ Səmma' ka' uci nə toh, səmma' tle' byasləba, kən pəlissi ulənwai, səmma'zə' mil gottoh as ndoki."

Akan Yesu Twa lyayi

¹⁹ Ge' kalki Yesu apa pissi shilən i, is kanti twalya, iddəm tən toshipki Lya.

²⁰ I mil kushtiwasi peki, is go'ndləb shilənki Lya, a Lya go' dətl isi, is mani bali shilən u nə' dlimisi u tu'tən ye'gagashintu nəsi pəli.

Kyautən ki mi'shinkən

*Yesu shilən tən mbə ki Yal
ki mbatl ki Lya*

¹ Age Iwatbatı ki nəm, Tiyapolos, na laci atən musunnə Yesu gop pəlti nə kushti u,

² i mbəl cin u nəs kanti twalya u, kal ki ta bəl zhili tu'ma Yal ki mbatl ki Lya ma mi'shinkən u nə'shinsi u.

³ Kal ki tle bənawasi immbəl gawasi masi tən sə'mani kami tıda nə ndəlti mul naltı, ati mbə ma'si dlepdep mutti kutl kutl ləbi upsi, ati dləp shilən ki libi ki gu' ki Lya.

⁴ Age cin won, ati dap ulki dami nesi, immbəlsi zhil gu "Bəs zəga də Ulushelima pa wai, sə' mbu' njikə' ki shilən u nə mul ban pəli u, gunə' kumin abi i u,

⁵ Yahaya bo, nə mal kən tə pəli mbalən batisma, amma kal ki mutti ten nə Yal ki mbatl ki Lya kən tə' pəlikin batisma."

Akan Yesu Twa lya i

⁶ I mil shinkənwas domga ma'ti is gyemti, "Mulban, nəgun u ki' palli Islaila gunta?"

⁷ I' ulsisu: "Mat cin ko hwon nə mulban guu Lya zi' tən ndəltwasi gwakənkənwai.

⁸ Amma kən nje ndəlti in Yal ki mbatl ki Lya a suikin sudu; kən dəmitən mi' yenti nə dwaşı a Ulushelima, nə

a Yahudiya nə Samaliya, nə pa'ti ki dəp ləba."

⁹ Kal ki ta dləm gu i, i kanti twa lya atən dwadənwasən, i kukuti idlati, sa yenti nuwai.

¹⁰ Säge yallu twalya ati zə'ga, iki mbalən loppen kənngi ge' hwol luluti amalgunwasən.

¹¹ Is ussu, "Mbalən ki Galili, yalakida i' dləlni aki, aki ya'lū twalya da? Nəm Yesu u, nəs kanti twalya u, tən palti kan u nəs kanti taka də ma'kini twalya u."

A ol Matiyes i Tə' njikən Shu ki Yahuza

¹² Iki i mi'shinkən paltya Ulshelima nəs palsud tən zənga gunə də mbetti ki Zənga Zaitun, gunə nja nə gadl ki Ulshelima lə' ki mil nəm.

¹³ Nəs mbəci' u, is toge' kəpsi ki lya gunə si dəp a gibi u. Ginə mbəyi siki Bitlus, Yahaya, Yakubu nə Andalawus, Pilibus, nə Toma, Baltholomawus nə Matiyu, Yakubu yakən ki Halpa nə Siman Zaloti, nə Yahuza yakən ki Yakubu dadənu.

¹⁴ Mus is dom ga nə mbatl nəm asi shilən nə Lya, ne' mudli yen nə Maliyamu dya ki Yesu, nə yelsəni ki Yesu.

¹⁵ Age muttiyi Bitlus hillya gal adlom ki mil bətl Yesu kal (dopga ki mbaləni kutl cen nəm nə kutl ləbi lop)

¹⁶ Kini "Yelsəni ini mwani nə mudli, hwel kən tən njikən Iwatbatu gunə Yal ki mbatl ki Lya shiləni tu' bi də Dauda tədi tən Yahuza, gunə nde mi' gopti Yesu kina u.

17 Tima nəmkəni ge'mini tedi gunə olti təppəl kyaутən ki Lya ne'mini u."

18 (Nə ulnəs bəlti ki bezən kyaутənwasi, Yahuza ul lu da; a kikən tə nda nə ga, i tugwas mbutli, i mus o'twas bena.

19 I kowonngi a Ulushalima kumgu, iki is mbe ləbisi nə biwasən Akaldama, iki, lu ki hwula.)

20 Bitlus usu, "Tən gaki ki laci da ge' lwatbatı ki Zabula:

"Libi wasi nən dəmti ko'ni, bə mulən dəmgibiwai."

'Naltwasi tə mulən akami.'

21 "Nəguda, hwel kəni tən ollən mulən age' mbalən i nə ne'mini u, mus cin u nə Mulban inən Yesu də dəp ne'mini u,

22 Gopi tən batisma unə Yahaya pəli u, i mbəl cin u nəs kan Yesu dəma'mini u. Hwel kəni nəm age' mbalən gi, ti' pəl yenti nə dwadən ki hillya ki Yesu ge' mi'məshти, ne'mini."

23 Is mbo' tohtən mbalən lop: Yusupu gunə si mbeti ki Balsaba (si mbeti dadanu ki Yustus) nə Matiyes.

24 Iki is shilən nə Lya, is usu, "Mulban inən ki mul ma' mbalt ki mus mbalən. Age' mbalən lopi mbokimi tohtən gunə' oltu,

25 tə' dəp mulshinkən ki kyaутən gunə Yahuza zaki is zəga ge'lu unə mbunnitu."

26 Iki is pəl olti, i ndatən Matiyes; i mbəltən kutl nə nəm mi.

2

Mba ki Yal ki Mbatl ki Lya

1 Nə cinkə penticos mbə u, kummwasən mi'kushti asi gelu kənəmi.

2 Sige nəgu i kum otluwon sullya, kənə mbə' ki bal yetəl, i mbə i ikən libi u nə siki dəmi gibə u.

3 I uliyen kənə ləga ki bələn utu i bwasi tya tən gawasən.

4 Kummwəsən is ikən nə Yal ki batl ki Lya is gop shilən nə unndi biyen nə Yal ki batl ki Lya bəlsi u.

5 Yahudawa yen da mi' bətl zhil ki Musa, asi ki dəmi a Ulushelima, nəs pete'ge atlen ki dəpləba.

6 Nəs kum o'tilu u, i dopga ki mbalən mani, ilu hwodəli, təngaki kowonngi də kupsı asi shilən nə bishilənwəsən.

7 Iki is kum gagashinti, asi usu, "Mi' Galili də shilən u waiwa?

8 Ya lakişa musinən mi kupsı də shilən nə bi inən?

9 Mingu paltiyawani nə Madiyana nə Elamawa, mi' dəp ki atl ki Bagadaza, nə ki Yahudiya nə ki Kapadokiya, nə ki Pantas nə ki Asiya,

10 nə ki Pilijiya, nə ki Bampiliya, nə ki Masal, nə kuma yanki Kulane ki atl ki Libiya nə səmbəlsi te' Loma, wato mi ginə zəmi ge' bətl Lya ki Yahudawa, nə mbalənyi nə tege' bətl Lya undi ki Yahudawa u,

11 nə Kalitawa nə Lalabawa, mus mi kupsı də shilən ki bas ləba ki Lya nə bi kige' gatlinən."

12 Mus is kum gagashinti, is hwodəli, is gop gyep yelsəni, "Yakən ngu?"

¹³ I gyen, ngayisi shilən is usu, "Mal ki innabi si tle iye."

I Bitlus Shilən nə Mbalən Dibəli

¹⁴ Iki i Bitlus hilya nə kutl nə nəm mi, i' tləl Yal i' shilən nə dibəl mbałən, i' usu, "Yelsəni ini Yahudawa nə mus mi' dəp a Ulshelima, hwe ta pikin shilən u; gakən kəm ki zeki tən ulnə ta dləmi u."

¹⁵ Mbałən yi sə tle mal ki innabiwai, kan u nəki zitini uwai, nəgun dom ki nətapsi katl kinəkyau!

¹⁶ Guki ulnə Joyel mul nje shinkən ki Lya shilən tənki u ti usu:

¹⁷ " 'Age pa'ti ki dəp ləba, Lya usu,

anbine' mus mbałən Yal ki mbatl ki Lya sudi.

Millwakən mwani nə mudli sən shilənti nə ndət ki Lya,

tlu'ti nən mbi mil giđənsiwakən, kolsiwakən sən tlu'ti.

¹⁸ Nəguda, ge' muttu zhelsi ini mwani nə mudli anbine'si Yal ki mbatl ki Lya sudi sən shilənti nə ndət ki Lya dadanu.

¹⁹ Anpəli'si ulki gagashinti a lya, nə lwadi su'atli, iki hwula, nə utu, nə hillya ki cil.

²⁰ Kapən mbə ki Mulban bal-cin mul naltu, cin nə patl dəpshal lyi nən patl hwula.

²¹ Age' cin u nən dəmti mus mulnə mbe' shin ki Lya u tən mbi pe'ti.' "

²² "Kini yelsəni ini Isla'ilawa gakən kəm tən shilən u: Yesu mul Nazalat gunə Lya kəni ma'kini tu tən, pəl ulki ki gagashinti, nə ulki ngaptibi nə lwadi, gunə Lya pəli ge' kini tumati, gunən yeninini nə dwadəwakən u.

²³ Mul gu, Lya nə gawasi ti bəlkinti a toh wakən nə kan u nəs zi nə mantiwasi nə ndə'twasi, kini nə dəlkı mil bezən ləba, ki tolinti tən gadlənnga i' tloti.

²⁴ Ngonə nəgu i Lya tləlti də ge' mi'məşti, təngaki mushti aman ngaptiwai. Lya tləlti də ge' mi'məşti, təngaki mushti aman ngaptiwai.

²⁵ Dauda shilən tənti i' usu: " 'Ko gaswukəni Mulban ak-inə ini, tən toh shimtini, tən gaki ba wuni.

²⁶ Təngaki nəgu mbatlini də hwoltugi, ləga ini də utl ulki hwoltugi, dli ini nən dəmti nə lati mbatlı,

²⁷ təngaki nəgu tikən zati dli ini age zudiwai, ki kən zati mulguntwagi apboswai.

²⁸ Tən la'ti aman shitu ki mbadli. Tən ikəntən nə hwoltugi akinawasi.'

²⁹ "Yelsəni ini Isla'ilə, amma' pi'kin shilən bənə catl mbadlwai atən bwas ki bwasinən Dawuda. Dawuda ta məci, akupti. Zudiwasi ama'mini hal nəguni.

³⁰ Amma ti mul njeshinkən ki Lya kəni timanini Lya apəli' ndə'ti nə ndaltannaca, tən

zə'nəm ge' gəswasi tən guntwasi.

³¹ Tun tedi Dawuda a yenini, i' shiləni tən hillya ki Almasihu də ge' mi' məshti, təkən zatiti age zudiwai, dliwas kən bostwai.

³² I Lya tlilti Yesu də ge mi' məshti, mussinən dadanu mi' yenti nə dwaðən kəni.

³³ Ngo nənəgu a nalti tən tohship ki Lya i, ta nje Yal ki mbatl ki zoki mul gunti ma bwasi, kan u nəppəl ndə'ti, tin bina' Yal ki mbatl ki Lya tən ga inən, i mbəl ulnə yenini u nə ulnə kumini u.

³⁴ Dawuda tolyawai, tinə gawasi, i' usu,

"Mulban ul mulban isu,
"dəm a tohshimtini,

³⁵ Sai nə ala' mi'ngeki
agəs asən wagi."'

³⁶ Tən gaki nəgu, mus Isla'ilə sənmanica Yesu u nə' tolți tən gadlənnə u, Lya apalti mulban nə Almasihu."

³⁷ Nə mbalən kumi nəgu u, i shilənisi tənisi mbadli, is ul Bitlus nə na mi'shinkən usu, "Yelsəni, yakən tən pəlini?"

³⁸ I Bitlus pisi, "Zakən pətl bezən ləba a pəlikin Batisma, kowonngi, ge' shinki Yesu Almasihu tən ti' paci kin bezən ləbwawakənda. Kən mbi bəlti ki Yal ki mbatl ki Lya ki zoki.

³⁹ Ndə'tu kini pəli kini nə milwakən nə ginə lolu, nə mus ginə mulban Lya nən mbessibi u."

⁴⁰ Nə shilən mul dibətl kən ti dəlisi kəm; i' matisi, "Pekələn gawakən dəge' besən hwon ki nəguni."

⁴¹ Ginə kum shilən u ipəlisi Batisma, ge'cin

u mbalən zangu maki mbəltənsi.

Dəp ki mi'bətl Yesu kal

⁴² Is ga'kəm, tən kushti ki mi' shinkən də pəlti u, asi ma'ga nə yelsəni, asi damti gelu kənəmi, asi shilən nə Lya.

⁴³ Is kum banti, nə ulki gagashin nə lwadı nə Lya pəli ma mi' shinkən u.

⁴⁴ Mus mi'bətl Yesu si ge'lu kənəmi mus ləbwawasən ge'lu kənəmi.

⁴⁵ Is ul ləbwawasən takə nə nisida u asi bwasi' yelsəni wasən ulpisi ginə bənisi dawai u tən lyamtiwasən.

⁴⁶ Ko gasiwukəni si dopga age' libi ki Lya nə mbatl nəm. Asi dap ulki dami a libiwasən ge'lu kənəmi, si dapti asi tleti nə hwoltugi, nə ndəti ki mbatlı.

⁴⁷ Is dəmshot si ngep Lya asi mbi hwol hwula ma mbalən. Ko cin u kəni a Lya də mbəl dibəltwasən tənki ginəs pe'tu.

3

Bitlus Ndokəl Dakəl mul Ngəplu

¹ Gasiwon Bitlus nə Yahaya silə' libi ki Lya cin ki shilən nə Lya, dom ki maki ki cin su'ti.

² I ki mulən kən ngu gunəs zə'ti dakəl, si mbəltti a bidlabi libi ki Lya guni də mbe'ti zeki, aləbi si zə'ti ko anəmi də ngeplu ma' ginə də te'ge libi ki Lya u.

³ Nə'yen ki Bitlus nə Yahaya u də te'libi ki Lya u. I' ngemsi də ulpi.

⁴ I Bitlus utti' dwaðən, isi Yahaya. I Bitlus usu, "Yami!"

⁵ I mus i' ga'kisi kəm, nə lati mbatli ki mbi ulən ma'si.

⁶ I Bitlus usu, "Upbo ni dawai, tən gaki nəgu ulnə ni da u ita bəlki. Ge shinki Yesu ki Nazalat, daki lə."

⁷ I ki i Bitlus ngap tohwasi ki tohshmti, i' tliltilya, nə dleuti asənwasi nə Yal asənwasi i ndəli.

⁸ Nə dleuti ippe'lya tən asənwasi i' gop ləti. Illə libi ki Lya ne'si, ati ləti nə pe'ti lya də natl Lya.

⁹ Nə mus mbałən yenti də ləti ati natl Lya u,

¹⁰ Is manti tikusə dəb abid-labi libi ki Lya də ngeplu, is ikən nə ulki ngaptibi nə ulki gagashinti atən ndo'twasi.

Shilən ki Bitlus a ge'libi ki Lya

¹¹ Amuli də bətl ki Bitlus kal nə Yohanna, Mus mbałən mbə nə kitəl ma'si age' libi ki Lya gunə si mbettikə lu shu'ti ki Sulemanu u, asi ngapti bi.

¹² Nə Bitlus yen gu u, i' ulsisu: "Yelsəni ini Isla'ilawa, yalakida ullu də bətlkin ngaptibida? Təngaki yakən ki ya'mida nəgu, ki yenti ndətinən ko bətl Lya inən kən laki i mulu lə'dfaya?

¹³ Lya ki Iblahim, nə Ishaku, nə Yakubu, Lya ki mi'zə mi'zə'mini, innal zheliwasi Yesu. I ngeti a kina ki Bilatus, nəl lyami təs za'tu, gunə' bələnti is tloti.

¹⁴ I' ngeti mulguntu nə zo'mbatlu i' ngemini sə' zakikin mul tlo mbałən u.

¹⁵ I' tlo gəs ki mbadli, iki i Lya tləti də ge' mi' məshti. Nəgu mi yeni ndatən dwadən inən.

¹⁶ Nə la'ti mbatl ge' shin ki Yesu, mulu nə' yenintu, nə' manəntu, mulnə bəlti ndəltu tiki Yesu, nə la'ti mbatl nə shinwasi tu'mati təmbi ndokəl ti mul gu nə muswakən ki yetti u.

¹⁷ "Nəgun, yelsənə ini Isla'ilə amani ge' ləshi ma' ulənkən ki tloti da kan u nə mi'kina wakən pəli u.

¹⁸ Ngonə nəgu Lya a ikən ulnə' dləmi tun te'dfu abi ki mus mi'nje shikən ki Lya, də usu Almasihu wasi tən tle' bəna.

¹⁹ Zakən pətl bezən ləba, a' palnitai ma Lya, təngaki tə' santikin bezən ləbawakənda, an ndəllikin mbadli,

²⁰ i'shin Almasihu, gunə' olıkini u tun te'dfi, tiki Yesu.

²¹ Hwelkən tə Yesu dəm twa lya hal gasi u nətə Lya patl mus usi pyale u, nə Lya dləl shilən tun te'digi abi də mi'nje shinkənwasu.

²² Musa usu, 'Mulban Lya wakən nən tləli' kin mul njeshinkən ki Lya won kənə ami age mbałən wakən; hwelkən ki gakən kəm tən mus ulnə ti' pikini u

²³ Mulañə a nge gakitti kəmu nən pe'kəlti də ge' mbałənwası.'

²⁴ "Nəguda, i gopi tun tən Sama'ilə, i lətən ginə mbə kali is shilən tən mutti.

²⁵ Kini ki gəskə mi'njeshinkən, kini ki mi'nje ndəti nə Lya pəli mi'zə'mi'zə'kini. I' ul Iblahim su, 'Tu'ma'gəs ki mbałən wa'kən mus mbałən mi'dəp ləba nən mbin nalti.'

²⁶ Nə Lya a tləl zheli was sufu, makini tishinti pa, tə zikin toh ki patl kowonngi tet

taka də tən shitu ki dashti ki tugi."

4

Sə təla ki Bitlus isə Yahaya abidla də mi'dlətl shilən

¹ Ləbasi, nə mi'kina ki butti dlabi ki libi ki Lya nə Sadukiyawa is mbə ma' Bitlus nə Yahaya asi ge' shilən nə mbalən.

² Is lyau mbadli nə mi' kushti ki Yesu təngaki si kulci' mbalən, tən hillya ki Yesu ge' mi' məshti.

³ Is gop ki Bitlus nə Yahaya is idłasi sai nə lu acili təngaki su' kən bali.

⁴ Amma ginə kum shilən ki Bitlus is ndə'nənali u; dibəltwasən sa təla zangu nantam.

⁵ Lu cilisi mi'kinawasən nə kolsiwasən nə mi'bətl lashti zhil ki Musa is ma a Ulshe-lima.

⁶ Nə Hanana balləba ki Lya ti aləbi nə Kayapa nə Yahaya nə Iskandali nə mus gəskə ki bali ki bas ləbasi ki Lya,

⁷ Nəs mbəl ki Bitlus nə Yahaya akina u is gop ngepsi: "Nə ndəltu kəni ko nə shin u kən, ki pəltin nəgu?"

⁸ Bitlus, ki ikəni nə Yal ki mbatl ki Lya, i' ulsisu: "Kini gumsisi nə kolsi!"

⁹ Ki takimibi asəti tən ki ngepmənmi tən ze' ulnə pəli dakəl mulu nə tu' imi kəntəndoda,

¹⁰ manənngu, kinə mus mbalən ki Isla'ilə: Mul gu nə ki dləli kinawakən ki ndoki u nə shin ki Yesu almasihu Mulnazalat, gunə tolənti tən gadlənnga u guni Lya tləti də ge' mi'məshtu,

¹¹ Yesu tiki,

"Zənnga gunə kini mi'kəpbi
nge u,
iddəm zənnga ki zoki ki
kəpbi."

¹² Peti kən mbidli ma mulun-wai, kuma shinwondawai guni bəldli a lya nə atlı nə ge' mbalən adəpləba hwel ma'ti tənmbi peti."

¹³ Nəs yen ndətl ki mbatl ki Bitlus nə Yahaya u, is mani sa pəl lashtiwai, mi'ləshi usun kəni dadanu, is kum ngaptibi is mansi mbalən gi tedi ne' Yesu sida.

¹⁴ Amma nəs yen mulnəs ndokəltu ki dləli nesi u, is hwol ulki dləmi.

¹⁵ Ngo' nənəgu is bəlsi zhil ki sə'peki də bidla nə sə'shilən nə yelsəni u,

¹⁶ is usu, "yakən tən pəlin nə mbalənyi? Mus mi'dəp a Ulshelima sə mani sa pəlin ulki gagashinti, tu'im i kəntən pəlin nə mbalən i u məkən ma'ussu sa pəl ulən wai.

¹⁷ Amma təngagi ba ulisi mbəl du'tənki ge' mbalən, tən dələsi kəm bəs shilən nə mulin a ge' shin u nuwai."

¹⁸ Iki is takisi bi te' dadanu is dəlisi kəm bəs shilən ko kushti ge' shin ki Yesu nuwai.

¹⁹ Amma Bitlus nə Yahaya is pallisi shilən is usu, "Shilən ki Lya kən tən bəliya ko gwakən? Dambələn kini.

²⁰ Mibo, məkən ma'dəb shot tən ulnən yeni u nə ulnən kumi uwai."

²¹ Kal ki samatisi i, is za'si, təngaki sahwol kan u nə si'hwotisi ishda u i təngaki mbalən, mus malən si natl Lya təngaki ulnə nda u.

²² Mul gu nə pəli' ulki

gagashinti ki ndokəltu ta bəl hwon kutl ləbi upsi kali.

I mi' bətl Yesu kal Shilən nə Lya

²³ Nəs za'ki Bitlus nə Yahaya u, is ləma' mbałənwasən, is palisi shilən u nə ləbasi ne' mi'kina pisi u.

²⁴ Si dādanu nə kumti nəgu, is tləi yali musswasən nə mbatl nəm asi shilən nə Lya, is usu, "Lya mulnaltı," ki pəl lya nə atlı nə bal mali, nə mus ulnə givi u.

²⁵ Ki shilən tu'ma' Yal ki mbatl ki Lya nə tubi ki zheli-wagi, bwasinən Dauda

"Yalakida ginə bə Yahu-dawawai u imbatl lewisi? Mbalən dādanu is dambəl ulnə da baliwai u?

²⁶ Gumsi ki dəp ləba is kəndə gəski dlati, Mi'kəndədlom is maga, is nge Lya, nə Almasi-huwası dādanu."

²⁷ "Bali nəguda Hildus nə Buntus Bilatus sa maga i age' gatlu ne' ginə ba Yahudawai u nə mbatl ki Isla'ilə si dutu' nə Yesu zheli wagi mul guunti, gunə' palti Almasihu'u.

²⁸ Sa domga i təngaki səppəl mus ulnə kəndə tən ndəltwagi nə lyamtiwagi tənda u.

²⁹ Nəguni, Lya, yani si lyap hane'mi kyautən, bətl zhelisi-wagi ndətl ki mbadli ki dləp shilənwigə nə ndətl ki mbatl,

³⁰ ta' tohwagi ki ndokətl mbałən, apəl ulki gagashinti nə lwadi tu'ma' shinki zheli-wagi guu Yesu."

³¹ Kalki sa shilən nə Lya i, lu u nəs domga u igo' nyapti. I mus is ikənsi nə Yal ki mbatl

ki Lya, is gop dləp shilən ki Lya bə nə bantwai.

Mi'bətl Yesu kal la' Koyan-ningi wasən idəm Nəm

³² Mus dopga ginə də duk nə Yesu u, ko yangiwasən nəm kənə, mbadlwəsən nəm, mulən da tə' usu ulkə tohwasi gwaskən nə gwaswai, koyangni mus gwasən kənə.

³³ I mi'shinkən ndakina nə dləmi'mbałən dādanu tənpatl ki Yesu kami ndə'ti ki shilən mul ndəlti tən hillya ki mulban Yesu ge' mi'məshti. Ulkə zo'ki mul nalti tən kowon ngi ge'si,

³⁴ hal ma mul hwol ulən da ge'siwi, təngaki mus mi'gu ko libi sa ulitaka i, is mbəl ulpisi,

³⁵ is zi' akina də mi'shikən, i bwasi kowonngi nda'ce nə ulkipəliwasi.

³⁶ Age nəgu iki Yusupu, mul Balawiye, gəswasi mul ki tsibilin Kublus, gunə mi'shinkən də mbetti ki Balnaba, (ikə mul ndətl mbadli),

³⁷ i' ul guwastaka, immbəl ulpisi i'zi akina də mi'shikən.

5

Hananiya nə Sapilatu

¹ Amma mulən mul shin Hananiya, nə kəliwasi Sapi-latu, i' ul ulən ginə niddə u takə.

² Isə' kəliwasi is hwundəl nami age' ulpisi, iki is mbəl na ulpisi akina də milshinkən.

³ I Bitlus usu, "Ki, Hananiya, tu' imi kən Shaifa ikkən mbatlwagi, hal i ləge

Yal ki mbatl ki Lya, i' hwundəl na up ki gu wa'da?

⁴ Nə'uli taka u bo gu i bo gwa'kən waiya? Kal ki ka uli taka i dadanu, ulpsi gwakən waya? Yalaki i' dambəlkı i' pəl unndi uluda? Mbalən kən ki ligesiwai Lya kən ki ligeti."

⁵ Nə Hananiya kum gu u, i' nda atli aləbi aləbi imməci. Mus ginə kumi u, i bal ba' gopsi.

⁶ I giðənsiyen tləte'di, is kan hwuni is lati ge' lumutti is gadəlti, is kanti is pekəlti taka, is le' guti.

⁷ Kal ki cimbəlti ki dom maki i kəliwasi tetedfi, bənə ma' ulnə nda uwai.

⁸ I Bitlus ul kəli su, "Dləmini, nəgu ki ulən gu u takawa?" Iki i' usu, "e nəgumi."

⁹ I Bitlus ultisu, "Tu' imi kən ki manən bi ki cimbələn Yal ki mbatl ki mulban da? Kum lə' ki ginə gwu' mwaniwagu, hal sambəci dlabi i, sən ka'ki, as pe'nə hwunwagi."

¹⁰ Aləbi aləbi in nda a kinawasi imməci. Nə milgiðəsi i tetedfu, is mbiti məci, is kanti is pekəlti taka, is guti ma'mwaniwasi.

¹¹ Iki i bal ba' gop Ikilisiya musswasən, nə mus ginə kum shilən ki usi nə nda u.

Milshinkən ndokəl mbalən dibəli

¹² Milshikən pəl lwadi nə ulki gagashinti mul dibəlti age' mbalən. Mi'bətl Yesu kal musswasən nə mbatl nəm kən si mati age lu shu'ti ki Sulemanu.

¹³ Amma age' na mbalən gon apəl ndətl ki mbatl ki te'

ge'siwai, ngonənəgu mbalən də natlsi.

¹⁴ Mus nənəgu mi' ndə'ti nəti mwani nə mudli mbəttin ki sida ngətl ki kali.

¹⁵ Hal atala gunə si pekətl mi'gonti tən bishitu də latisi tən lumutti ki dom nə lumutti təngəki Bitlus bal beutu ko gwasənwas ma abəli tən nami wasən.

¹⁶ Mbalən bo is gop dopga te'ge' gatlen nə ki gandəli nə Ulshelima u, is gop mbətl mi'gonti nə ginə dumı'gatdli də hwottisi u, musswasən is ndoki.

Milshinkən də tle'bəna

¹⁷ Iki i bal ləba ki Lya tləte'lya, nə musginə ne'tu, nə mi' dalika ki Sadukiyawa, si kub dutu' iye,

¹⁸ is gop milshinkən yi, is la'si gelu kəndə'mbalən.

¹⁹ Amma age' gasi iki mul nje shinkən ki Lya kən ngu i' ʃub'bul dlabi ki lu kəndə'mbalinisi, i' pekəlsi tosfı, i' ulsisu,

²⁰ "Zən ga, a' dləlni age' libi ki Lya, adləmi mus mbalən pyal shitu ki Lya."

²¹ Nəs kumi nəgu u, is tege' libi ki Lya nə kyau, is go' kulci mbalən. Nə bal ləba ki Lya ne' ginə si ne'tu mbə u, is taki mi' dləl shilən bi, nə mus mi'kina ki Isla'ilawa, is ta shinkən tyə ge'lü kəndə'mbalən səm mbəlsi.

²² Amma nə mi' kənndə dlom mbəkəci ge'lü kəndə'mbalən nisi u, sa mbisi ləbiwai. Iki is paltefi' is palsi shinkən,

²³ Illə illembi lu kəndə'mbalən mbatl lyewisi iye, asi lyamti nisi ki idle, mi' butti dlabi sikə dlili abi dlabi, amma nən bəli u, ma mbi mulən agibiwai."

²⁴ Nə mi' kina ki butti dlabi ki libi ki Lya nə bas labasi nəs kumi nəgu u, is hwodəli iye tən gawasən, yakən tə ulu mbəlli.

²⁵ Iki i' mulən mbə i' usu, "Yanini! Mulu nə' lakənti gelu kəndə'mbalən u si ngi ki dləli a libi ki Lya, si kulci' mbałən."

²⁶ Iki i mul kina ki mi'kəndə'dlom nə mil kyautən wasi is lə is mbəl milshikən nisi. Sa shimsi nə ngeswai gaki si bulti ba mbałən la'si nə zənnga.

²⁷ Nəs mbəl milshinkən isi abidla shilən u, is dləlsi akina də mi' dləlshilən. Iki i bal ləba ngemsi,

²⁸ i' usu, "Ma ndəlinkin kəm bə kulcin ge' shin u waiwa, in ngu kushtiwakən a dutya Ulshelima i, hal kilyamti ki zimi alhaki ki hwula ki mulu aga inən."

²⁹ I Bitlus ne' mi'kina is pallisi is usu, "Hwelkən tən kumi Lya bi ngətəl mbałən.

³⁰ Lya ki kolsisi inən ta tləl Yesu i, gunə tən gadlənnəngə ki tlwotu.

³¹ Ti Lya nalti a toh shimtwasi, mul kina nə mul pe'kətlə mbałən, təngaki tə' bəli Isla'ila dlabi ki pe'ti də ge bezən ləba i, as mbi pashti ki bezən ləbwəsən də dadanu.

³² Mi bo mi'yənti nə dwudənwas kəni atən usi, nəgu dadanu Yal ki mbatl ki Lya, gunə Lya bəl ginə də pəlitti kubbi u."

³³ Nəs kumi nəgu u, iki i

mbatl lyewisi iye, asi lyamti kənə sə' tlosi.

³⁴ Amma mul Palise won mul shin Gamaliyal, mul kushti zhil ki Musa, gunə mus mbałən də natlti, i' hilya age' ludlətlə shilən, ibbəl zhil ki sə' pyakəl mbałənisi swadla pa.

³⁵ Aki kən tə usu, "Kini mil Isla'ilawa, pən demdem tən ulnə ki lyamti ki' pəli mbałən gi u.

³⁶ Hwon u nə bew u i mulun mbə, kise ti Tudas, ti patl gawasi ulən, mbałən kutl cen kutl ləbi upsi də bətləti, amma i tloti, i mi' bətləti dla'ga, is koni.

³⁷ Kalwasi dadanu, imulən mul Galili mul shin Yahuza mbə age' hwon ki bətl mbałən, illa dibəl mbałən də bətləti. Tima is tloti, mil bətləti mus is dla'ga.

³⁸ Təngaki nəgu, ulu tən ki ami pi'kin shilən, zakən mbałən sə zəga, in ulnə si lyap pəlti u ko kyautən wasən ki mbałən u, nən dlatiga.

³⁹ Amma in ki Lya kən u, kikən ma'dləl mbałən iwai. Seko ki' dəmni mi'nge'ulnə Lya pəli u."

⁴⁰ Iki is bəlshilən ki Gamaliyal, is taki milshinkən nisi bi is te' gibə is li'si. Is matisi bəs saka shilən ge' shin ki Yesu u nuwai, is za'si is zəga.

⁴¹ I' milshinkən nisi hilya is peki a kina ki mi'dləlshilən, nə hol tugi təngaki sayeni i sakəmi sə' tle bəna təngaki shin ki Yesu i.

⁴² Hu cin u kəni, a libi ki Lya nə a libi nə libi, saza' kulci' mbałən shilən ki Lya

wai, si ussu Yesu tiki Almasihu.

6

Otl mbalən Ninngi Mi'pətəl Kyautən

¹ A ge' muttu nə mi'kushti də mbətlənki u, iki Yahudawa mi' kup Helinanci is gob nalən tən Iblaniyawa təngaki səda bətl mudli ginə mwani məcisi u ulki dəmi wai, kənə ngen wai, a ge' lu bwasti ulki dəmi ki ko cin u kəni.

² Iki kutl nə lopi is taki mus mbalən mi'bətl Yesu kal bi, is usu, "Ambuni, tənza' dləb shilən ki Lya wai təndəm tən shilən ki ulki dəmi katla wai.

³ Yelsəni mwani nə mudli, olən mbalən nənngi a ge' kini ginə' manənsi u səkə njikən nə Yal ki batl ki Lya nə ma' ulən, ginə tən bələnsi kyautən u.

⁴ Mini an bələn mba dlinən tən shilən nə Lya nə kushti shilən ki Yesu."

⁵ Ulnəs dləmi u i mus təmi mbalən bi, iki is ol Istipanus, mulnə ki ikəni nə la'ti mbatl u nə Yal ki mbatl ki Lya mul gunti nə Pilibus, nə Bulokolas, nə Nikanal, nə Timan, nə Balminas, nə Nikolas mulkə Antakiya gunə tedə ittege' at-dini ki Yahudawa u.

⁶ Gi kən si mbəlsi kina ki milshinkən. Kal ki sa shilən nə Lya i, is zisi toh.

⁷ Shilən ki Lya mbəl tənki da, dəbətl ki mi'bətl Lya ge' gatl ki Ulshelima mbətl tinki da iye, ləbasi mi'dibəlti iye is ndə nə la'ti mbadl tən Yesu.

Agop Istipanus si

⁸ Lya bəl Istapanus, ze'ləba wasi nə ndəlti, ki pəl ulki

gagashinti mul nalti nə lwadi a ge' mbałən.

⁹ I genge' ginə pe'to' ge' ginə mbi gawsən. Sə pe'to' ge' gatl ki Yahudawa ki Sayilin nə Aleszandaliya, nə atl ki Silisiya nə Asiya, is gob shotibi ne' Istipanas,

¹⁰ Amma ko ten sa mbə'ci sə'sho' bi ne'twai təngaki ta pəl shilən nə malləba i, nə Yal ki mbatl ki Lya də dlotiti.

¹¹ Is hom mbałən ki hwundəli, si usu, "Mə kumi Istipanus də byatlı' Musa ati konnə shinkə Lya."

¹² Nənəgu is tləli mbałən mbadli nə kolsi, nə mi'bətl lashti zhil ki Musa, sine is nde' ga, is gopti, is mbəlti a kina də mi' dlət shilən.

¹³ Iki is mbəl mi' dləb ulnə bə sayeniwai u, is usu, "Mulu tədə bwastiti nə dləp du shilən tən libi ki Lya u wai, nə kushti ki Musa,

¹⁴ tən gaki mə kum Istipanus ti ussu Yesu mulnazalat nən batti lu u, at shot ulnə Musa zaki mini u."

¹⁵ I mus mbałən ki bidla i is uti' Istipanus dwadən, is yen kinawasi kənə ki mul shinkən ki Lya.

7

Shilən ki Istipanus akina də mi'dləl shilən

¹ I bal ləba ki Lya ngem Istipanas, "Gu nəgu dəya?"

² Istipanas usu: "Yelsəni ini nə mi'kina, gaki nən kəm. Lya mul nalti i' mbəlgawasi ma' mul zəmini Iblahim, age muttu nə ti a Bagadaza u, bə ta dəm a Halan uwai,

³ i' Lya ultisu, 'Hilya də ge' atlwakən, nə dəge' yelsəniwagi, ki ləge' atlu nə ta mboki toh tənki u.'

⁴ Iki i' hilya də ge' atl ki Kaldiyawa, i' dəm a Halam. Tyaka dadanu, kal ki məshти ki bwasi, i Lya bəlti atlu nə nəgun kini ki dəmi aləbi u.

⁵ Amma Lya a bəlti, na' atl ko ki zi' asən wai aki, iki i Lya pəlli' ndəti ge' kalwasi tən bəlti atlisi də gwasi, ge' cinisi amma Ibilahim yakən ni' dawai.

⁶ I Lya shilən nə Ibilahim: 'Gəswasi sən dəmti səmbəlsi ge' gatlu nə bə gwasən kən wai u, mbalən kige' gatli nən patlsi zheli as hwotisi bəna hal hwon kutl cetl upsi.'

⁷ I Lya usu, 'amma an hwoti atlu nə palkin zhelu u bezən ləba,' kalki nəgu sən pe'ti də ge' gatlu as nallən agelu u.'

⁸ Ta pəli Ibilahim ndəti ki səlkən. Nə Ibilahim zə' Ishayaku u mutti usəpsi nə zə'ti is səlti. I Ishiyaku zə' Yakubu, i Yakubu zə mi'zə'mini kutl nə lopi.

⁹ "Mi'zə'miniyi ne, təngaki si dutugi nə Yusupu, is ulti taka, i talati Masal. Amma Lya nə ti,

¹⁰ i Lya pe'kəlti də ge' mus bənawasi. I' bəl Yusupu ma'ləba nə hwol hwula ma pil'auna Gu ki Masal. Ti Pil'auna ne i' palti mul gunti ki Masal, i kan mus mbalən ki libiwasi.

¹¹ "Iki, i kuzən nde mus atl ki Masal nə Kan'ana, təngaki bezən bəna u, hal mi'zə' mi'zə'mini is hol ulki dəmi.

¹² Amma nə Yakubu kumi alkama da a Masal u, lə'ki nən i' shin mi'zə' mi'zə'mini.

¹³ Də lətwasən ki lop, i Yusupu bulisi gawasi ma' yelsənwasi, i Pil'auna man mbalən ki Yusupu.

¹⁴ Iki i Yusupu shinshinkən tən Yakubu bwasi tən mbə, nə mus yelsənwasi, mbalən kutl kutl ləbi ningi nə namtam.

¹⁵ Iki i Yakubu lə Masal. Ti ne' mi'zə' mi'zə'mini a tya ka si məci.

¹⁶ Iki is yem hwun wasən te'di is palsi tya Shekem, i la'si ge zədi u nə Iblahim uli nə upki azulpa ama' mil ki Hamol aki a Shekem.

¹⁷ "Nə cin ballı Lya nja tə' ikəni Iblahim pətl ndətwasu, dəbətl ki mbalən nisi a Masal a mbəltənkiyi iye.

¹⁸ I ki i pəl pyal guu won a Masal, gunə bə'man wokən ki Yusupu wai u.'

¹⁹ Guu u ta tlə dlə' mbałənyinən i', ati hwoti' mi'zə'mini ishi ati la'tisi sə' la' hwal mil gunə zəsi u taka.

²⁰ "Age' muttisi sə zə Musa, yakəni mbunini. Lii maki a də ngaptiti a libi də bwasi.

²¹ Nə zəti a dla u, yakən ki Pil'auna yakənkəli it kanti it kyetəlti kəni yakuwası.

²² Iki i kulci Musa mus ma' ləba ki Masalawə, ti kuma mul ndətl kəni age' shilən nə kautənwasi.

²³ "Nə Musa pəl hwon kutl ləbi upsi u, i' kəndi a mbatlwasi tə le' ya mbałənwasi, Isla'ilawa.

²⁴ Nə' eni si hwoti yelsewas ishu, iki illə də dəttli i' li' mul masali im məci.

²⁵ Musa də ziti mbalənwəs mani tu mati tə Lya pəl kautən ki pekətsi, amma sima niwai.

²⁶ Lu cili nə Musa mbə ma'lū u nə mi' Isla'ilawa lop də dlatu. Il lyami tə masi tən shitu ki ussu, 'Kini mbalən kənəmini yalaki ki lyap kumi' yelsəni ciwo da?'

²⁷ "Amma mulnə kumi yelsewas ciwo u i' jakən Musa i' ussu, 'Wokən laki də gunti nə pətl shilən tənmi?'

²⁸ Lyamti kiða ki tloni kənə gunə tlo mulmasal a hwudwa?"

²⁹ Nə Musa kumi nəgu u, i' kitəli ippəl dəpkı səmbəl tya Madayana, ge'lu u tə zə mil mwani lop.

³⁰ Kalki hwon kutl kutl ləbi upsi, i mul nje shinkən ki Lya mbə ma Musa ge bələn utu, ge dəlgən nja nə zənga Sinai.

³¹ Nə Musa yen gu u, i' kum gagashinti nə unnə yeni u. Nə' sha'tya də yati u, i' kum yalki Lya də usu,

³² 'Ami ki Lya ki mul zə' mulzə' ki, Lya ki Iblahim nə Ishayaku nə Yakubu.' Iki i dli ki Musa gop nyapti, ta pətl ndətl ki mbatl ki yatiwai.

³³ Iki i' Lya ultisu, 'Tus kapptilanwagi lu u nə kiða ki dləli u, lu mul gu'kəni.

³⁴ Balini, a en bezən ləba u nə si pəli' mbalən i'ni ki Masal u i, a kum kuluwasən i ki kup dli, a pe'sul lya i təngaki ta pekətsi. Nəguni, mbə ta shinki tya Masal.'

³⁵ "Ti Musa u nəs ngetu asi ussu, 'Okən laki də mul kina inən nə mul pətl shilən?' Ti Lya nə gawaskən shinti

sufi tə dəm mul kina, nə mul pekətl mbalən, tuma' mul shikən ki Lya u nə mbə mati age dəlgən ge' bələn utu.

³⁶ Ti pekətsi də Masal, kalki pətl ulki gagashinti nə lwadi a ge' atl ki Masal, nə dəkəshti gəu dləlka, nə hwon kutl kutl ləbi upsi a ge dəlgən.

³⁷ Guki Musa u nə ul Isla'ilawa usu, 'Lya nən tləli'kin mul nje' shinkən ki Lya ge' yelsəniwakən kəni ami.'

³⁸ Ti ne'kini u age dəlgən, nə mul nje shinkən ki Lya u nə shilən nəti, tən zənnga Sinai u, ne' mi'zə'mi'zə'mini dədanu. Ti kan shilən mul bətl mbatl summa Lya im mbəlli mini.

³⁹ "Amma mi'zə'mi'zə'mini nge bəli'ti, is ngeti i mbatl-wasən pal tya Masal.

⁴⁰ Is ul Haluna usu, 'Pəlimi lya gunə tən ndemi kina u. Tən gaki Musa u, nə' pekəlmi te' Masal u, məman unnə ndanətəwiwai.'

⁴¹ Age' cinisi iki is kən yakən tla. Is mbəli' hadaya is pəl hwoltuki nə kautən u nəs pəli nə tohwasən u.

⁴² Təngaki nə gu i Lya bəlsi kal, is zasi də bətl cin nə lyi nə cadləl. Kan u nəða ki laci ge' lwat bati ki mi'njeshinkən ki Lya u, i' usu,

"Kini Mbalən ki Isla'ila ami ki mbəllinən hadaya ki tlu ki ban hwon kutl kutl ləbə upsi ge' dəlgənya?

⁴³ Ai, du'ni nə kəs ki Molek nə lwa' cadləl ki Lapan, lya unə pəlini aki ngepti u.

Ami ne am patlkin tya kina
də Babila.'

⁴⁴ "Mi'zəm'i'zəmini si nə libi
ki Lya amasi age' dəlgən.
Gunə pəltli kan u nə Lya pi
Musa u, kənə kan u nə' eni u.

⁴⁵ Kal ki nje libi ki Lya,
mi'zəm'i'zəmini mbi is mbə
nənali ge' atlu ge' hwon ki
Joshuwa, kalki sa kan atlisi
i mbalən ginə Lya katsi tən
duwadənwasən u. Libi ki Lya
u da i mbəl hwon ki Dawuda,

⁴⁶ gunə mbi holhwula ma'
Lya u i' gyemi tə pəlli Lya ki
Yakubu libi.

⁴⁷ Amma Sulemanu kən
kən'i' libi nisi.

⁴⁸ Mus nə nəgu mul nalti
tən da dəp ge' libi i nə yakən
mbalən kəni nə tohwai. Kan
u nə mul nje shikən ki Lya
dləmi u:

⁴⁹ Lya usu,

"Twa lya kən ki lu dəptini
ki guntini, a atl kən ki
luzə' asən ini.

Unndi libi u kən ki
kənənəni?

Ko kuma awu kən ki
lushutini?

⁵⁰ Ami nə gayikən a pəl usi
wai ya?"

⁵¹ "Kini mbalən mil ndətl ki
ga, nə ndətl ki kəm. Kənə
mi'zəm'i'zəkini kini da: ko
anəmi ki pəli Yal ki mbatl ki
Lya natl ki ga.

⁵² Age' mi' nje shinkən
ki Lya gukən mi'zəm'i'zəkini
a hwotisi bezən ləbawai?
Kuma is tlo ginə dləm shilən
atən mbə ki mul ze' mbatlu,
nə ngeti i tloti,

⁵³ kini kamən zhil ma' mi'
shinkən ki Lya, amma ka
bəliniwai."

A la' Istipanus nə Zəngə i

⁵⁴ Nə mil dləl shilən kumi
nəgu u, is kum du tuki hal is
ash bi ki hwodi tən gaki kup
du tugi tənti.

⁵⁵ Amma Istipanus, ki ikəni
nə Yal ki mbatl ki Lya ki
gunti, i ut duwa dən twa lya,
i' en natl ki Lya, a Yesu ki dləli
tən toh shipti ki Lya.

⁵⁶ I' usu, "Yanini, a en lya
ki buliyi yakən mbalən ki dləli
atən tohship ki Lya."

⁵⁷ Amma is ca kəmwasən, is
tləl yali, is nde ga nə mbatl
nəm,

⁵⁸ is pekəlti tya kal gatlı is
gop lalati nə zəngə. Kuma,
mil enti nə dwadən is zi lu-
luluwasən ma yakən gidən
siwon shinwasi Shawulu.

⁵⁹ Asi lalatiti nə zəngə,
a Istipanus də shilən nə
Lya, "Mulban Yesu, kan
mbadlini."

⁶⁰ Iki i' ngus nə ga hwulən
i' tlil Yal nə dəlti, i' usu, "Mul
ban, bə zisi bezən ləba u
agawasənwai." Nə usu nəgu
u, i' nde yenmbudi.

8

¹ Shawulu də bətlkal ki tlo'
istipanus.

Agasisi, i bal bəna mbi İkili-
siya ki Ulshelima mus is
dla'ga tyage' atl ki Yahudiya
nə Samaliya, sai milshikən
kən katl.

² I mi'bətl Lya kalen gu Isti-
panus is kuli gawasi.

³ Amma i Shawulu go' pəli
İkilisiya bezən pəlti. A ti bətl
libi libi, ti dədl mwani nə
mudli a ti la'tisi ge'lü kəndə'
mbalən.

*A dləm shilən ki Lya a
Samaliya i*

⁴ Ginəs dlakisi gayi is go' dlib shilən ki Lya mus lu unəs ləda u.

⁵ I Pilibus su ge' gatl ki Samaliya ti dləb shilən ki Almasihu.

⁶ Nə hwu' mbalən kumi is yen gagashintu nə Pilibus də pəlti u, i mus səpə dəməm nə ulnə' dləmi u

⁷ Nə la'ti Yal i du mi'gatli pe' dəge' mbalən dibəli, mi'tle ki dli ne' dakkəlsı dibəli is mbi ndo'ti

⁸ I hwoltu' pəldli bali a ge' gatl.

Saminu mul Yal lu

⁹ Mulənda mulshin Saminu, tedi ti pətl gonti age' gatl, hal də bətl mus mbalən ki Samaliyawa gagashinti. Ti dagagga ti usu ti bal mbalən kəni,

¹⁰ Mus mbalən, bazi ni mil, is gakki' kəm asi usu, "Mulu də mbettiki dətl ki Lya mul nalti."

¹¹ Si bəlti kal təngaki ta ləndəp də pəlisi gagashiti nə pəlti gontwasu i.

¹² Amma nəs la'mbatl nə dləb shilən ki gu' ki Lya nə shin ki Yesu ki Pilibus, i pəlisi baptisma mudli nə mwani.

¹³ Saminu gawasi illa' badli i pəli' baptisma. Iki ibbəl Pilibus kali, i' kup əbənti nə ye' bal ulki gagashintu.

¹⁴ Nə milshikən ki Ulshe lima kumi mi' Samaliya a ndə'nə shilən ki Lya u, is shin Bitlus nə Yahaya tya Samaliya.

¹⁵ Nəs mbəkəci u, is shilən nə Lya gaki mi'pyal bətl Yesu kal gaki səmmbi Yal ki mbatl ki Lya da,

¹⁶ Gaki Yal ki mbatl ki Lya a mbi gon wasən uwai; a pəlisi baptisma i katl ge'shinki Yesu.

¹⁷ I Bitlus nə Yahaya zəsi toh, is mbi Yal ki mbatl ki Lya.

¹⁸ Nə Saminu eni zəttoh ki milshinkən də bətl Yal ki mbatl ki Lya u, ibbəlsi ulpi.

¹⁹ I' usu, "Amima bələnnən manti u gaki mus mulnə a zəttoh u ammbi Yal mbatl ki Lya da."

²⁰ I Bitlus ndəgi i' usu: "Məshnə ulpwagi, gaki ki enti kən ma'ultl bəlti ki Lya nə ulpa!"

²¹ Ulən a lakki nə uluwai, gaki mbadlwa'da nəm akina də Lya wai.

²² Gaki nəgu za'pətl bezən ləba a' ngem Lya dəgon a' okəlki də ge' ulnə' ngapi ge' mbadlwa gu.

²³ Gaki a eni i ka njikən nə dashti nə ngapti bezən ləba i."

²⁴ I Saminu ndəgi, "Ngemən Lya gayini gaki ulnə' dlimini u ba ndanə ami."

²⁵ Kalkə dlib shilən ki Lya wasən nə ndə'twasən nə Yesu, Bitlus nə Yahaya is pałtya Ulshelima, si dlib shilən ki Lya ge' mil gatl ki Samaliya dəbili.

Pilibus isə mul Habasha

²⁶ I mul shinkən ki Lya ul Pilibus su, "Lə tu'tən tona ki shitu dəlgən gunə pe'te' Ulshelima dələ Gaza u."

²⁷ I' hilya ippeki, tən shitu wasi imma isə mul Habasha Ndami bal mbalən mul nalti, gu' ni'da ge' gu' ki Kandakatu, tikə mul zi' ləba (Kə "Salauniya ki Habasha").

Muli mbə Ulshelima də ngep Lya,

²⁸ Ti patl tya libi tiki dəmi ge' Bəsdomwasi, ti dlib lashti kəge' lwabbat ki Ishaya.

²⁹ I Yal ki mbatl ki Lya ul Pilibus su, "Sha'tya ma' Bəsdomu."

³⁰ I Pilibus kitəl tyage' Bəsdomi, i' kum muli də dlib lashti kəge' lwabbat ki Ishaya. "Kimanən ulnə ki dlimti ge' lashti uwa?" Pilibus usu.

³¹ "A mani una," i' usu, "Ai se nə mulən adlimini." Immbe Pilibus bi səddəm siti.

³² Gukə shilən ki Lya unə ti dlimti u: "A dəlti kənə mbila ge' lu poshtiti, kənə kan unə bəgəmdla da atoh də mul swattiti u, nəgu ta bulbiwai.

³³ A ge' shidətgawasi is nge bətli baliwasi. Wokən matl dlib gəs ki mbañənwasi? Akan dliwas taka dətən dəb ləba i."

³⁴ I bali i ngem Pilibus, "Dlimini, mul nje'shinkən ki Lya u, shilən ki o ti dlimti, gwasa ko ki mulən?"

³⁵ I pilibus gob dlib shilən ki Lya itl dlimi' shilən ki Yesu.

³⁶ Si ge' ləti is mbəkəci ma' bal malon i bali i usu, "Ya mal kən ngu. Ya la'tida bə kəkkən pəlitən baptisma wai?"

³⁷ I pilibus usu, inka la'mbatlu, nə mbatl nəm mu, nən pəlikı batisma." I bali i ndəgit i' usu, "A ndəgi Yesu yakən ki Lya kəni."

³⁸ Ibbəl zhil tə dlil bəsdomi. Ndən wasən Pilibus isə Bali i is suge' mali i Pilibus pəli baptima.

³⁹ Nəs pe'toddə ge' mali u,

i Yal ki mbatl ki Lya kan Pilibus, Bali i a yenti nuwai. Izzəga ati pətl hwoltugi.

⁴⁰ Ngonənə gu i Pilibus lə' mbi gawasi a Azontus. Ibbəl gatl tyai, a ti dlib shilən ki Lya mus ge' gatl hal immbəcci Kaisaliya da.

9

Palki shawulu ma' Lya

¹ Shawulu də ngalcik mi'bəlt Lya kali, ti usu tən ti tlosi, i' lə ma' bali ki bas ləbəsi,

² i' gyebti ndəgini ki laci lwabati ki gəlu dopga ki yahudawa ki Dimaskus, gaki nəgu in a mbi mil bəlt shiitu u mwani nə mudli, a mbəlsi ge' galt ki Ulshelima a kəndəsi.

³ Ti lək kən ngu, nə' bal nja ma' Dimasku u, bənə man tiwasau swai chilton kən ngu sul lya ki ga ndəli nəti.

⁴ I' nda atli i' kum yalon də usu "Shawulu, Shawulu ya lakida ki ngalci tənda?"

⁵ Ti kuma i' usu, "Kiwoñi Mulnaltı?" I usu, "Amiki Yesu u nə ki ngalcitə u.

⁶ Amma hilya kələ ge' gatl, tyə ka sə dləmi' ulnə ki pəli u."

⁷ Ellənsi u nə si lə ne'tu is hol ulki dləmi, si kup yali sayen mullan wai.

⁸ I Shawulu hilya, nə bul dwaðən u taman yeluwai. Is ndə' kina is sulti Dimasku.

⁹ Muttu maki bəti da yeluwai, bətida damtiwai bətida tletiwai.

¹⁰ Mulan da mul bəlti a Dimasku shinwasi Hananiya. I Mulban shilniti age' dluti

i' usu "Hananiya." I' ndəgi amingu Mulban."

¹¹ I mulban ultisu, "Hilya ki bəl shitu u nə də mbeti kitaki, a gyemi a libi də Yahuza ko mul Talsus nən ki, mul shin Shawulu, ti ngu də shilən nə Lya.

¹² A ge' tlu'ti i' en mullən mul shin Hananiya i' zi' toh ga gaki tə' yelluda."

¹³ Ngonənəgu i Hananiya ndəgi i'usu, "Mulban, a ləm mutti də kub shilən ki muluyi ma' mbalən di mbəli, ti pəl'i mi'bətl Lya besən ləba a Ulshelima.

¹⁴ In ngu bas ləbasi sa bəlti ndəti tə' gob mus mi' mbe shinwagi."

¹⁵ Ngonənagu mulban i' ul Hananiya su, ləma' mulna oltu tə'dləm shin ini ma' ginə bə Yahudawa wai u nə gumsi nə mbalən ki Isla'ilə.

¹⁶ Ami nə ga ini an mbokiti toh tən mbəna u nətə' tle u gaki shin ini."

¹⁷ Iki Hananiya lə i' tege' libini i'zi shawulu toh ga, "Yelse ini Shawulu, mulban kən shinəni, Yesu unə peki tən shitu u nə bəli u, ti shinəni gawagi ki yellu da dadanu, a' nji kən nə Yal ki mbatl ki Lya ki gunti."

¹⁸ Aləbi aləbi i ulən pekki Shawulu də dwaðən kənə kal pəti, i'go' yellu dadanu. Iki i' hilya i pəl'i baptism,

¹⁹ kal ki nə' ðami u, i ndəltwas palləbi.

Shawulu a Damasku nə Ulshelima

Shawulu ləm mutti a Damasku ne' mi'bədl Yesu kal.

²⁰ Aləbi aləbi i' gop dləb shilən ki Lya age' lu dobga ki Yahudawa, tən Yesu yakən ki Lya kəni.

²¹ Mus mi' ginə kumti is kum gagashinti is ngemi, "Tikə mul nə dlaki mi' shilən nə Lya ga nə shin u, a Ulshelima u waiwa? Tə mbənki gaki tə' təlesi akina də bal ləba ki kəndi."

²² I Shawulu mbəl ndətl tənki, ti hwotti mbatl ki Yahudawa yi nə də dəb a Damasku, ti ussu Yesu tikə Almasihu.

²³ Kal ki ləb mutti i Yahudawa kəndə bi tən sə' tloti.

²⁴ Amma i Shawulu kum ulnəs kəndə u. Gasi nə dləncin asi butti dlabi gatli gaki sə' tloti da.

²⁵ Amma a gasi i mil kushtiwas kanti is shimti ge' dəsi is shimti swage' dlabiwon tən dli gatl bi.

Shawulu a Ulshelima

²⁶ Nəm mbə Ulshelima u i' hilya də te'ge' mi' bətl Yesu kal, amma mus is kum bantwasi gaki sa la'mbatl nə ti mul bətl Yesu kal kən wai.

²⁷ I Balnaba kanti it təlati ma' mi'shinkən. Ippisi kan unə Shawulu yen Lya tən shitu u, i Lya shilən nəti, nə kan unə dləm shilən ki Lya ge' shin ki Yesu bəni batwai a Damasku u.

²⁸ I Shawulu dəm ne'si ati du'ne'si a Ulshelima, a ti dləb shilən ki Lya nə mbatl nəm age' shin ki Yesu.

²⁹ Ti shilən ne' Yahudawa mil kup bi ki Helinawa, ti shottı bi ne'si, amma is gob ngau shitu ki tlotti.

³⁰ Nə mi' bətl Yesu kal mani nəgu u, is mbəlti a Kaisaliya is shinti tya Talsus.

³¹ Iki i mus dobga ki mi' bətl Yesu kal ki atl ki Yahudiya, nəkə Galili nəkə Samaliya i mbi dəb ki zoki, si pətl ləbwawasən nə banti Lya, a yal kə mbatl ki Lya də dətsi, is mbəl tənki da.

I dokəl Iniyasu

³² To nə Bitlus gandəl atli mussu, illə də shini' mbalən ki Lya mi'dəb a Lidda.

³³ Aləbi tə mbi mulən mul shin Iniyasu, tina tle' ki dli hwon usəpsi tən lumutti.

³⁴ I Bitlus ultisu "Iniyasu, Yesu Almasihu a ndokəlkı. Hilya ki gadəl lumut twagi." Aləbi it hilya.

³⁵ I mus mbalən ki Lidda nə ki atl ki Salona nəs yentu, is pal temma Lya.

Bitlus tlil Tabita lya ge' mi'məshti

³⁶ A Yapa mul bətl Yesu kalon da mul shin Tabita gunə də mbetti kə Dokas dadanu, ti pətl ulkə zoki ati dətl mi'gini bə ulən nisi dawai u.

³⁷ I' goni imməci, nəs uti' malu, is zəti twage' kəps ki lya.

³⁸ Lidda nja nə Yapa da; Nə mi' bətl Yesu kal ki Lidda kumi Bitlus a Lidda u, is shin mbalən lop tya ma'ti, sə' ngemti, tətl dlewti tem ma'si.

³⁹ I Bitlus zəga ne'si, nəm mbəkəci u is tolty twage' kəps ki lya ni. Mudli i nə mwani wasən məci is dlil nja nəti, asi kulu, asi mbo'ti toh tən lu'ləgəl gini Dokas pəlisi tedfi nəsi ne'tu.

⁴⁰ Amma i Bitlus pyakəlsi mus swadla, in ngus atli in ngem Lya. It juyati temma hwunisi, i' usu, "Tabita, hilya." Ibbul dwadən, i' en Bitlus, ih hilya iddəm nə gəsi.

⁴¹ It takit toh itl tləlti lya. Im mbe mi' ki Lya bi ne' mudli gini mwani wasən məcu ibbəlsiti kami.

⁴² I gu mandli mus a Yapa, i mbalən dibəli la'mbatl nə Lya.

⁴³ Illəm mutti dibəli a Yapa a libi də mul pətl batı mul shin Saminu.

10

Kaliniyas mbe Bitlus bi

¹ A Kaisaliya i pəl mulən mul shin Kaliniyas, mul kumti nə gawasi age' mi' dobga ki sooji gunə də mbetti ki dobga ki Ataliya.

² Ti mulbəlt Lya kəni nə bulti Lya nə mbalən ki libi-wasi ti bəlt mbalən ulkə toh wasi nə mbalt nəm, ati shilən ngwash ngwash nə Lya.

³ Gason dom maki ki su'ti, i' en mul shinkən ki Lya age' tluti, immbə i' ultisu, ki "Kaliniyas!"

⁴ Kaliniyas utti dwadən nə banti, i' usu mulban yakəni? I mul shinkən ki Lya ultisu, shilən nə Lya nə bəlti wagi a mbə kina də Lya i.

⁵ Nə gun u pəl shinkən swa Yapa sə' taki Saminu bi gunə si mbetti ki Bitlus su.

⁶ Ishiti ma' Saminu mul motti batı guna libi was nja ma' bal malu."

⁷ Nə mul shinkən ki Lya nə shin nitu zəga u, i Kaniliyas taki zheli was lob bi, nə

mul kəndətl dlomon mul bətl shilən ki Lya ge' ginə də pəlliti kyautən hu gasi u kəni.

⁸ Nədl dlimisi mus ulnə nda u is shinsi tya Yapa.

⁹ Lucili a dloncin əal nja i, sə əal nja nə gatlu ngu, i Bitlus toge' kəpsi ki lya də shilən nə Lya.

¹⁰ Kuzən a gobti, ti lyap damti, amma də pətl ulki dami i, i tluti mbiti.

¹¹ I'en lya a buli, ulən də sussudi kənə bal ul idlam mbalən, də shitti su' atli ge' zheltwas upsi.

¹² A gibı mus ləba ki dəlgən nəki ban, nəmət dətl tugi, nə gala'sa nə yadli.

¹³ I yalon ultisu, "Bitlus hilya, ki' poci a' dami."

¹⁴ Amma i Bitlus usu o o, a dam bezən ulən gason wai ko ulnə bə mbunwai u.

¹⁵ I' kum yali dadanu, ki lop, usu, "Ulnə Lya a li'ni' u, bə palli besniwai."

¹⁶ I gu pə asən maki, aləbə aləbə i dəl ulisi twalya.

¹⁷ Uli də hwotti Bitlus kən ngu tən tlutu nəs pəlitu, iki i mbalən i nə Kaliniyas shinsi tedü, tən dlabi, sa ləge sa ngem libi ki Saminu i.

¹⁸ Is tabi is ngemi Saminu gunə də mbetti ki Bitlus nən dawa.

¹⁹ Tun a Bitlus də dambəlti tən tlutu, i Yal ki mbatl ki Lya ultisu, "I ngu mbalən maki də ngauki.

²⁰ Hilya ki' pe'swai, ki bəlsi kali. Bəkum bantwai, gaki ami shinsi tedi.

²¹ I Bitlus pe'swa ma' mbaləni, i' ulsisu, "Ami ki ngautəma. Ya mbəlkini?"

²² Mbaləni usu, "Mə mbəni te'ma' ndəl mulən mul kina ki mil kəndə dلوم gəni də mbetti ki Kaliniyas, mul zo' mbadli, mul banti Lya, gunə mus mbalən ki Yahudawa də ndwa'titi, mul shinkən ki Lya mul gunti ultisu, ti ta shinkən, ki lə libi dakka, tə' kum ulnə ki' dlimi u."

²³ I Bitlus mbəlsi a libini. Nə lucilu i' hilya is zəga ne'si is dəm səmbəlswasi, ge' mi' bətl Yesu kal ki Yapa is la'ti shitu.

²⁴ Lucili im mbəkəci a Kaisaliya. Kaliniyas də la'ti mbatl ki mbə twasən, im mbe yelsəni bi nə yelənsi wasi.

²⁵ Bitlus də te' libi ni ngu, i Kaliniyas njeti in nda kina da'ka, in nalti.

²⁶ Amma i Bitlus tləlti lya, i' usu, "Hilya, amima yakən mbalən kəni."

²⁷ Nə Bitlus də shilən situ, it te' gibı in mbi mbalən dibəli a domga i.

²⁸ I' ulsisu, "Kini nə gawakən ki manini, a mbunwai tə mul Yahudiya maga ko səl le' shinni mulnə bə biwas kən wai u. Amma Lya a mboki toh ba ul mulənsu mul bezən mbadlwai, ko mul ulkə ci'zhentwai.

²⁹ Gaki nəgu, nəs ta shinkən ta mbə u, a ngewai. To nəgun ami lyamti ta kumi ya laki i' takinən bida."

³⁰ I Kaliniyas usu, "Asəti mutti maki ngu, lu nəguni, ami shilən nə Lya ki dom maki ki su'ti a libi da ka, bənə mantiwai sai mulən kən ngu ki dlili nə hwol luləgəl akina da ka.

³¹ I muli usu, Kaliniyas, Lya akum shilən nətiwagi, bəlti wagi a dəm ulki dambəlti akina də Lya.

³² Gaki nəgu a' shin shinkətya Yapa ti taki Saminu bi, gunə də mbetti ki Bitlus su, am mbə a libi də Saminu mul pətl batı abi bal mal.'

³³ Aləbi aləbi ya taki' shinkən, a mbuni ni' mbə u, to nəguni i ngu mus ma mbə a kina də Lya i, gaki tən kum undi zhili u nə Lya piku."

³⁴ I Bitlus pisi i' usu "Nəgun amani balini Lya da nge mbalənwai.

³⁵ Amma mus mbalən milbantiti nə mul pəl ulki zoki ulkə kamini amatti.

³⁶ Lya ta shinkən tu'ma' mbalən ki Isilaila, asi pitsi shilən multəmti ki holtugi tu'ma' Yesu Almasihu, tikə Lya kə kowagi.

³⁷ Kəmanən shilən u nə dla'ga age' alt ki Yahudiya, tun te' Galili kal ki pəli' mbalən batisma ki Yahaya atipi' mbalən shilən ki Lya

³⁸ məkum shilən ki Yesu Banazalat gunə Lya swati nə Yal ki mbalt ki Lya kə zoki mul ndəltti, i' gobduti ati pətl ulkə zoki, ati ndokəl mus ginə shədan də bəlsi kalu gaki Lya matti.

³⁹ Mine mi'enti nə dwadəkəni ki Yesu nə mus ulnə pəli age' alt ki Yahudiya nə Ulshelima u. Iki is tlotti atən gadlatga,

⁴⁰ Amma i Lya tləti age' mutti maki i' mbəlgawas ge' mbalən.

⁴¹ Ma' mbalən mus kən tə mbəlgawa swai, se mami' enti nə dwadənwasi ginə Lya

oli tun te'di wato mini u nən damini i' tle ne' tu kal ki hilyawas ge' mi'məshti.

⁴² Ippimini tən dləmi mbalən shilən ki Lya, mini ne mi'enti nə dwadənwaskəni tən ti Lya latti mul pəli' mbalən mi'dli nə mi'məshti shilən.

⁴³ Mus milnjeshinkən is pəl enti nə dwadən də ussu tu' ma shin wasi mus mulnə alambatlı tu' ma'tu tən mbi' pekəlti."

⁴⁴ Bitlus age' shilən kəngu, i Yal ki mbatl ki Lya i nde mus mi' kubti sudi.

⁴⁵ I Yahudawa mi' ndəti nə səlkən is mbə ne' Bitlus su is kub gagashiti hal ginə bə Yahudawa wai u is mbi bəlti ki Yal ki mbatl ki Lya ki gunti.

⁴⁶ Ama is kubmi si shilən nə bi dibəli asi natl Lya. I Bitlus usu,

⁴⁷ "Mul ma' hana pəlit mbalən i baptisma nə mal nən daya? Sima sa mbi Yal ki mbalt ki Lya i kan u nən mbini u."

⁴⁸ I Bitlus bəlsi zhil səpəlisi Baptisma age' shin ki Yesu Almasihu is ngemti tədəm kə mutti lob ne' si.

11

Bitlus a dləmi Mi' bətl Yesu kal ki Ulshelima shilin i

¹ Mi'shinkən ne' yelsəni gini ge' atl ki Yahudiya nəs kumi, mi' ginə bə Yahudawai u sa ndə' nə shilən ki Lya i.

² Nə Bitlus mbə Ulshelima u, ginəs ndə' nə səlkən u is shimi' shilən,

³ is usu, "I ngu ka te libi də min ginə bə sa səlsiwai u i, i' dami ne'si."

⁴ I Bitlus gop dləmissi mus shilən nisi,

⁵ "Ami, a ge' gatl ki Yapa ami shilən nə Lya, i tl'u ti mbi ni, yayen ulən sul lya də sussudi kənə bal ul idla mbalən, tuge' malgən upsi, i mbə ma'kəni.

⁶ Na wutti' dwaðən u, yayen tlu ki dəlgən nə ki ban mi' asən upsi ki ge dəp ləba, ne' mi'dəl tugi, ne' yadlə a gibi.

⁷ Ya kum yalon ah ulənsu i', 'Bitlus. Hilya, ki' poci, adami.'

⁸ Ya' usu, a nge i, mulban, gaki bezən ləbwawon a tee bi gasonwai.'

⁹ I Yal shilən sullya ki lop, i' usu, 'Ulnə Lya a li'ni' u, bə mbe besniwai.'

¹⁰ I pəlgü asən maki, iki i dəl uli twalya dadanu.

¹¹ Bənə mantiwai he mbalən maki ngi ki dləli abidlabi u nə amida u, sə shinənsi ma'kəni te' Kaisaliya.

¹² I Yal ki mbatl ki Lya ulənsu ta zəga ne'si, bənə cetl mbadlwai. Yelsəni gi məkka i is zəga ne' kəni, illə libi də muli.

¹³ Itl dləmimi kan unə en mul shinkən ki Lya mbəl gawasi a libi dəkka u, ti ussu, 'Pəshinkən swa Yapa səttaki Saminu bi, gunə simbetti ki Bitlus,

¹⁴ Təh dləmikkin shilən u, nə ki nə mus libi wagi ki mbi pekətl də.

¹⁵ "Nə gopti shilən ini, i Yal ki mbatl ki Lya ndesi sudı, kan unə ndemi sudı te' kalu.

¹⁶ Ya dəmbəl shilən ki mulban, kan u' nə' usu, 'Yahaya

bo, nə mal kən ti pəli' mbalən batisma, kini bo nə Yal ki mbatl ki Lya kən səppəlikini.'

¹⁷ Kan u nə Lya bəlsi manti u ndace nə gunə bələnmini u, nə la'ti mbatl nə mulban Yesu Almasihu u, ami ki wongi ta dləli nə Lya!"

¹⁸ Nəs kumi nəgu u, is hol ulnə sədləmi u, is nal Lya is usu, "Ai, ginə' bə Yahudawa wai u Lya a bəlsi pe'ti də ge' bezən ləba nə mbim mbatlidi."

Milbatl Lya a Antakiya ki Suliya

¹⁹ Ginə dla' ga tən gaki bəna u nə nda gunə mbəl tlo Istipanəs su, is lə tyage' atl ki pinikiya, nə calgatl ki Kubulus, nə gatl ki Antakiya, səda dləmi' mulən shilən ki Lya wai Yahudawa katl.

²⁰ Genwasən, mbalən ki Kubulus ne' ki Kulane, is lə Antikiya is go' dləmi' mi' ginə bə Yahudawa wai u, zo' shilən tən Yesu.

²¹ Toh ki Lya tənsi, i mbalən dəbəli la'mbadli is pal temma' mulban.

²² I shiləni mbə'ci ge'lü libi ki mi' bətl Lya kal ki Ulshelima, iki is shin Balnabas tya Antakiya.

²³ Nən mbəkəci u i' en ulki zoki u nə Lya pəlisi u, ippəl hwol tugi, in ndəllisi mbadli sə'dlil nə bali tən Lya nə mus mbadlwəsən.

²⁴ Ti mul zo' mbatl kəni, ki njəkəni nə Yal ki mbatl ki Lya nə la'ti mbadli, i dəbəl mbalən mbə ma' Mulban.

²⁵ Iki i Balnabas lə tya Talsus də ngau Shawulu,

²⁶ Iki nəm mbitu, im mbəlti Antakiya, i hwon njikən da Balnabas isi Shawulu asi ma'ga ge' libi ki Lya asi kulci' dəbəl mbalən a Antakiya sə go' mbe' mi' bədl Yesu kal ki Kilista.

²⁷ To a hwonisi mi'nje shikən kə Lya en pe'te' Ulshelima is mbə Antakiya.

²⁸ Nəm age' si, mul shin Agabus, i' hilya il dləmi nə ndəl ki Yal ki mbatl ki Lya nən pətl bal kuzən won ge' atl ki gu' kə Lomawa. (Pələn dli ge' hwon ci' gu' ki Kalaudiyas.)

²⁹ I milkushti dlilli, hu wonngi tən ndəl twasi, tənma' dətl yelsəni ginə də dəb a Yahudiya u.

³⁰ Nəgu səpəli, is shin bəltiwasən gaki dətl mi'kina tu'ma' Balnabas isi shawulu.

12

Gagashi' ki pe'ti ki Bitlus də ge'lu Kəndə Mbalən

¹ Age' cini i Guu Hildus gop mil bətl Yesu kal təngaki tə' hwotisi bənada.

² Il laki i tlo Yakubu yelse ki Yahaya nə bal pəga.

³ Nə' en gu a mbuni Yahudawa u, i' gob Bitlus dadanu. Gu ndani ge' hwon ki dobga ki daddabəl ki ulki dəmi u nəbə yis niddawai u.

⁴ Kal ki gobtiti, illa'ti ge'lu kəndə mbalən, ibbəl sooji upsi upsi ləbi upsi sə' butti, lyamti ki Hildus təm mbilti kina də mbalən, kal ki daddabəl ki dəkəshti.

⁵ Iki is zə Bitlus a ge'lu kəndə mbalən, dobga ki mi'

bətl Yesu kal is go' shilən nə Lya gawasi.

⁶ A ge' gasu nə ənlə a cilu nə Hildus ti lyabti tə pekəlti kina də mbalən, Bitlus ati ndə'emməbudi ge' dlom ki mi' kəndə dlom lop, ki kəndə nə zhimdəm lop, ami' butti dlabi atən bidlabi.

⁷ I mul shinkən ki Lya won mbə i lu kəndə mbalən ni cili. Illi' Bitlus tən malgən itl tlilti lya, i' usu, "Dleuki, də tləl lya!" Iki zhim domi waki Bitlus də toh.

⁸ I mul shinkən ki Lya ni ultisu, "La' lu'ləgəl a shim kaptalanwagi." I Bitlus pəli nəgu. "Dla' ul idlakiwagi a' bələnkəl,"

⁹ I Bitlus bəlti kal is pe' dəge' lu kəndə mbaləni, amma təman ulnə mul shinkən ki Lya də pəlti u kənə baliwai; enti tida kənə tlu'ti.

¹⁰ Is dəkəsh mi' butti ki nəm nə ki lop is mbə tən dlabi ki dom ki te' ge' gatli. I dlabinı bulisi nigawasi, is petya gib. Nəs gollətu is mbəkəci lu unə bal shitu i pa'da u, a ləbi a ləbi i mul shinkən ki Lya ni za'ti.

¹¹ Nə Bitlus pal ge' dliwasu i' usu, "Nəguni amani i, bənə bwasti mbadlwai Lya kən shin mul shinkən was sudi təppə'kələn te' toh də Hildus nə mus ulnə Yahudawa də la'ti mbatl ki ndatwa su."

¹² Nəgu ndanəti u, illə libi də Maliyamu dyaki Yahaya, gunə də mbetti ki Malkus dadanu, lu u'nə mbałən domga də shilən nə Lya da u.

¹³ I Bitlus du dlalabi ki dla, i zheli won mul shin Loda lətə' də ya' woki mul du' dlabi ni.

¹⁴ Nəm mani yal ki Bitlus kən u, ta əul dlabi niwai i' kum hwoltugi ippal tya nə kal nə kitəl itl dləmi, "Bitlus tən dlabi.

¹⁵ Is ultisu "Ama ga niki dawa. Nə'go' dləmissi nəgu da u, is usu, mul shinkənki Lya was kəni."

¹⁶ Amma i Bitlus go' du' dlabi ni, nəs əul dlabi ni u is enti, is kum gagashinti.

¹⁷ I Bitlus u nisi toh səddəm shot itl dləmisi kan unə Lya pekkəlti dəge' lu kəndə mbalən u. I' usu, "Dləmi Yakubu ne' yelsəni mwani nə mudli tən ulu," is za'si illə ge' kundu lu.

¹⁸ Nə lu cilu i bal dlatl nda ge dlom ki mi' kəndə dlom tən ulnə nda nə Bitlus su.

¹⁹ Kal ki nə Hildus ngauti ta mbitwai u, i' gop pətl mi' buttiti i nə shilən il laki tə tlosi. Iki i Hildus za' Yahudiya illə Kaisaliya iddəm tyaka.

Məshti ki Hildus

²⁰ Hildus də leuwi mbatl tən mbałən ki Taya nə Sidon; is maga is mbəmati nə mbatl nəm, kal ki ngau dətl ma' Bilastasa, zheli ki guu is ngau dəp ki zoki, gaki tən atl ki guu nisi də ga'tisi si mbə' ulki dami da.

²¹ A tən cin unə zədli, i Hildus la'luləgəl guntwasi, it dəmtən lu dəmti ki gunti ippəli mbałən shilən.

²² Is la'yali, "Guki Yal ki lya, ki mbałənwai."

²³ Aləbi aləbi, gaki Hildus a nal Lya wai, imul shinkənki Lya li'ti atli, i zhəbəl gob dəpti in mətci.

²⁴ Amma iki shilən ki Lya gop mbətl tənki a də bulti.

Balnabas nə Shawulu

²⁵ Balnabas nə Shawulu nəs ngatlı kautən wasən u, is palsu' Ulshelima, is mbə ne' Yahaya, gunə də mbetti ki Malkus dadanu u.

13

¹ Age' lu dobga ki mi'bətl Yesu kal ki Antakiya, mi'nje'shinkən ki Lya en da nə mi'lashti: Balnabas, nə Saminu guni də mbetti ki Baki, nə Lukiyas ki Kulane, nə Manayan gunəs nal to'dı isə Guu Hildus nə Shawulu.

² Nəsi natlı Lya nə ngaptibi dadanu u, i Yal ki batl ki Lya ki gunti usu, "A'wolinən Balnabas nə Shawulu gaki kyautən u na mbesibi da u."

³ Kalki ngaptibi nə ngep Lya wasən, is zəsi toh, is pallisi bi.

Shilən ki Lya a Kubulus

⁴ Si lopi, tən shitu wasən nə Yal ki batl ki Lya shinsi u, is lə Salukiya tyaka is tege' kundələn ki mal is lə Kubulus.

⁵ Nəs mbəkəci a Salami u, is dləmisi shilən ki Lya ge'lu lu dobga ki Yahudawa, Yahaya ne'si ti dəfəlsi.

⁶ Is gadəl cal gatli hal is mbə a Bapusa. A tyaka is mah ne' mul Yahude won mul pətl gonti, mul nje'shinkən ki ləgati, mul shin Balyashuwa'

⁷ gunə isə mukaddas Saljiyas Baulus, mul malləba, it taki ki Balnabas bi isə shawulu gaki ti lyap kup shilən ki Lya.

⁸ Amma Alimas mul idlatl dwaðən u (gu iki shinwasi) in nge' shilənwasən, in ngayi təb bwas mukaddasiyi də tən la'ti mbadlwasi nə Lya.

⁹ Iki Shawulu, gunə də mbettiki Bulus dadanu u, ki njikənə, nə Yal ki batl ki Lya, i'uti Alimas dwaðən i' usu,

¹⁰ "Ki yakan ki shedan kənə, mul dutuki, nə ləba kizoki! Ka njikən i nə gəndl mbalən nə shiptotugi. Kikən za'ti jitti shitu ki Lya waya?

¹¹ In ngu toh ki Lya də leuh mbatl nəki. Kən dəmti dwa ki ləpdəmti, ki kən ma'etcitl ki cinwai." Aləbi aləbi i wolkənni nə dəmshal idlati, i'go' ngauti, tə mulən dəllit toh.

¹² Nəmul mukaddasi yen ulnə nda u, illa' mbadla, i' kum ngapti bi tən shilən ki Mulban.

Bulus nə Balnabas a Antakiya ki Bisidiya

¹³ A te' Basusa, Bulus ne' yelənsi wasi is tege' kundələn ki mali is mbəkəci Balyata ki Bampiliya, aləbi Yahaya za'si ippal tya Ulshelima.

¹⁴ A te' Balyata is lə tya Bisidiya ge' atl ki Antakiya. Gas cinshu'ti is tege' ludopga ki Yahudawa is dəm atli.

¹⁵ Kal ki dləmissi lashti zhil ki Musa nə lwatbat ki mi'nje' shinkən ki Lya, mi'kina ki lu dobga ki Yahudawa shin shinkən tensi, is usu, "Yelsəni, in shilən nikinda ki ndəlli' mbalən mbadlu a' dləmini."

¹⁶ I Bulus hilya i' unisi toh, i' usu kumənnəni, "Kini Yelsəni Isla'ilawa nə kini mi' bətl Lya ginə bə Yahudawa u.

¹⁷ Lya ki mi' Isla'ilə i' ol mi'zə' mi'zinmini; in nal mbalən wasi nəs dəm a Masallu; nə ndətl ki naltwaskən tə pekkəlsi də ge'atli;

¹⁸ Hwon kutl kutl ləbi upsi ati ngashtibi nəsi age' dəlgən;

¹⁹ Itl tlwa mbalən gatl ninngi a Kan'ana, ibbəl mbalənwas atlwasən də gwasən.

²⁰ Musgi akan hwon kutl cen upsi nə kutl ləbi nantam (450). "Kal kigu, i Lya bəlsi mi'pətl shilən hal cin ki mbə ki Sama ila mul nje'shinkən ki Lya.

²¹ I mbalən ngawi tə bəlsi gunti, Ibbəlsi Saul yakən ki Kish, mulisi ge' bi ki Bilyaminu, ippəl gunti ki hwon kutl kutl ləbi upsi.

²² Kalki tusti Saul taka, ip-pal Dauda də guu wasən. I Lya ndə'nəti, i' usu, 'A mbi Dauda i, yakən ki Jessi, mulnə ami lyapti ge' mbadli u; tən pətl mus ulnə ami lyamti təppəli u.'

²³ Age' gəskə mulgu Lya mbilli Isla ila mul pekkətl si Yesu, kan u nə dləlli u.

²⁴ Kapən mbə' ki Yesu, Yahaya a dləmi Isla ilawa sə'za'pətl bezən ləba appəlisi baptismal muswasən.

²⁵ Nə Yahaya bal nja ki ngwatlti kyautən wasu, i' usu: 'Wokən ki paltəni? Ami ki gunə ki buttən uwa. Amma mulən da ti mbə' ge' kalini gunə zhim kaptəlan wasi akən mat təngəltiwai.'

²⁶ "Kini mil ki Iblahim nə na mi'bantil Lya age' kini,

mini shinimin shinkən ki pekkəltu sudi.

²⁷ Mbalən ki Ulshe-lima ne' guumsisi wasən saman Yesu wai, ngo'nə konnətti u is njikən dləmti ki mi'nje'shinkən gunə də dlipdli huh gas cin shu'tu.

²⁸ Ko nəbə sa mbiti nə bezən ləba ki tlotwai u, is ngem Bilatus tətl tloti.

²⁹ Nəs njikən mus ulnə lashdli təntu, is shitti suddə tən gədlənnəngə is la'ti ge' zudi.

³⁰ Amma i Lya tləlti dəge' məshti,

³¹ Mutti dibəli ati bətl gawasi ma' ginə mbə ne'ti a Ulshelima te Galili nəguni siki mi' yenti nə dwaðənwasi ma' mbələn i nən.

³² Mi dləmikin zo'shilən: Ki ndətu nə Lya pəli' mi'zə'mi'zinmini u.

³³ Ta njikənimini i, mini mil-wasi, tən tlətl Yesu lya. Kan unə da ki laci u ge' Zabula ki lop:

"Ki yakuyi kəni;

Asəti adəm bwagi.

³⁴ Lya tləlti ge' mi'məshti təngaki təkən patlı ge' shukə bostinuwai, Lya usu,

"An bətkin albalka kizoki u na pəli Dauda dləlti u."

³⁵ Tən gaki Zabula won a dləmini:

"Kikən za'ti mul guntwagi təb boswai."

³⁶ Dauda bo, i' pəl ulnə Lya pitu age' hwonwasi, in nde yemmbufi; i guti ne'mi'ziə'mi'zitti i dliwas bosi.

³⁷ Amma gu nə Lya tləlti də ge' mi' məshtuwai ta boswai.

³⁸ "Gaki nugu yelənsiyini, ami lyamti ki'manini tu'ma'

Yesu dlimi kini pashti bezən ləba.

³⁹ Tu' ma'ti mus mulnə ala' mbadlu ta mbi pekəltu ngu dəge' mus byasləba, gunə bə kushti ki Musa taman pekətl kiniwai u.

⁴⁰ A' yanən lu gaki ba ulnə mi'nje'shinkən dlimi u ndanə kini.

⁴¹ "Ya nini, kini mi'mbətl ləba.

Kən pətl ga gashinti a gəlni, an pətl ulən ge' hwon-wakən gunə kəkkən la'ti mbatl nə nali wai u, ko tə mulən dlimi kini."

⁴² Nəki Bulus isə Balnabas də pe'ti dəge' lu dopga ki Yahudawa u, i mbalən mbesi bi səmmbil dləmisi shilən tən usi gas cin shuti mul mbəti.

⁴³ Nə dopga ki mbalən zəgga u, Yahudawa dəbəli ne' mi' ginə te'ge' undi bəlti ki Yahudawa is bəl ki Bulus kal isə Balnabas, sine is pisi shilən asi ndəllisi mbadlə səcci kina da, ge'alheli ki Lya.

⁴⁴ Nə cin shuti mbə dədanu u kənə mus mbalən kige' gatli domga təngaki sə'kum shilən ki Lya.

⁴⁵ Nə Yahudawa en hwu' mbalən u, is kum dutugi, is gob nge' ulnə Bulus də dləmti u asi byatlti.

⁴⁶ I Bulus isə Balnabas is ndəgisi nə ndətl ki mbadli: "Kini mi' dləmikin shilən ki Lya pa. Amma tun nə' ka ngeni u, adəmi ki da lyap mbatl mul ləshi pa'twai, mənpalti tya ma'gini bə Yahudawa wai u.

⁴⁷ Tən gu Lya zimi zhil:

"A la'ki, cili ge' mi'ginə bəs man Lya wai u,

gaki ki dəm shitu mbi
pe'kətl ki mbələn da hal
pa'ti ki dəp ləbada.

⁴⁸ Nə ginə bə Yahudawa
wai u kumgu u, is kum
hwoltugi is nal shilən ki Lya;
i mus mi'mbi dli unə bə kən
məshtwai u is la'mbadli.

⁴⁹ I shilən ki Lya mbəl
ləllolu' tənki mus age' atli.

⁵⁰ Amma Yahudawa gob
hotti na mudli en mi'bantil
Lya mi'bas lu kyautən ne'
mi'kina kige' gatli. Is
tləl ngashti tən Bulus isə
Balnabas, is katsi dəge'
atlwasən.

⁵¹ Sine is bəkət kushka
ki asən wasən takə tə dəm
dətləkəmdə tənsi is lə tyə
Ikoniya.

⁵² Milkushtiwəs njikən nə
hwol tugi nə Yal ki batl ki
Lya.

14

Bulus nə Balnas a Ikoniya

¹ A Ikoniya Bulus isə
Balnabas is tege' lu dobga ki
Yahudawa kan u nəs kuda
u is dəm shilən ki Lya hal i
hwu' Yahudawa ne' ginə bə
Yahudawa wai u la'mbadli.

² Amma Yahudawa ginə
nge la'ti mbadli is ho' ginə bə
Yahudawa wai u is kon nə
dlomwasən ne' yelsəniwasən.

³ I ki Bulus nə Balnabas is
ləmdəp tyaka, si dəp shilən ki
Lya nə ndətli mbadli, i' pəl
enti nə dwadən tən shilən ki
alheli wasi gunə la'si də pətli
ulki gagashintu.

⁴ I mbalən ki ge' gatli
bwassi; nami tən Yahudawa,
genne si tən kal ki
mi'shinkən.

⁵ I ki gyen ginə bə Yahudawa
wai u nə Yahudawa
ne' mi'kinawasən, is kəndi səl
la'si ge' sha as la'si nə zənga.

⁶ Amma nəs kum shilən
nə u, is kitəl tyage' gatl ki
Likoniya ki Listila nə Dalba,
nə atl ki malgəni.

⁷ Aləbə sə mbəl dləp shilən
ki Lya tənki.

A Listila nə Dalba

⁸ A Listila mulən da ki dəmi
atlı dakəlkəni, nəgu sə'zətti ta
ləm lə' gason wai.

⁹ Ti ga'ki' shilən ki Bulus
kəm, i Bulus uti' dwadən, i'
en la'ti mbatl ni'da akəm ki
ndo'twası,

¹⁰ it ultisu nə ndəlti, "Hilya
tən asənwagi!" Gaki nəgu, i
muli pe' lya i' gob ləti.

¹¹ Nə hwu' mbalən yen
ulnə Bulus pəli u, is la' yali
nəbi ki Likoniya is usu, "In
ngu lya yen a ndemin sudə
kənə mbalən!"

¹² Balnabas is mbekki
Zapsa, tine Bulus is mbekki
Hamisa gaki tikə mulkina ki
shilən.

¹³ Iki i laba ki zapsa, gunə
libi pətli gontwas a kal gatlu,
immbəl bas tla nə dwadən
ki buzha pətti abidləbi gatli,
gaki ti ne' mbalən si lyap
pəli'si hadaya.

¹⁴ Amma ki Balnabas isə
Bulus, nəs kumgu' u, is kyash
lu'ləgəlwəsən is te'ge' mbaləni
nə kitəl, asi tləlyal:

¹⁵ "Yelənsi, ya laki i' pələn
nə guða? Mima mbalənni,
kənə kini. Shilən ki Lya kən
mi mbəlli' kini, də utlkinsu ki'
zakən ulnə bə mbunwai u,
a' palni ma' Lya mul mbadli,

gunə pəl lya nə atlu, nə basmal, nə mus ulnə ge'si u.

¹⁶ Tini tun tedi is za' mbalən sə' bəl shitu u nə si lyamti u.

¹⁷ Ngo nənəgu taza' gawas ba mi' enti nə dwaðəwai, tən gaki ti pəl'i alheli, ti gunə də pəl'i'kin mal ki lya ne' ləba ki ge' gu ki watlin; ti bətlkin ulki dəmi iye, ti njəkənkin nə hwoltugi."

¹⁸ Mus nə shiləngi, nə ngeskən sə hane mbalən hadaya gawasən.

¹⁹ I Yahudawa yen pe'te' Antakiya nə Ikoniya is shel mbaləni. Is lalla' Bulus is dəlti kal gatli, si yenti kənə ta məccı.

²⁰ Amma i mi' bətl Yesu kal is dopga is gadəlti, i' hilya ippaltya ge' gatli. Lucili is lə Dalba isə Balnabas.

Patl te' Antakiya age' Suliya

²¹ Is dlim shilən ki Lya a ge gatli is mbi mi' bətl Yesu kal dibəli. Iki is paltya Listila nə Ikoniya nə kuma Antakiya,

²² Si ndəlli' mi' bətl Yesu kal mbadli, si dəlissi kəm sə' dlib tən la'ti mbalwasən. "Nə bəna mul dibətl kən tən ten ge' gu' ki Lya," Is usu.

²³ Bulus nə Balnabas is ol-lisi mi'kina hu lu dobga ki mi' bətl Yesu kalu kəni, nə shilən nə Lya nə ngap tibi, is za'si a toh də Lya, gunə tənti sə la' mbadlu.

²⁴ Nəs pa' du' a Bisidiya u, is mbə a Bampiliya.

²⁵ Nəs dləm shilən ki Lya a Balyiyata u, is su Ataliya.

²⁶ Te' Ataliya is paltya Antakiya ge' kudələn ki mal, ge'

lu' u nə tedi shilən nə Lya gawasən da u is mbi alheli ki pa'ti kyautən da.

²⁷ Mbəkəshtiwən tyaka, is domi mi' bətl Yesu kal ga is dləm mus ulnə Lya pəli tu' ma'si u, nə kan una' buldlabi imi' gənə bə Yahudawai u mbi pe'tu.

²⁸ Is ləm dəp tya ka ne' mi' bətl Yesu kal.

15

¹ I mbalən yen pe'te' Yahudiya is mbə Antakiya si kulci' mi'bətl Yesu kal: si usu "In a səlkin kan u nə mbidli ma' Musa u wai u, kikən mbi' pe'kəltwai."

² Tən shilən gu mbəlli ki Bulus nə Balnabas shotti bi mul ndəlti ne' si. Is la'ki təkə Bulus nə Balnabas, ne' mi'bətl Yesu kalen, sətto Ulushelima ma' milshinkən ne' kolsi tən shilə ni.

³ A si tən shitu wasən, kələ' tya pinikiya nə Samaliya, i Ikilisiya la'si shitu, asi dlib kan unə ginə bə Yahudawai u bəl Yesu kal. Shilən gu i laki mus mi'bətl Yesu kal is kum hwoltugi.

⁴ Nəs mbəkəci Ulushelima u, i mil Ikilisiya nə mil shinkən nə kolsi ulisi dem, sine is dlimisi mus ulnə Lya pəli tu'ma'si u.

⁵ Na mi'bətl Yesu kalen, mi'bətl dalika ki Palisiyawa is hilya is usu, "Ginə bə Yahudawa wai u nən sətsi la'si nə ngesi amus səbbəl zhil ki Musa."

⁶ I milshikən ne' Kolsi is maga sə'ya shilən u.

⁷ Kal ki shotti bi wasən mul ndəlti, i Bitlus hilya idləmisi shilən: "Yelsəni, kimanini te'

ge' cinyen te' ka Lya a wolin
nən ge' kini, abi daka ginə
bə Yahudawa wai u sə'kum
shilən ki Lya as la' mbadli.

⁸ Lya mul ma' mbadli, ta
mbo toh i ta ndə'nəsi i, hal
ibbəlsi Yal ki mbatl ki Lya
mul gunti, kan unə' bəlmi u.

⁹ Ta bwas dlominən
ne'siway, gaki ta okəl mbadl-
wasən taka i gaki la'ti
mbadlwəsən.

¹⁰ Gaki nəgu, ya lakiða iki
lyap cimbətl Lya da, ka zi
mi'bətl Yesu kali kaya unnə
mini ne' mi'zə' mi'zə'mini ma,
mamanən kanti wai u?

¹¹ Ma la' mbatl tən alhelı ki
Yesu mə mbi pe'kətl da, kənə
kan u nəs mbi u."

¹² I mus hwu' mbalən i
dəm shot, si gakki' Balnabas
isi Bulus kəm, nəsi dləmissi
gagashintu nə Lya pəli ge'
ginə bə Yahudawawai u
tu'ma'si.

¹³ Nəs paki u, i Yakubu
shiləni. "Kini yelsəni,"
Kumənnəni.

¹⁴ Bitlus dlimmimmi kan
unə Lya gob likənti i otl
mbalən ge'shin wasi te'ge'
ginə bə Yahudawawai u.

¹⁵ Shilən ki mi'nje shinkən
nda'ce kəndə nəgu, kan unə
daki laci' u:

¹⁶ "Kal ki gu an palti,
dadənu akən libi ki
Dauda gunə nda u.
Ankənti a dlilli ləbi.

¹⁷ Gaki tə mbalənyi nə sa' i, sə
ngau Lya da,

hal ne' ginə bə Yahu-
dawawai u nədə mbe'
shin i u, Lya usu, mulnə pəl
usi u."

¹⁸ Ləba ki Lya ki manida
mati tun tedi.

¹⁹ "Gaki nəgu, yenti ini,
ginə bə Yahudawa wai u,
a mbunwai tən zisi bal
uləngawai mi'patl te'ma' Lya
i.

²⁰ Age' shuki nəgu tən lac-
cisi an dlimisi bəs dəm ulki
dami ki lya ki mi'pətgontwai,
nə pətl kontwai, nə dab
tlu'unə bə apocwai u, nə dab
hwula.

²¹ Gaki shilən ki zhil ki
Musa a dlimən dli mus
ge'gatlı tun tedi, də dləp lashti
ge' lu dopga ki Yahudawa
hwu gas cin shutu kənə."

Shin kən ki mi'dlitl shilən

²² I milshinkən, nə kolsi
nə mus mi' Iklisiya mus
is kəndə səppəkəl gen age'
si as shinsi tya Antakiya
nə Bulus isə Balnabas. Is
pekkəl Yahuza (gunədə mbet-
tiki Balsaba u) nə Sila, si
mi'kinani ge' mi'bətl Yesu kal.

²³ Is bəlsi shinkən ki lwat-
batı mul ussu, Ma' yelsini
wakən milshinkən nə kolsi,
mil bətl Yesu kal, ma' yelsəni
inən ginə bə Yahudawawai
u ki Antakiya, nə Suliya nə
Kilikiya: shinniti.

²⁴ Mə kumi gen pekki də
ge'mi bə nə ndətinənwai, si
tləlinkin kin mbadli, ulnəs
dlimi u a də hwotı kini.

²⁵ In ndəgi musinən tən
pekkəl gen inən an shinsi tya
ma'kini nə yelənsi inən ki
Balnabas nə Bulus,

²⁶ mbalən ginə bəlgawasən
gaki shinkə Yesu Almasihu u.

²⁷ Gaki nəgu, mashin
Yahuza nə Silas sə' dlimikin
ulnən laci u nə biwasən.

²⁸ Gaki a mbuni Yal ki
mbatl ki Lya i nə mi, bən

zakin ulən mul dibətl aga tə ngətl ginə də lyapdli u wai.

²⁹ Bə damən ulnəs poci lya ki mi'pətłgontwai, nə dap tlı nə hwula gibi, nə dap tlı u nəs modəli' yalu nə pətya ne' mbałən. Kən dəmti lau ən ka zakən pətl undi gi u. Se agason.

³⁰ Sine nəs pallisi bi u, is su swa Antakiya, aləbi is dom mi' Iklisiya is bəlsi lwabbati.

³¹ Nə mbałən dləm lashti u is kum hwol tu' nə shikən ki ndəlli' si mbatlu.

³² Yahuza nə Silas, si ma gawasən mi'nje'shinkən kəni, is dləm shilən ki ndəlli' si mbadli iye.

³³ Kal ki ləp muttwasən tyaka, i mi'bətl Yesu kal pallisi bi nə hwoltugi, is paltwa ma'ginə shinsi sudi.

³⁴ Silas yeni ambuni tətdəm ləbi.

³⁵ Amma Bulus nə Balnabas is dlil a Antakiya, aləbi si ne' gen dibəli asi kulci'si shilən ki Lya.

Bulus bwassi isə Balnabas

³⁶ Kal ki ləpmitti i Bulus ul Balnabas usu, "Tən paltyai ma' mi'bətl Yesu kal ki ge'gatlu nə mus nən dləm shilən ki Lya da u an ya kan unə si da u."

³⁷ Balnabas də lyamti sə' zəga nə Yahaya, gunə də mbetti ki Malkus, ne'si.

³⁸ Amma Bulus yeni a mbuni sə' zəga ne'twai, gaki ta za'si a Bampiliya i, ta beukina ne'si də kyautəni wai.

³⁹ I ləshi manti tegge' dlomwasən, Hal is bwassi. I Balnabas kan Malkus is

te'ge' kundələn ki mal is lətya Kublus.

⁴⁰ Amma i Bulus wol silas is zəga, mi'bətl Yesu kal is shilən nə Lya gawasi tə alheli ki Lya bəli nəti.

⁴¹ Is du tya ge' atl ki Suliya nə ki Kilikiya, ti ndəlli' Iklisiya i mbadli.

16

Timothy bəl ki Bulus kal isi Silas

¹ Bulus mbə a Dalba nə a Listila. Mul kushti wonda mul shin Timothy, dyawasi mul Yehudiya ni, ti mul bətl Yesu kal kənə amma bwasi mul Helinawa ni.

² Mi' bətl Yesu kal ki Listila nə ki Ikoniya si dləb zo' shilən tənti.

³ Bulus də lyamti sə' zəga siti, is zəga siti i' səlti da gaki Yahudawa yi nədə dəb a ləbi u, mus simani bwasi mul Helinawani.

⁴ Nəsi bətl gatl nə gatl tya u, is gob dlimi' mbałən zhilu nə mi'kina ne' kolso ki Iklisiya kəndə a Ulshelima u, gaki tə mbałən shindəl ga da.

⁵ Nənəgu i mi'bətl Yesu kal ndəndəl ge' la'ti mbadlwasən da, hu gasi ukəni si mbil tənki.

Tlu'ti ki Bulus tən mul ki Makidoniya

⁶ Bulus nə mbałənwasi is gadəl atl ki Pilijiya nə Galatiya, gaki Yal ki mbatl ki Lya a ndəgisi i sə'dləm shilən ki mulban age' atl ki Asiya wai.

⁷ Nəsbə tən bisi ki atl ki Misiya u, is lyami səttege' atl ki Bitiniya, amma Yal ki mbatl ki Yesu a ndəgisiwai.

⁸ Is bəli malgən Misiya, is beu swa Talwasa.

⁹ A gasi i Bulus tlu ki tən mul Makidoniya tikə dləlli ti ngepti, "Mbə a Makidoniya ki dəlmi."

¹⁰ Kal ki tlu'ti ki Bulus, in hilya də lə' Makidoniya, ma mani i Lya kən taki mibi tən dlimisi shələn wasi.

Lidiya ta Ndənə Lya i

¹¹ In hilya də Taluwasa in tege' kundələn ki mal illə tyə Samutalas, lucili illə Niyabolis.

¹² Te' ləbi in zəga tyə Pilibi, gatlu nə Lomawa pəlisi gunti bal gatl kənə Macidoniya. Illəm mutti tyaka.

¹³ Gas cin shuti in pe' abidlabi gatl in su dləlka, ge'lu' u nəmi la'ti mbadli mən mbj' lu shilən nə Lya u. In dəm atli in gob dləmi' mudlə i nə domga ləbi i shilən.

¹⁴ Nəm ge' mi'gaki'mi kəm kəli ki ge' gatl ki Tayatila mul shin Lidiya, mul utl gou lulut taka, mul bətl Lya kəni. I Lya bul mbadlwasi i' ga'kəm tən shilən ki Bulus.

¹⁵ Kal ki pəl'i' kəliyi baptismal ne' mi' libiwasu, im mbemi bi a libi da'ka. I' usu "Ən ka ndə' ni ami mul bətl Lya kal kən u," "Nganni ki' dəmni libi daka." I' shelmi.

Kəndə Mi'kina a Ge'lu Kənd Mbalən ki Pilibi

¹⁶ Gason mi zə'ga ge'lu shilən nə Lya, in ma ne' zheli yakən kəli mul yallu, ti domi' mulbanwas ləba nə yalluwasu.

¹⁷ Ibbəl Bulus kal ne' mi, a ti la'ti Yal, "Mbalən gi mi' ki

Lya kəni, si dlimi' kin shitu ki pe'ti."

¹⁸ Ip pətl gu mutti dibəli. Il le'ci Bulus lo'si i' yalu kal i' ul mul yallu isu, "Ge' shin ki Yesu ami bətl ki zhil pe' dəge'ti!" Aləbi i mi'gatl za'ti.

¹⁹ Nə mulban yeni shitu mbi' ulpwasən a caku, is gob Bulus nə Sila is dəlsi swa bi lu dobga ki utl ləba taka akina də mi' pətl shilən.

²⁰ Is təlasi kina də mi'pətl shilən is usu, "Mbaləngi Yahudawani, ko animi si tləl'i'mi gatl lya.

²¹ Si kulci' mi shilən u nə bə ambuni tən bəlivai u təngaki mi Lomawa ni."

²² I hwu mbalən dopga tən ki Bulus isə Silas, i mul pətl shiləni laki tə tusisi lu' ləgəl a li'si nə kumbəl ki dom.

²³ Kal ki li'tisi iye, is la'si age'lu kəndə' mbalən, i la'mul kəndə' mbaləni təp bu'si ki zoki.

²⁴ Nə' kan zhilu u, is sulsi swa gibi i' ki ndəsi tən ancın ki ngapti asən.

²⁵ Age' dlom gasi Bulus nə silas si shilən nə Lya asi utl ul ki natl Lya, nami' ki ge'lu kəndə mbalən də gakisi kəm.

²⁶ Nəgu katl, i pəl bal ukkə atli sai nə gəsbi ki lu kəndə mbaləni uni. Aləbi aləbi i dləbi ki lu kəndə mbaləni buli, i mus zhim dom ki kəndə mi'ki kəndəyi bəbatli.

²⁷ Nə mul kəndə' mbaləni hilya u, nə' en dləbi ni ki buli u, ittus bal pəga tətl tlogawasi, gaki ti yenti mi'kə kəndə i sa kitəli.

²⁸ I Bulus tləl Yal i usu, "Bə kumi gawa!" Ciwowai mus-

inən mida!"

²⁹ I mul kəndə mbaləni ta' bi tə mbəlli' cilti, is su givi in nda kina də Bulus nə Silas nə nepti ki dli.

³⁰ I ki ippekkəlsi totldla i' usu, "Mi'kina, ya tapəli ta mbi pe'ti da u?"

³¹ Is ndəgi, "La'mbatl nə Yesu, kən mbi' pe'ti ki nə libiwagi."

³² Iki is dləmi' shilən ki Lya ti mus ne' mi'libi wasi.

³³ Age' gasu imul kəndə mballəni yemsi i' okkəlisi usuwasən takə; Aləbi ti mus ne' libiwasi i pəlisi baptismə.

³⁴ Im mbəlsi libi dəkka im mbəllisi ulki dəmi; in njəkən nə hwol mbadli gaki ta la'mbatl nə Lya i mus nə mi' libiwasi.

³⁵ Nəlu cilu, i mi' pətl shiləni shin mil shinkən ki guu, summa mul kəndə mbaləni nə zhil: "Tə za' mbalən i."

³⁶ I mul kəndə' mbaləni ul Bulus su, "Mi'pətl shilən a bil zhili ki tə zakkini ki zənga. Nə guni kən ma'zəgga. Zənga nə hwol tugi."

³⁷ Amma i Bulus ul mi'kina i su: "Age' mbalən kən sə l'i'mi bəma pəlisi ulənwai, mus nə mima Lomawa u, is la'mi ge'lu kəndə mbalən. Nəgun si lyap pe'kətl mi shota? Hwe səm mbə nəgawasən səppəkkəlmi.

³⁸ I mi' kəndə dlom mi dlimi mi'pətl shiləni, nəs kumi Bulus nə Silas mi' Lomawa u, is kum bənti.

³⁹ Is mbə də ngep pashti ma'si, is pekəlsi də ge'lu kəndə mbaləni, də ngepsi sə'za'gatli.

⁴⁰ Kalki pe'ti ki Bulus nə

Silas dəge' lu kəndə mbalən u, is lə libi də Lidiya, lu unəs ma ne' yelsəni mil bətl Lya mwani nə mudli is ndillisi mbadli. Is zəga.

17

Dlati a Tasalonika

¹ Bulus nə Sila is beu tyə Ampibolis nə Apolloniya, is mbə Tasalonika, lu u' nə lu dobga ki Yahudawa da.

² Kan unə kuda u, i Bulus te'ge' lu dobga, gas cin shuti maki ati shoti bi ne'si ge' lwabbati,

³ Ti dlimissi nə ndəlti tən Almasihu nən tlebbəna atl hiliya dəge' mi'məshti. I' usu, "Yesu u nə ami dləmikini u tikə Almasihu."

⁴ Genge' Yahudawa is dəgi is maga nə Bulus isə Sila, nəgu hwu' mi' Helinawa mi'bənti' Lya ne' bas mudli bə tengulen wai.

⁵ Amma na Yahudawa yen kum dutugi; is yem mi' ndətl ki ga tye' ge'lu utl ləba takə, is dom mbalən is tləl dlati age' gatli. Is lə libi ki Yason, si ngau Bulus isə Silas gaki səppəkkəlsi to' kina də hwu' mbalən.

⁶ Ama nəbə sa mbisi wai u, is dəl Yason ne' na mi'bədl Yesu kal te' akina də mi'kəndə' dlom kige' gatli, asi la'ti Yal si usu: "Mbalən i nə də tləl gatllyə i sinngi sa mbəki i,

⁷ i Yason njesi libi də'ka. Muswasən si nge' bətl zhil ki Kaisal, si usu, gu wonda, si mbeti ki Yesu."

⁸ Nəs kum gu u, i hwu' mbalən ne' mi' kəndə' dlom kige' gatli i mbadlwəsən tləh.

⁹ Sa za'si pa is zəgawai sai nəs kan up əatlət ma' Yason ne' yelsəniwasi.

Mi' kina a Biliya

¹⁰ Nə gas pə u, i mi'bədl Yesu kal shin Bulus nə Silas Tya Biliya. Nəs mbəkəci tyā ka u, is tege' lu dobga ki Yahudawa.

¹¹ Yahudawa ki Biliya ngətl ki Tasalonika nə zo' mbadli, gaki sa kan shiləni nə lyamti, asi ya' lwabbati hu anəmi sə' eni ko ulnə Bulus dlimi u balini.

¹² Gaki gu, dəbəli ge'si is la'mbadli, hal ne' bas mudli ki Helinawa ne' mwani Helinawa dibəli.

¹³ Amma nə Yahudawa ki Tasalonika kum Bulus də dləb shilən ki Lya a Biliya u, i gen lə tyaka asi co'tisi asi tləl mbadlwəsən.

¹⁴ Aləbi aləbi i mi'bətl Yesu kal shin Bulus tya dləlka, amma Silas nə Timoty is dlil a Biliya.

¹⁵ Gini la' Bulus shitu i is mbilti a Atina, i Bulus za'si nə zhil səppi Silas nə Timothy sə'su mbəti.

Bulus a Atina

¹⁶ Nə Bulus də buttisi a Atina u, i'kum dutugi gaki gatli a njikən i nə lya ki mi' pətl gonti.

¹⁷ I' gob shotti bi ne' Yahudawa nə Helinawa mi'bənti' Lya age' lu dobga ki Yahudawa, nə ge'lü dobga ki ulti nə ulti taka hu cin u kənə ginə ta mbisi ləbi u.

¹⁸ I dobga ki Abikuliyawa nə Sitokiyawa mi' ma' ləba is gob shotti bi ne'ti. Nami ge'si ngemi, "Ya mul shilən hutu də lyap dləmti ngu?" I gen

usu, "Də yedli mul bətl lya ki Atlen kəni." Sə dləmən gu u gaki Bulus də dləp shilən mul təmti tən Yesu nə hillya was ge' mi'məshți.

¹⁹ Is kanti is tolti tən dəni ki Alasa, lu unə mil dlətl shilən də dopga da u aləbi is ultisu, "Kən dlimimi yakən pyal kushti u də mbillitiya?

²⁰ Ki mbəllimi səmbəl shilən a kəm dəmi, mi' lyamti tən man ulnə də dləmti u."

²¹ (Mus Atinawa ne' səmbəlsi ginə də dəb Atina u, si dəb katl ba pətl ulən, amma sai kub səmbəl shilən, nə mbəlti tənki.)

²² I Bulus hilya a dlom ki mi' dlətl shilən i' usu: "Mbalən ki Atina! Ayeni i hu tən shitu u kəni kini mi' ngau ma' Lya kəni.

²³ Nə ami duttya u, ami ya' ulnə ki pəli' mi'bətl Lya u, hal ya mbi bagadi ki kyetl ləba nə lashti tənki də usu: Tən Lya u nə bə mantwai u. To ulnə ki bəlti kalu ki manəntwai gu a mbə ta dlimi kini.

²⁴ "Lya unə pəl dəb ləba nə mus ulnə gibi u tikə Lya ki lya nə atli tida dəbge' lu dobga u nə mbałən kəni nə toh uwai.

²⁵ Nəgu ni tida ngau dətl ma' mbałənwai. Amma t inə gawas kən tibəl mus mbałən dli nə shu'ti nə mus ləba.

²⁶ Tən mul nəm kən təpəl mus mbałən, gaki sə dəb hu una adəp ləba da; idillisi dəmtwasən nə bisi ki atlwasən.

²⁷ Lya pələn gu u gaki sən ngauti da agon as mbiti, ko nə bə tida lolu nə nəmi nən

wai u.

²⁸ 'Gaki tu' ma'ti mə mbi dli da, ami malləd da nə ndal ləba inən da.' Kan unə na mi' utl ulwakən dlimi' u, 'Mima u nduwəs kəni.'

²⁹ "Gaki nəgu tun nə mini gəski Lya kən u, məkən usu kənə zinaliya ko azulpa, ko yegən wai, ulnə mulən pəli' nə mantı wasi.

³⁰ A te'bo Lya a zakən mbalən ge' ləshi matiwasən, amma nəguni ti bəl mbalən zhil hu a una səppal tem ma' Lya.

³¹ Tun nə ta zi dəbləba cin ki zə' batlti ki ci'gontu, tu' ma' mulnə' la'tu. Tən tləlti mulu də ge' mi'məshti ila mbalən də ndəti."

³² Nəs kum shilən ki mi'tləllyə ge' mi'məshtu, i nami la'ki'bi, amma i nami usu, "Mi lyab kub ki dadfanu tən shilən u."

³³ Tən gu Bulus za'si.

³⁴ Nami ge' mbaləni is bəl Bulus kal is la'mbadli. Age' si hal ni Diyonisiya, yakən majelisa ki Alasa, nə kəlion mul shin Damalisa, ne'gen.

18

Bulus a Kolanti

¹ Kalkə gu, i Bulus za' Atina illə Kolanti.

² Tyaka is ma isə mul Yahudu won mul shin Akila, atl zətti ki Pantas, ta ləndəb patl su' Italiya uwai nə kəli wasi Biliskila, gaki Kalaudiyas bəl zhil mus Yahudawa sə'za' Loma. I Bulus lədə yas si.

³ Gaki kyautən wasən nəm kəni ki tlottli tanti ni, iddəmi ati kyautən ne'si.

⁴ Mus cin shuti ati shotti bi nesi a ge'lü dobga ki Yahudawa, ati tle ga ki Yahudawa ne' ginə bə Yahudawa wai u.

⁵ Nəki Sila nə Timothy pe'te' Makidoniya, i Bulus gob mbətl dləb shilən ki Lya tənki, ati mboki Yahudawa toh Yesu tikə Almasihu.

⁶ Amma is nge dləmti ki Bulus asi byatlti, ibba bat lulutwas taka i' ulsisu, "Hwula wakən a ga wakən! Ulən alakən wai. Nəguni an ləti ma' ginə bə Yahudawai u.

⁷ I Bulus za'lü dobga ki Yahudawa illətən dləbi libi ki Titus Yustus, mul bədl Lya libi wasi nja nə lu dopga ki Yahudawa.

⁸ I Kilibus, mul kina ki lu dobga, ne' mus libi wasi is la' mbatl nə Lya; Kolantiyawa dəbəl mi' kub Bulus is la' mbadlə i pəlisi baptisma.

⁹ A ge' gason i Lya shilən nə Bulus ge' tlu'ti: "Bəkum bəntwai; gob shilən ki Lya, bi dəm shotwai.

¹⁰ Gaki ami miki, mulən kən tile' ki dlati a' kumi' ci-wowai, ami nə mbalən dibəli age' gatlu."

¹¹ I Bulus dəm a Kolanti ti kulcissi shilən ki Lya, hwon nəm nə bwasti dlom.

¹² Amma nə Galiyo də mul kina ki atl ki Akaya u, i Yahudawa ki Kolinti is maga is tlih Bulus nə mbatl nəm is mbəlti akina də mi'pəlt shilən.

¹³ "Mulgu," si usu, "Ti tle ga ki mbalən səbbəl Lya tən shitu u nə bə zhil kən wai u."

¹⁴ Nə Bulus də lyap shilən u, i Galiyo ulsisu, "Kini Yahudawa ki shilən tən lati asən gibə u, tə kapbi pəldli ma u, da

an gaki' kin kəm.

¹⁵ Amma tun nə shoti bi katl ki ləntu, nə shin nə zhil lwakən u likən nə gawakən. Akən shilənti tən undə giwai."

¹⁶ Iki i' katsi taka də bidla pətl shilən.

¹⁷ I mbalən ki ləbi is gop Sastanisu mul kina ki lu dobga is li'ti a kina də lu pətl shilən; amma Galiyo ta pəl ulən tən kiwai.

I Bulus pal tya Antakiya ki Suliyə

¹⁸ I Bulus ləm mutti a Kolinti. Is za' yelsəni mudli nə mwanae it tege' kundələn ki mal illə Siliya, nə Biliskila nə Akila. Kapin təzzaga, i' utl ga taka a Kakiliya gaki dləlti u nə' pəli u.

¹⁹ Is mbəkəci Apisa, aləbi Bulus za' Biliskila nə Akila. Tinə gawasi it te'ge' lu dobga ti shotti bi ne' Yahudawa.

²⁰ Nəs ngemti təl ləm dəp ne' si u, in nge.

²¹ Amma nə' pal bi ne' si u, i' usu, "Anpalti tedfi in Lya a ndəgu." Iki is za' Apisa i' tege' kundələn ki mal.

²² Nəm mbəkəci a Kaisaliya u, illə Ulshelima it shin ni Iklisiya iki illə Antakiya.

²³ Kalki ləb muttwas tya Antakiya, i Bulus hiliya dələbi i' gob lət tya ge' lu nə lu ge' atl ki Galatiya nə Palijiya, ati ndəlli' mi' bətl Yesu kal mbadli.

²⁴ Iki i mul Yahudiya won mul shin Apolos, atl ki zətti ki Iskandaliya, immbə Apisa. Mul malləba ni, tə man shilən ki Lya ki lwabbati iye.

²⁵ A kulci' shitu ki mal Lya yi, ti shilən ki Lya nə mbolti,

ti dlib ləba tin Yesu kənə kan unə da u, amma baptisma ki Yahaya tə mani katl.

²⁶ Iki gob dlib shilən ki Lya bə nə bultwai age' lu dobga ki yahudawa. Amma nəki Bilkisu nə Akila kumtu, is mbebbi a libi dasi ka is mbəl dlimitti shitu ki mal Lya da iye.

²⁷ Nə Apolos lyam dəkəshti tya Akaya u, i yalsəni dəlti is laci mi'bətl Yesu kal sən njeti in ta mbə u, Mbəkəshtwasi ma ginə lambatlı nə Yesu tu tən zo' ləba ki mulban i dəm nə dəlti iye tənsi.

²⁸ Gaki ta la' Yahudawa nə shotti bi mul ndəlti iye ge' mbalən i, ti dlimissi tu' ge' lwabbati Yesu tikə Almasihu.

19

Bulus a Apisa

¹ Apolos a Kolanti, i Bulus gandəli ge'atli immbəkəci Apisa. Aləbi immbi mil kushti yen.

² I' ul sisu, "Nə' lakən mbadlu ka mbi Yal ki mbatlı ki Lya wa?" Is ndəgi, "Is ultisu, ma kum mbəkə Yal ki mbatlı ki Lya wai."

³ I Bulus ngemi, "To unndə baptisma ukən ki mbini?" Baptisma ki Yahaya ni is usu.

⁴ I Bulus usu, "Baptisma ki Yahaya bo baptisma ki za'ti bezən ləba ti pəlti. Ti dləmi' mbalən səlla' mbatlı nə mul mbə ge' kalwası, tiki Yesu."

⁵ Nəs kumi nə gu u, i pəlisi baptisma ge' shin ki mulban Yesu.

⁶ Nə Bulus zisi toh u, i Yal ki mbatlı ki Lya mbisi, is

gob shilən nə biyen, asi dləb shilən tən ləba ki Lya.

⁷ Si mus mbalən kutl nə lop kən katl.

⁸ I Bulus tegge lu dobga ki Yahudawa ti' dləb shilən ki Lya bənə bantwai lii maki, ati shotti bi ne' si ati patlsi tettən shitu guk ki Lya.

⁹ Amma i nami pəl ndətl ki ga is nge la'ti mbadli, si byatlı shitu i akina də mbalən. I Bulus za'si, I' emmi' bətl Yesu kal ati shilən ne' si hu cin ukəni age' lu kushti ki lashti a Tilanas.

¹⁰ Hwon lob adə pətl gu, hal i mus Yahudawa ne' ginə bə Yahudawa wai u, ginə də dəb ge' atl ki Asiya u, is kum shilən ki Lya.

¹¹ Tu' ma' Bulus, i Lya pəl gagashin gunə bə a ki də pətl dliwai u

¹² Hal hankicin ko lulutwasi in sa tile mi' gontu, as ndoki a du mi' gatli za'si.

¹³ Na Yahudawa yen ginə də duti də katti du mi' gatli is lyap pətl shilən nə shin ki Yesu tən mi' bəna nə du mi' gatli. Si ussu, "Ge'shin ki Yesu unə Bulus də dlib shilən wasu, ami bətl kin zhil ki pe' ni."

¹⁴ Mil nin ngi ki Siba, bal ləba ki Yahudawa, sidə pətl gu.

¹⁵ Gason i du mi'gatli ulsisu, "Aman Yesu, a man Bulus, amma kini ki wokəni?"

¹⁶ I mul du mi' gatli pe' lya inndesi ga inngətl si nə ndəlti mus. Ippəlisi li'ton hal is pe'də libini nə kitəl bə nə lulutwai nə hwula adli.

¹⁷ Nəgu, man dli ge' Yahudawa u, ne' Helinawa mi'

dəp Apisa, i kummwasən butl gobsi, i shin ki Yesu mbi nalti.

¹⁸ Dibəli ge' mi' la'ti mbadli is mbə bə ki hwuniwai a si dləb ulnəs pəli u.

¹⁹ Mbalən dibəli mi' pətl gonti is mbil ulpətl gontwasən ge' lu kənəmi i kwetldli a kina də mbalən. Nəs cimbəl natl ki lwabbatu is en nən pət up ki azulpa zangu kutl ləbi nəntam.

²⁰ Tu' nəgu i shilən ki Lya mbəl tənkı nə ndilti.

²¹ Kalki ndakkə mus usi, i Bulus kəndi ge' mbadlwasi təs su' Ulshelima, abbəli tu' Makidoniya nə a Akaya. I' usu, kal ki alə tya ka, nə ngessi kən ta suti Loma."

²² I' shin lop mi' dətlti, Timothy nə Alastas, swa Makidoniya, tine inna' ləmdəp ge' atl ki Asiya.

²³ Age' cin u ndəl dlakən pəl dli a tən shitu ki bətl Yesu.

²⁴ Mul guptishugupon da ti gubti palpalu mul shin Dimitiliyas, mul pətl Azulpa ki lu dobga ki Altimas, də mbəlli' mi' pətl ulti nə ultitaka ləkkina aləbi.

²⁵ Immbe sibi ge' lu kənəmi, ne' mi' kyautən ginə də pətl undi ulti nə ulti taka u, i' usu: "Kini yelənsi, ini ki manini ma mbi ləkkinaki zoki i tən ulti nə ultita gu i.

²⁶ Ki yenti a ki kumti kan unə mi' bətl Bulus kal də tle ga ki mbalən aki a Apisa, nə mus Atlki Asiya. Ti usu lya unə pəldli nə toh u lya kən wai.

²⁷ I ngu kuma bəna da kina kəni, bə ulti nə ultitaka u ti hwol zo'shin wai, amma hal nə bal libi ki lya ki Altimas

nən dəmti kənə baliwai; ginə də bətl lya a Asiya nə tən dib ləba u, nən bwastiti nə naltwasi."

²⁸ Nəs kum gu u, i mbatl lewisi is tləl yal lya: "Natl tən Altimas ki Apisawa!"

²⁹ Ləbdəb ten i gatli hwodəli. Imbalən gob dətl Gayus nə Alistalkus, yelənsi dukkə Bulus su' Makidoniya, muswasən is dlewsi tya lu dopga.

³⁰ Bulus lyam lə' kina də hwu mbałən, amma imil kushtiwas haneti.

³¹ Hal ne' na bas mbałən ki atl ki Asiya, yelənsi ki Bulus, is taki' shinkən tən bəga shelti təppə' dlawai.

³² Mbałən i nə dom ga u is hwodəli: Nami də tləl Yal də dləb gwasən a gen də dləb gwasən. Na mbałəni səman ulnə lakida is domga uwai.

³³ I Yahudawa kəge mbałəni is jakən Iskanadali tya kina, is tləl Yal si pətl shilən tənti. I' uu toh tə dəm shot gaki bulti' dlati.

³⁴ Amma nəs mani mul Yahudiya u, i mus sə tləl yel lya ki dom lop: ası usu, "Natl tən Altimas ki Apisawa!"

³⁵ Nə mul kina ki Lashti lwabbat kəge' gatli shel mbałən u, i' usu: "Kini Apisawa, okən mani ki gatl ki Apisawa də butti bal libi nə shishiptioni ki Altimas swai, nə yegən u nə nda sul lya uwaiya?"

³⁶ Tun nə bəkən ma'shot tibi tən usi wai u, nən mbunti ki mudələn mbadlwakən bə' pələn ulən nə kitilwai.

³⁷ I ngu ka mbəllən mbałən

i ki i, si kuma sa məgəl age' libi niwai bə sa pəl bezən ulən aləbi wai.

³⁸ In Dimitiliyas ne' yelənsi ultitakawasi shilən nisidə ne' mulən u, lu pətl shilən kənngi ki ʃuli mi' dlətl shilən kənngi. A' təla dləmti.

³⁹ Amma in ulən ki lyab mbəlliti u, to a' telen kina də mi' dlətl shilən.

⁴⁰ Nəguda mige' bəna ki, pətl shilən ki nditl kiga ki ulnə nda səti u. Tən shilən gu məkən ma' dlib ulən tənkiwai, tun nə bə shutu was dawai u."

⁴¹ Kal ki dləb gu, ippalli mbałən bi.

20

Bulus a paltya Makidoniya nə Hellas

¹ Kal ki mutti ki mbatl ki mbałən, i Bulus mbe milkushti was bi kal ki ndəllissi mbadlə, ippallisi bi illə tya Makidoniya.

² Iddu tya ge' ləbə, ti dləmi' mbałən dəbəli shilən ki ndətlik i mbadlə, ngwaltwasi immbəci' ge' atl ki Hellas,

³ akikən tə dəmmi li maki. Nə na Yahudawa yen akəndə biwasu, nə' bal nja ki tə' tege' kundələn ki malu təllə Suluuya, i' kəndi tə patl tya tu' Makidoniya.

⁴ Ti issə' Sopata yakənkə Palus te' Beleya, Alistalkus nə Sakundas mbałən ki Tassalonika, nə Gayus mul Dalbe, Timoti nə Tikikus nə Talopimas, mbałən ki atl ki Asiya.

⁵ Mbałən ginəs zəga kina u is ʃummi a Taluwasa.

⁶ Amma in za' Pilibi ge' kundələn ki mal kal daddabəl

gunə bə yisti nit dawai u, in mbisi a Taluwasa kalki mutti nantam. In dəm ləbi mutti ningi.

*Dopga ki patl bi a
Taluwasa*

⁷ Ge' cin ki nəm ki mutti ningi in mbə də dəmti ki catl bəledi. I Bulus dləmi mbałən shilən, gaki ti lyab zə'ga lucili, i' gob dləb shiləni hal a dlom gasi.

⁸ Cilti da dəbəli ge' libi ki lya u nən domga da u.

⁹ Yakən gidənsi won ti ki dəmi tən dləbi ko' yetil mulshin Aptikos, i yemmbu' kanti nə Bulus ləndəp də shilən u. Nə yemmbu' kantu, tikə dəmi ge' kəps ki lya mul lu tom maki innda su'atli i kanti hwuni.

¹⁰ I Bulus pe'su' atli, im muttwatən yakən gidənsi isi it kucenti, i'usu. "Bə hwok kiniwai," "Ti kami!"

¹¹ I ki ippal twage' kəps ki lya ni daðanu itcel biledi it dami. I' gob shilən halcitlkəlu izza' ləbə.

¹² I mbałən kan yakən gidənsi i tya libi kahmi, is kum hwoltugi iye.

Bulus palli Kolsi ki Apisawa bi

¹³ Mine in ndakina in tege' kundələn ki mali illə tya Asus, ge'lu unə tən kan Bulus da u. Nəgu tə kəndini tən təllə tyaka tən asən.

¹⁴ Nəm mbimi a Asus u, inkanti ge' kundələn ki mal in mbə a Mitilini.

¹⁵ Lucili in tege' kundələn ki mal tekka in mbə'ci a Kiyoş. Lucili danu in dəkəci

tya Samas, lucili danu in mbəkəci a Militas.

¹⁶ Bulus kəndi təd dəkəsh Apisa ge' kundələn ki mal gaki kitəli' dlət a Asiya, gaki ti dleuti təm mbəkəci Ulshe lima da, in nən pətu, tən cinkə pentikos.

¹⁷ Te' a Milita, i Bulus shin shin kən tya Apisa tən kolsi ki ge'lu dobga ki shilən ki Lya.

¹⁸ Nəs mbəci matu, i' ul sisu: "Ki manən kan u nadəm ge' kini u, tun ga siu na mbə ge' atlki Asiya u.

¹⁹ Ami bətl' Lya nə zo' mbadli hal nə luu, nə bəna dəbəli na tle gaki dashti ki tu' ki na Yahudawa.

²⁰ Ki manən kan u nə bə a kum bakkə dləb ulnə nən dətli kini uwai u, ya dlimikini ge' mbałən nə libi libi bəkə hwuniwai.

²¹ Ami dlimi' Yahudawa ne' mi' ginə bə Yahudawa wai u səppal ma' Lya nə ngesi as dlim bezən ləbawasən as la'mbatl tən Yesu.

²² In ngu Yal ki mbatl ki Lya, də təntəni talə Ulshe lima, aman ulnə tə ndani ami uwai.

²³ Amani katlı hu gatlu kəni Yal ki mbatl ki Lya də dlimitəni kəndəti nə tle' bəna də buttəni.

²⁴ Ngo' nənəgu, a pal gayi ulənwai; Lyamti ki mbadlini iki ta pa' taltu a njikən ulnə Yesu bələn u, dləb zo shilən təmi ki Lya.

²⁵ Nəguni a mani muswakən kəkən yentən nəwai, kini u na bəlkin tyai də dləb shilən ki guk ki Lya u.

²⁶ Gaki nəgu, ami dləmikkin asəti, ape' dəge' alhaki ki

hwula wakən i.

²⁷ Gaki a kum bakkə dlimikkin mus ngati ki Lya wai.

²⁸ Butən gawakən, nə kuma mus hwu mbalən nə Yal ki mbatl ki Lya pəli kini, dəmni mi'zə' dwdən tənsi u, dəmni mi' byatlı mi'bətl Yesu kal ginə' ulsi nə hwulawasu.

²⁹ Amani kal ki zəgga ini, mi'dashti ki tugen nən teti ge' kini, səkən kub ciggokə hwu mbalan i wai.

³⁰ Age' kini ma mbalən yen nən tləttodi, as gəl bali gaki səddəli gawasən mi'bətsi kal da.

³¹ Gaki nəgu dlilni gal! Dambilini, hwon maki ngu aza' pikkin shilən wai gasi nə dlöncin, hal nə lu.

³² Nəguni ami za'tikin toh də Lya, nə zo shilən wasi, i likə' kini abbəlkin gado ne' mus mi'zo' mbadli.

³³ Azi dwdən tən upki ko lulut ki mulənwai.

³⁴ Kini nəgawakən ki manini toh i kən də bəltən ulnə ami lyamti u, nə ki mi'ginə ami ne'si u.

³⁵ Age' mus ulna pəli u, ami nune' kini, tu'tən botlı kyautən hwel kən tə dələn mi'ləshi ndətl də, aki dambətl shilən ki Yesu nə usu: "Bəlti ngətl kanti nə albalka."

³⁶ Nə Bulus ngwatlı shilən wasu, in ngus atl mus ne'si is shilən nə Lya.

³⁷ I muswasən is go' kulu, is kucen Bulus asi swattiti.

³⁸ Ulnə mbəllisi du mbadlu iki shilən wasu nə' usu səkən yetti nuwai u. Iki is la'ti shitu tyama' kundələn ki mal.

21

Ləkkə Bulus Swa Ulshe-lima

¹ Kal ki bwastimi ne'si, inte ge' kundələn inta'mi swa Kos, lucili insu Ladas nə Patala.

² Nəm mbi kundələn mul dəkəshti tya ge' atlı ki Pinikiya u, inte gəbi inziga.

³ Nən yen Saipulus te'ka u inpalti tən tonə, in əew kina dələ' ge atlı ki Suliya, in shiti a Taya, aləbi tə kundələn ki mali shi' kayawasi.

⁴ Nən mbi lu u nə milkushti da u in dəm ne'si mutti ningi. Tən ndətl ki Yal ki mbatl is pi Bulus bəllə Ulshelima wai.

⁵ Amma nə cin tləti nən pə u, in hilya in əew kina də ləti. Muswasən, mudli nə mil, is la'mi shitu tya kal gatlı, iki ingus a tən bəgəsi in shilən nə Lya.

⁶ Kal ki pallı' yelsəni bi inən, inte ge' kundələn, sine ispal tya libi.

⁷ In gop ləti nən a Taya u in mbəci Talamayas, inshinni yelsəni, in mun nəm ma'si.

⁸ Lucili in hilya inmbə Kaisaliya, in tye libi ki Pilibus mul dləp shilən ki Lya, gunə nəmkəni ge' ningi i' u.

⁹ Tinə mil mudli upsi, ginə bə apəl ki nditi wai u ginə də dləb ləba ki Lya.

¹⁰ Kal ki mutti ten aləbi, i mul njeshinkən ki Lya won mbə, shinwasi Agabus immbə te' atl Yahudiya.

¹¹ Nəmməbə ma'mi u, i' kan ul kəndə dlom ki Bulus i' kəndə toh nə asənwasi, i' usu "Ulnə Yal ki mbatl ki Lya dləmi u ngu, 'Nəgu Yahudawa

ki Ulshelima sən kəndə mul ul kəndə dлом u a bəlti atoh də ginə bə Yahudawa wai u."

¹² Nən kumi nəgu u, mi ne' mbalən i nə ləbj u in bəl Bulus bi bə su Ulshelima wai.

¹³ I Bulus usu, I' usu "Yakən ki kulu aki calitən mbatl da? A mibo galkən amində, amida bultti' kəndə twai sə lyami as tlo a Ulshelima tən shin ki mulban Yesu."

¹⁴ Nə bəta kum sheltwai u, indəm shot, in usu "Tə Lya pəl ulnə mbunitu."

¹⁵ Kal ki gu, in kan shitu ki su' Ulshelima.

¹⁶ Na milkushti yen te' Kaisaliya is la'mi shitu is mbəlmi libi ki mulshin Man-as-on, lu unətən dləldə u. Mul ki Saipulus mul bəl Lya hwon di bəli.

Bə'citi ki Bulu a Ulshelima

¹⁷ Nəm mbə Ulshelima u, Yelsəni inən njemi nə hwol tugi.

¹⁸ Nə cilt kəlu i Bulus ziga ne'mi swa ma' Yakubu, kolsi Ki İkilisiya mus asi da.

¹⁹ Nə Bulus shinnissi u, it'l dləmisi shilən bi nə bi kə ulnə Lya pəllitu age' mi'ginə bə Yahudawa wai u atən kyaутən wasi.

²⁰ Nəs kumi nəgu u, is nalt Lya. Is ul Bulus su: "Yani, zangu nəmi Yelsəni, Yahudawa bəl mbadlwəsən, ma' Lya singu mi'ndət kə'mbatl kəni ge' bətl zhil ki Musa.

²¹ Mbalən tle kup su usu tənki də kulci' mus Yahudwa ginə bəda ge' mballan ki Musa wai u sə'dlat zhil ki Musa taka, ki dləmmisi bəst səl mill-wəsən ko as bəl Ləba ki kolsi inən wai.

²² Yakən təm pəlini ngə? Katlti dawai sən kub mbətwa gi.

²³ Gaki nəgu pəl ulnə tən piku. Mbalən upsi ni mida ginə kan dləlliti u.

²⁴ Kan mbalən i, a bələn zhil ki kushti ki zo'ki mus, a' batl mus ulpi səmbi sə' utl gada. Tu' tən shitu gu, mus nən ma'dli ulnəs dləmisi tənku, bali da giviwai, amma ki gawagi ki bətl zhil ki Musa.

²⁵ Tən ginə bə Yahudawa wai u mi'bətl Yesu kal, mashin lwabbat swai i təngaki bəs dam ulki dami ki lya ki mi' pətl gontwai, bəs pəl kontwai bəs dam tlu u nəs ceti' yalu wai nə dap tlu nə hwula wai

²⁶ Nələ cilu i Bulus kan mbaləni asa likən gawasən i. I ki i' tege' libi ki Lya tə' dləmisi cin ngatlti ki like' gawasən, nə bətl Lya ləba ki ulkə okətl bezən ləba ki ko wonngi wasən.

A gop Bulus si

²⁷ Nə mutti ningi bal nja nəpa'tu, gen ge' Yahudawa te'ge atl ki Asiya is yen Bulus ge' libi ki Lya. Is cokəl hwu mbalən is gobti,

²⁸ asi dulle asi ussu Yelsəni inən Isla'ilawa, dələn mi! Mulgu ti də kushti mbalən sə mbəl mbalən inən nə zhilin nən nə lu u daðanu, immbəl Helenawa yen i kon nə lu bəlt Lya."

²⁹ (Gaki tedfi sa yen Bulus isə Tulopimus, mul Apisa, age' gatli, is eni kənə Bulus mbəllənti ge' libi ki Lya.)

³⁰ Mus gatli is hwodəli mbalən is tləlte' nə kitəl is

gob Bulus is dəlti twa dla də ge' libi ki Lya, is dleusi də le'dlabiyi.

³¹ Si ge' ngau shitu ki tlotti gu' u, i shilən ləkina də bali ki mi' ki ndə dlom ki Loman kise mus gatl ki Ulshelima də dlati.

³² Aləbi i' em mi'kə ndə'dlom ki Loma nə na ki bazi ki mi'kə ndə'dlom is tlə swa ge' hwu mbalən. Nə mbaləni yen ki bali ki mi'kə ndə dlom nə mi'kə ndə' dlomwasu, is za' liti Bulus.

³³ I bal mulkina ki ndə dlomi hilya i' gobti, i' laki sə'kəndəti nə zhim dom lob. Iki in gyem mi tikə on ngi ya tə pəli.

³⁴ Nami ge' hwu mbalən ni si la'ti yali gi də dləp shilənwasi gen də dləb gwasən. Gaki o'tilu dibəli hal bali i' ambi gəs ki bal shiləni wai, il laki sə'tela Bulus ge'lu dəb kəmə' kəndə'dlom.

³⁵ Nə Bulus mbət tən lu dəkəsti u, sai nə mi'kəndə'dlom kanti ki kami gaki tləl mi'gatl ki mbalən.

³⁶ Dopga ki mbalən i nə bəlsi teđu asi la'ti yali asi ussu, "Mi tloti!"

Bulus Shilən nə mbalən

³⁷ Nə bal ki mi'kəndə'dlom təla Bulus a ge'lu dəb ki mi'kəndə dlomu, i' ul mulkina ki mi'kəndə'dlomi su, "Kən ndəti ta shilən mikə?" "Ki manən shilən "Nəbi ki Hellenancı bo?"

³⁸ "Kikə' mul masal mulu wai wa? Gunə hwon ki te'kal nə bye u, i' tləlli mbalən ndəlt Kəga, hal it dəl mbalən za'ngu upsi mi'tlwam mbalən a ge' delgən u"

³⁹ I Bulus ndəgi, Ami mul Yahudiya ni, te' Talsus age' atl Ki Kilikiya, ami Yakan gatl kəni gatl nə si kumti nə nali u. Mmi bətl ki bi zakəni tapi Mbalən i shilən."

⁴⁰ Nəmul kina ki mi'kəndə dlom bəlti shilən u, i Bulus dləltən gəbsi i' ta'ki hwu' mbalən toh lya is dəm shot, muswasən ishinnisi nə bikə Alamaya.

22

¹ "Yelsəni nemi' zə'mini, kumən nə ni ta dləmikin ulnə nda u, gaki ta pikini a pəl bezən ulən wai."

² Nəs kummi tashin nisi nə biki Alamaya u, is dəmcıw. I Bulus usu

³ "Ami mul Yahudiyani, zəkkə Talsus ki Kilikiya, age' gatl anali. Ami mul kushtini amalgən də Gamaliel gunə kulci zhil ki mi'zə'mi'zəm mini u. Ami nə bəlti ki bəlt Lya kənə kan unə muswakən ki pəltin sə'ti u.

⁴ Hal a la ki mbalən bətl ki bətl shitu u i, ami gobti mwani nə mudli a kəndəsi a atlosi.

⁵ Bal ləba nə mus mi' dlətl shilənwasi nən ziti nə dwadən. Ama'si akan shinkən ki elsəni ini Yahudawa yasuli swa Dimascus, Ya beu də gopti mbalən ta sulsi ge' lu kənndə' mbalən ki Ulshelima as pəlisə bezən'ləba.

Bulus dləm u ndi patlitem ma' Lya wasi

⁶ "Amige' ləti a bal dloncin na bal nja nə Dimashku u, bənə mantiwai i bal ciltton pe'sul lya i ga ndələni.

⁷ Ya nda atli yakum ya lon də ultənsu, Shawulu! Shawulu! Yaki pəlitən bezən ləbada?

⁸ "Yandəgi 'Ki wokəni, mul ban?' I' ulənsu. 'Amiki Yesu mul Nazaleh, mulnə ki pəllitti ngashtu.'

⁹ To, ginə ne' kən i yen ciltisi, amma sakum yal ki mul shilən nə amiwai.

¹⁰ Ya usu 'To, ya tapəli, mulban?' I mul ban ulənsu "hilya, ki'lə Dimascus, tyaka sə' dləmī' ulnə' ki' pəli u.'

¹¹ Na dəm dwa u gaki ciltu. Mbalən i nə' ne' kən u is goppi toh is sullən swa Damascus,

¹² "Mulən da mulshin Hananiyi immbə makəni. Ti mul bətl zhil ki musa mulnə mus Yahudawa ki dəmi aləbi də ndwatiti u.

¹³ Nə' dləl malgən da kən u, i' ulənsu, Yelse ini Shawulu, tə Yelluwa' pali! A ləbi a ləbi idwadən i ʃuli Ya yenti.

¹⁴ I' usu, 'Lya ki kolsi inən a olki gaki ki man ulnə ge' mbadlwasu, Kin ye' mul zoki mbatlu, kən kub shilən abi-wasi.

¹⁵ Kən dəp mul pətl yenti ki dwadən wasi ma' mus mbalən tən ulnə' enini nə ulnə kumiñi u.

¹⁶ To nəgun u yaki ʃutti? Hilya, tə pəli' Baptisma a o'kəli' Bezən ləbawa' takə, tu' ma' mbe' shinwası.'

¹⁷ "Na patl te' Ulshelima a ami shilən nə Lya age' libi ki Lya, i tlu'ti mbini.

¹⁸ Ya yen mulban də shilən nə ami. I' usu, dlewki! Ki'za' Ulshelima, gaki mbalən aki səkən ndəti nə pətl yenti ki dwadən u nə ki dləmti tən kən uwai.'

¹⁹ "Amine ya usu, mulban, 'Sima gawasən səmani hu lu dobga ukəni a kəndə mbałən ginə la'mbatl tənku ya li'li'si.

²⁰ Gasi unəs bəna hwula ki Istipanusu, mul pətl enti ki dwadinwagu, a ami ləbi ki dləli, ami bəlt kal ki ulnəs pəli u, amine ya bu' lulu' kəmi' tlotti.'

²¹ "I mulban ulənsu, 'Hilya; ta shinki tya lolu ma' ginə bə Yahudawa wai u.' "

²² I mbałən dobga də ga'ti kəm tən shilən ki Bulus hal immbə tən shilən u da, is tləl yal is usu "Tloti! Tə bwəs undi mulu nə dəb ləba a mbuni tət dəm tən ləba wai!"

²³ Asi matlti asi pe'ti lyə nə dla'ti lulutwasən asi tləl kushka lyə.

Bulus a Loma

²⁴ Imul kina wasən bəl zhil ki sutl Bulus ge'lu dəb ki mi'kəndə' dlom. A gyemti nə dlamtəl, gaki tən man shitu u nə laki i mbałən də lakitti Yal da nəgu u.

²⁵ Amma nə kəndətti nə zhimu, i Bulus ul balmul kəndə dlomu nə nja nəti usu "A mbunni ki pəli mul alt ki Loma dlamtəlla, bəka mbiti nə lati asən gimbi waiya?"

²⁶ Nə bal mul kəndə dlom ki Loma kumi nəgu u, illəmak mul bətl zhil ki kəndə dlom i' ultisu, "Yaki lyab pəltini? Mulu mul Loma ni."

²⁷ Imul bətl zhil ki kəndə dlomi' ul Bulus su, "Dləmīni ki mul Loma kəma?" I' usu, "E."

²⁸ Imul bətl zhil ki kəndə dlom, i' usu, amicibə sai na batl bal ulpi ya mbi dəb yakən atlda." I Bulus usu, amicibə nə nali sə zənni."

²⁹ Gaki nəgu, ginə də lyab gyebti u, is mbə gi nə kali aləbi aləbi. Mul bətl zhil ki kəndə dlomi nəm mani, ti gawasi ta kəndə Bulus mul Loma u, i bult gopti, in ngu taləge ta kəndəti.

Bulus akina də mi'dləl Shilən

³⁰ Nə lucilu mul bətl zhil ki kəndə dlomi illyami təm man ulnə Yahudawa təla shilən tən Bulus da u, ittəngəlti, idləllisi zhil nə bas ləbasi nə mik attli səddomga, apa immbəl Bulus idl dləlti a kina wasən.

23

¹ I Bulus uti mi'dləl shilən ki atl dwaðən i' usu, "Yelsəni ini, bətl Lya kən amida nə mbatlı ki zoki hal i mbəl cin ki səti da."

² Ananiya bal ləba ki Lya ul ginə ki dləli nja ma' Bulus su sə'op biwasi.

³ I Bulus ultisu, "Ki mul ngashtu, "Lya nən litiki, ase, ki dəmni ki u bo zitən zhil kən ki dəya, ki ngu də usu tə duni, gu shot nə zhil ki Musa

⁴ Ginə ki dləli nja nə Bulus su is usu, "Bal ləba ki Lya kən ki byel twa?"

⁵ I Bulus ulsisu, "Yelse ini, amani ti bal ləba ki Lya kən wai, Ki lacida: 'Bə'dləm bezen ləba tən mul kina ki mbałən wai.' "

⁶ Nə Bulus yeni, nami Sadukiyawa ni nə gen Palisiyawa u, itltəl yal age' lu domga i' usu "Yelsəni ini, A mi' mul palisiyawani, yakən Palisiyawa. Tən a dlil mbadlı i tən tləl lya ki mi' məşhti i ami tleb bəna da."

⁷ Nə' dləmi nəgu u, i dlan nda ge' dlom ki palisiyawa nə sadukiyawa, i dob gani bwəsi.

⁸ (Amma Sadukiyawa sa ndə nə hillya gə' ki mi'məşhti twai, bə mi'shinkən ki Lya dawai, bə yal ki mbatl ki Lya dawai, amma mus palisiyawa is ndə' nə nali.)

⁹ I bal dla' hillya, gen ge' mi'lashti ki əalika ki palisiyawa is tləyalı asi shottibi. Asi ussu "Mibo mambı mulu nə bezen ulən wai," is ussu. "Ko yalkə mbatl ki Lya ko mulshinkən ki Lya kən shilən nəti u pa?"

¹⁰ Nə shotti bi i ndəndəlu i mul kəndədlom kum mbəlti bas kyakkyash Bulus. I bəlsi zhil tə mi' kəndədlom susudi sə' kanti də ma'si nə ndəlti sə' təlati ge'lü dobga ki mi' kəndədlom.

¹¹ Nə gas pə u i mulban dləl nja Nə Bulus i' ultisu, "Ndəl mbadlı kan u nə'pəl enti nə dwaðən a tənkən a Ulshelima u, nəgu ki' pəl enti nə dwaðən ini dədənu a Loma."

Sa Kəndə i sə' tlo Bulus

¹² Nə lucilu i Yahudawa mabi is usu nə ndaltannaca sə' kən damti nə tletiwai sai nə sa tlo Bulus.

¹³ Ginə kəndə shilən u sə'ngətl mbałən kətl ləbi upsi.

¹⁴ Is lə ma' bas ləbasi ki Lya nə mi'kina is usu, ma dlil bal tannaca i məkən damtiwai nə tletiwai sai nə ma' tlo Bulus.

¹⁵ Gaki nəgu kini nə mi'dlətl shilən dləmi mul'kina ki kəndədlom sə' mbəlli kinti, kənə ki' mbələn ngep gəs ki shilən was tən kini iye mi kuma ki dləli tən asən kən mi'da tən tləti nə mbətwasi.

16 Nə yakən ki yelse ki Bulus kumi nəgu u i' suge' lukəndə mbałənisi idləmi Bulus.

17 Iki Bulus taki bal mulkina ki kəndə dlom gudəl nəm bi i' usu, "Kan yakən gidənsi u ki təlati ma' mulkina; tinə shilən u nə tətl dləmi tu."

18 I' kanti it təlati ma'mulkina, i' usu, "Bulus, ki lu ki kəndən mbałən, shinəni takami' yakən gidəsi u tedi tən gaki ulki dləmi ni' da."

19 I mulkina ki kəndə dlom goppi yakan gidəsi i' toh tedi, amalgəni in gyemti, "Yaki lyamti ki' dləmini?"

20 I usu: Yahudawa sa kəndə i sə' gyemki ki mbəlisi Bulus ma mi'dləl shilən akyau kənə sə' gyemti ki zokini tən shilənwasi.

21 Amma bə ndəgisiwai, gaki mbałan ginə ngətl kutl ləbi upsi sibuttiti age' dəlgən. Sa dlil bal ndaltannaca i səkən dəmtiwai nə tletiwai sai nə sa tloti butti səda katl ki ndəgisi."

22 I mul ki ndədlomi dəlli' kəmu i' za' yakəngidənsi isi is zəga nə: "Bə' dləmi mullən shilən u nə' dləmi uwai."

Is pal Bulus tyā Kaisaliya

23 I mulkina mbe bas mi' kəndədlom was gudəli lob bi i' ulsisu, "Gadlən mi' kəndə dlom kutl cen lob nə mi' kəndə dlom mi'tən bətsi, kult ləbi ninngi, nə mi' dləti nə zo kult cen lob sə'su Kaisaliya nə dom nətapsi ki gasi.

24 Ngayi Bulus bətsi təto' tənki asulənti ma' gobna ki Pelis."

25 I mulkina ki mi' kəndə dlom lash lwabati kənə nəgu:

26 Te'ma' Kaldiwus Lisiyas, tu Ma'mulnaltı, Gobna Pelis. Shilniti mul nalti.

27 Mulgu Yahudawa si lyam tloti, amma yalə nə mi' kəndə dlommini yakwacati, a kumi timul dəm ki pit a Loman kəni.

28 Ami lyamti taman yakən laki singettida, ya mbəlti ma' mi'dlət shilənwəsən da.

29 Yambi si dakətti tən shilən ki kushtiwasən, amma bezən ləba u nəs zitü atala ki kəndəti ko tlotwai.

30 "Nakumi sa kəndi bezə uləntintu, iki ya shini sə'talati maki. Ya ul mi' pəlti nə shilən ni su sə' dləm ulnə pəli u akina wagi.

31 Tən gaki nəgu imi' kəndə dlom kan Bulus ne'si a gasi is talati Antipatlis.

32 Nə lucilu is za' mi'kəndə dlom mi'tottən bətsi sə'zəgane'ti, is paltya gelu dəmtwasan.

33 Nə mi'kəndə dlom mi'tottən bətsi mbəci Kaisaliya u, is bəl Gobna i lwabati is za' Bulus atoh wasi.

34 Nə gobna ya lwabatisi u, i' gyem Bulus kibo age'lu u kənkida. Nə'kumi a Kilikiya u,

35 i' usu, "Anga'kiki kəm ən mi' pətl ki nə shilən sa mbə u." I gobna i bəl zhil sə', dləl Bulus a bidla ki Hilidus.

24

Sa təla Bulus akina də Bilatus si

1 Kal ki mutti nantam i bal ləba, Ananiyas, is su Kaisaliya nə mi'kinayen nə lauya mulshin Taltulus, is təla shilən ki Bulus akina də gobna.

² Nə sul Bulus gibi u, i Taltulus mbəl shilən akina də Apilikus: "Mul nalti tu'maki mbalən mbi dəp kizoki mul mbunti, tu'ma' yellu loluwa' kən likən dəb ki mbalən inən da.

³ Ko a nəmi, mbalən inən si godeki ko a una.

⁴ Amma gaki ba dəmbəl ki, Ami ngepki nə zo' mbadlwa gu ga' kimi kəm tən ndo'ləs ulnə tən dləmiku.

⁵ "Mə mbi mulu mul ngaushilən kəni, mul mbəlt dlatl kəni adlom ki Yahudawa nə ko a u nə age' dəb ləba, kuma tikə mulkina ki dalika ki Nazalawa.

⁶ Hal ti lyap kon nə libi ki Lya; in gobti. Nə lati mbatl ki tən pəli' shilən tən zhillinən.

⁷ Amma mul kina Lisiyas kəm shiləni u i' mbə i' kanti də mami nədəlti.

⁸ In ka cetti nə gawagu, kən ma' bali tən mus ulnə mi dləmti təntu."

⁹ I na Yahudawa yen pə kal ki shilənisi, is ndəgi shiləni nəguda.

¹⁰ Nə gobnayi ndəgititə' shilən u, "I Bulus usu, amani hwon dimbəlli ka tle pəli' mbalən i shilən i. Nə hwol mbatl kən ta pal shilən ini.

¹¹ Kimanini a ngəl muttu kult nə lob nə patl tai ini a Ulshelima də shilən nə Lya wai.

¹² Mi' mbət shilən i sa mbi də shot bi nə tlilt gatl lya nə mbalən age' libi ki Lya wai, nə age lu dopga ki Yahudawa nə age' gatli.

¹³ Sə'kən ma' dləmi'ki ulnə lakida is mbəllən da makuwai.

¹⁴ Amma a ndəgi, nə shitu u nəsi mbeti ki 'Dalika u, nə ami bətl Lya ki kolsi i nən da u, ami lati mbatl nə mus ulnə ki laci ge zhil ki Musa nə ge lwatbat ki mi' nje shinkən ki Lya u.

¹⁵ Ami la'ti mbatl nə Lya, kan u nə gi də La'ti mbadlu, nən tlətl mi'məshti, mi'zo'mbadli nə mi'besən mbadli.

¹⁶ Gaki nəgu, ko a nəmi ami dətl mbadli gaki ədəməl ulkə dləmi ma' mbalən nə ma' Lya.

¹⁷ "Kal ki zati Ulshelima nə hwon ten ngulen, Ya paltya ta dətl mbalən inən, a bəlsi ulki toh ini nə ulki keli' Lya.

¹⁸ A mi ge' pəlti nəgu is mbi nə ki peshti age' libi ki Lya. Bə ami da ne' hwu' mbalən wai bə a tlili mbalən mbadlwai.

¹⁹ Amma Yahudawa yen da tye'ge' atl ki Asiya, ginə a mbuni asi ki a kina da'ka, si təlla shilən i ma'ki ən shilən won nisidə tənkən u.

²⁰ Ko aza Mbaləni sə' dləb lati asən gibi u nəs mbi nə nali u, gasi u nə a dləl kina ki mi'dlətl shilən u,

²¹ Atən shilən nəmon kən katl na tləl yali a ami ki dlili akina da si, ya usu 'Gaki tlətl lya ki mi' məshti si pəlitən shilənda akina wakən a sətti.'

²² Pilikus nə dəm niki timul ma'ləba a tən shitu u, i' dlətsi. I' usu, "In Lisiya mulkina a mbə u," "An pocı'kin shiləni."

²³ Ibbəl bal mul kəndə'dlom bəl zhil təl le Bulus, amma ibbəltti mbul ki təza' yelənsi wasi səmbə sə ngawi' wunnə ti lyamti u.

²⁴ Kalkə ləb mutti i Pilikiya

mbənə kəliwasi Dulisia, yakən Yahudiya. I' shin shin kən sə'mbəlli' Bulus i' gakki' kəm tən la'ti mbatl nə Almasihu Yesu wasu.

²⁵ Nə Bulus də dləb ulkə zoki, nə ngapti ga nə zə' batltu nədə bətu, I Pelikus kum bulti i' usu, "Nə guni apə i! Kən ma'zə'ga. In a mbi mbulu an ta'ki ki bi."

²⁶ Gaki ti la'ti mbadli dəgən a Bulus bəlti ulpi, i lakida i' gob takinti bida ati shilən siti.

²⁷ Kalki hown lob, Bolkiyes pestas nje Pilikus. Pilikus ne gaki ngau holhuwla ma' Yahudawa i'za' Bulus age' lukəndən mbalən.

25

Bulus Təla Shilən kina də Kaisal

¹ Nə Pestus mbə'ci ge' atlwasu, Kal ki mutti maki i' za' Kaisaliya illə Ulshelima,

² Iki i bas ləbəsi nə mi'kina ki Yahudawa is təla shilən ki Bulus ma'ti. Is bəl Pestus bi

³ tə' dəlsi, səm mbəl Bulus a Ulshelima, amma is kəndi tə gen hwun tən shitu gaki sə' tloti.

⁴ Amma i Pestus ndəgi i' usu, "Bulus ki i dle Akaisaliya, ami nə gayini ami lyab ləti tyaka ge' muttuni.

⁵ Hwe tə na mi'kina wakən mbə ne' kəni, in a mbi mullisi nə lati asən gibi u as mbəl shilən wasi."

⁶ Pestus a ngətl mutti usəpsi ko kutl a tine'siwai, i lə Kaisaliya. Lucili i' totən kundən guntwasi, illaki səm mbəl Bulus a kina da'ka.

⁷ Nə Bulus tette' gibi u, I Yahudwa ginə mbə te' Ulshelima i is gadəl ti galgal. Asi mbətl shilən dimbəli tənti besni, gini sima bəs Mani wai u.

⁸ I Bulus dləli gawasi: i' usu "Amibo a lew nə zhil ki Yahudawa wai ko libi ki Lya ko Kaisallwai."

⁹ Pestus, ne gaki ngau hwol hwula ma' Yahudawa, i' ul Bulus su, kən ndə'ti ki'su Ulshelima səp pəli shilən a kina daka tən usi nəsi zi'ki gawa?"

¹⁰ I Bulus usu: "Nəgun u ki dləli ami da abidla shilən ki Kaisal, a ge'lü unə mbuni tə pəli shilən da u. A pəli Yahudawa ulən wai, ki gawagi ki mani nəguda.

¹¹ In lati asən gibi i u atala tlotu, ai, a kən dləli məşhtwai. Amma in bal shilən nisi da tən ulnə si ngauti tən kən u wai u, to mul bətli Yahudawa ami dawai. Ya ngayi tə mbəl' shilən ini a kina də Kaisal!"

¹² Kalkə shilən ki Pestus ne' mi'dlədl shilən wasi, indəgi i' usu, "To ka ngayi tə tala shilən wa' kina də Kaisal. To ma' Kaisal kən ki'lə!"

Bulus akina ki Agalipa nə Banis

¹³ Nə tləp mutti tenngulen u, i Guu Agaliba nə Banis is mbə Kaisaliya gaki sə' uli Pestus dem.

¹⁴ Is ləm mutti tyaka dibəlu, iki i Pestus dləm shilən tən Bulus isə Guu. I' usu: "Mulən aki gunə Pelis za'ti ge'lü ki ndə mbalən.

¹⁵ Na lə Ulshelima u, i bas labəsi nə kolsisi ki Yahudawa is mbəl shilən tənti, is usu ta poci' shilən.

¹⁶ "Amne ya ulsisu Lomawaaku də pəlt guwai, tə'zi mul lati asən gibī batltwai, gaki təla' mulən də hwol tugwai, sai nəti nə mi'pəlti nə shilən sa mbə sa makina də pətl shilən, ammbi abmbun gawas tən shilən u nəs mbəli təntu.

¹⁷ Nəs mbə kummwasən u, a dəmbəl shiləni wai, citl ki lu ya totən kundən guntini ya bəl zhil səm mbəli mulisi.

¹⁸ Nə mi'ship shilən hilya u, a kum bezən shilən u nə a la'mbadli sən dləmti tən tuwai.

¹⁹ Sai hwu'shilən yen kən sə mbəlli tənti tən bətl Lya wasən, nə mulən kise Yesu, gunə məcu, amma i Bulus dləl katl tən ta məcuwai.

²⁰ Amine a hol kan unə ta bəl gəs ki shilən u da u i: Ya usu ko tən suti Ulshelima gaki sə' pəllit shilən swaka.

²¹ Amma i Bulus ngayi sə' dləl shilən wasi, i Augustas ya shilən nisi, iki ya bəl zhil sə' idlati sai gasi u nə a taki Kaisal ti u."

²² I Agilipa ul Pestus su, "Ami gayi ma ami lyap kup ulnə tə mulu dləmi u." I Pestus usu Akyeu kən kubti."

Bulus akina ki Agilipa

²³ Nə citl kəlu Agilipa nə Balniki is mbə age' naltwasən ki gunti is te'ge' kəs ki dləl shilən ne' mi'kina ki dlati nə bas mbalən kige' gatli. I Pestus, bəlsi zhil sən mbəl Bulus.

²⁴ I Pestus usu, "Guu Agilipa, nə mus mbalən i nə ne' mini u, kən də ye' muluwa gunə Yahudawa mbəl shilən was a Ulshelima nə a ki a

Kiasaliya, asi matltti ambuni təzati tə' dəm tən diwai.

²⁵ A yen ulnə' pəli i a kəmməsh tuwai, tun nə ti nə gawas kən tə ngauyi sə' palshiləni akina ki Augustas, ya usu an takkitki tiswai.

²⁶ Amma ulən nida gunə ta laci mul ban ini gawa suwai. Tən gaki nəgu ambəlti kina wakən da, nə akina da'ka Guu Agilipa, ko gaki kal ki gyepți an ammbi ulnə talaci u.

²⁷ Tən yati ini, ndokkəkkəni təta' mul ki kəndi bənə mbbitti nə ulnə' pəli uwai."

26

Bulus Dləli Gawasi Akina ki Aglibas

¹ Iki i Aglippa ul Bulus su, "A ndəgi ki'shiləni a'dləli gawagi." I Bulus ta'toh lya I'gob shilən I'usu:

² "A mbi zo' asən i Guu Aglippa, nə dəmniki akina da'ka ta dləli ta shilən asəti u tən mus ship shilən u nə Yahudawa pəli u,

³ Nə dəm niki Ki mul ma' ləbani ge'dəb ki Yahudawa u nə shilən wasən u. Ami ngepki ki' ga'ki kəm nə ngaptibi.

⁴ "Mus mbalən ki Yahudawa səman dəmtini a də ya'ni, tun tlə tini age atlını, nə a Ulshelima.

⁵ Səman nəni tun tede ən sən dləb ulnəs mani tənkən u, Səmani ami mul bətl dalika mul ndəl tuni ge' bətl Lya inən, a pələn dəpkə mul palissa.

⁶ Nəguni tən gaki la'tti mbadlə tən dləlliti u nə Lya pəli mi'zə' mi'zəm mini u

i lakida ami ki dləli tə pəli shilən da asəti.

⁷ Guki dləlliti ki bi inən kutl nə lop ginə də la'ti mbatl nə bətl Lya gasi nə dlönçin si la'ti mbadli sə'en njikən twasi. Guu Aglippa, gaki la'ti mbaldlu Yahudwa də pəltən nə shilən da.

⁸ Yalaki da tən yenti wakən Lya kən ma'til mi'məshtwaiya?

⁹ "Tedi ammi gayi ni ya yeni kənə mbunni tapəl ləba iye' ki kon nəshin ki Yesu mul nazalat.

¹⁰ Nəgu apəli a Ulshelima. Tən ndə'ti ki bas ləbasi ala' mbalən mi'bətl Yesu kal dimbəli age'lu kəndə' mbalən, hal bal tlwassi u, ami pə' kal ki nəgu.

¹¹ Cin dibəli atle bətl lu dobga ki Yahudawa a ami pəlissi ngashti, ami la'tisi sən nge Lya. Gaki kub dutugwasən, a ami bətlsi kali hal tyage' atlen a ami pəli'si ngashti.

¹² "Age' nəguni, ami lə' Dismaskus nə ndə'ti ki bas ləbasi nə shinkən wasən.

¹³ Adlocin, Guu Aglippa, ami tən shitu nəgu, yayen chilti sul lya, ngətl chin, nə chilti, də chitl a malgən ini ne' elsəni dutini.

¹⁴ Musi nən in nda atli, yakum yalon də ussu nəbi ki Alama, 'shaulu, shaulu, Yaki pəlitən besən ləbadə? Bəna ki da katl nəki nge tən u.'

¹⁵ "Ya usu ki okəni, mul nalti?" I mul ban usu. "Amiki Yesu, gunə ki pəlitən ngashtu,"

¹⁶ Hilya ki' dləl tən Asən wagi. A mbən ma'ku ki'dəm

mul kyautən i dani, a' dləm ulnə' eni tənkən u da, nə ulnə ta dləmi' a kina ki u.

¹⁷ An pekətl ki dəge' mbalən wagi nə ginə bə Yahudawa wai u, ginə tashin ki swa ma si u.

¹⁸ Gaki ki' bulisi dwadən, səppete dəge' dəmshal, as paltya' tən chilti, as pe'dəge' gukki shedan as paltən guk ki Lya, nənəgu nən pacisi besən laba wasən da sən dəm ne' mus nəginə peshsi u, tən gaki sa la'mbatl nə ami i.'

¹⁹ "Gaki nəgu, Guu Aglippa, a nge ndə'ti nə tlu'tu nə pe'sul lya uwai.

²⁰ A Damascu a pisi shilən ki Lya pa, nə a Ulshelima nə mus alt ki Yahudiya, a pa ya pəli mi'ginə bə Yahudawa wai u, shilən ki Lya sə'za'pətl bezən ləbawasən sə'palte' ma' Lya aspəl kyautən u nə mbo'totin patl te ma' Lya wasən u.

²¹ Gaki nəgu Yahudawa goppən da a ge'libi ki Lya is ngayi sə'tloda.

²² Amma i Lya dələni hal i mbəl nəguni; i laki da ami dləmi' mbalən shilən ki Lya bazi nə mil a ami dləb ulnə bə a shoti nə mi'nje'shinkən ki Lya nə Musa dləmi nən ndatu.

²³ Sə usu Almasihu nən tle' bəna ti hilya də ge'mi'məshhti pa, atl dləmi Yahudawa cilti ki pe'ti nə ginə bə Yahudawa wai u."

²⁴ Bulus age' shilən kən ngu, i Pestus tləl yali nə ndəlti i ultisu! "Ki Bulus ga a gəlik, "Pətl lashtiwa' eye u də gəlli'ga."

²⁵ Amma i Bulus usu. "Mulnalti Pestus," Ga a gəliwai, "Balini ami dləmti nə mbatl nəm."

²⁶ Guu Aglippa amma' shilən nəki nə mbatl nəm. A mani ka zi mus usi nə dwadə, pəlin dli ki hwundəliwai.

²⁷ Guu Agilipa, ka ndə' ni nəmi' nje shinkən ki Lyawa? Amani ka ndəgi."

²⁸ I Agilipa ul Bulus su, "Kən də yenti ge' yakən cin u kən la'təni adəm Kilista ya?"

²⁹ I Bulus usu, "Ko ge' yakən cin, koge' pya'si, ami shilən nə Lya bə ki nəmwai nə mus ginə də gakti kəm asəti u, sən dəmti kənə ami, kidai bannə zhim domu."

³⁰ I Guu hilya, nə mul kina Pestus nə Balniki, nə ginə ki dəmi ne'tu.

³¹ Kalkə za'ti kəb swasən, is pal shilən ne'elsəni, "Mulgu tapəl ulnə tə mbalən tloti ko kəndə'twai.

³² Agilipa ul Pestus su, "Tə gaki tə bewlən shilən u kina ma' Kaisal lwai u, a ndali tə za' mulu."

27

Bulus te ge' Kundələn ki Mal is su Loma

¹ Nə kəndi də hilya də su' Italiya ge' kundələn ki malu, is ta' Bulus a toh də bal mul kəndə' dlom ne' na mi' ginə ge' kəs kəndə' mbañen u, mulshin Yuliyas, nəm age' mi' kəndə' dlom ki domga ki Agusta.

² Nən te ge' kundələn te' Adalamatiya mul lyap su'ge' gatlen a malgən Asiya u, in gob ləti, a Alistalkus mul

Tasolonika won ki atl ki Makidoniya, tine' mi.

³ Nə lucilu in mbəci a Sidom. Yuliyas ne ippəli Bulus ulki zoki, is za'ti təs su ma yelənsi wasi gaki sə' dəlti da.

⁴ Nən tlə aki age' kundələn ki mallu gaki ki etəl tlətl tetən kina inən, in gandəl tu kal calgatl ki Kublus.

⁵ Nən pedə ge bal mallu nə nja nə atl ki Kilikiya nəki Bampiliya u, in mbə'ci Mila a ge' atl ki Likiya.

⁶ Bal mul kəndə' dlom mbi kundələn ki Iskandaliya mul lə' ge' altki Italiya, illa'mi a gibə.

⁷ In ləm mutti ami ləti' ten ten, nə ngeskən mə mbəci nja nə Kinidas. Nə bə yetəl a zamıwai u, in gandəl akal calgatl ki Kalita nja nə Salmoni.

⁸ Nə nges kən mə bew nja nə bəgası in mbəci ge' lu u nə də mbeti hwu' ki zoki, nja nə gatlt ki Lisiya.

⁹ Nə dəmniki lətisi a dlewtwai u, ləti sima i' dəm ulki ci' banti, cinkə ngaptibima a bewyi, i Bulus dəlis kəm,

¹⁰ I' ulsisu, "Ami yenti lətinən u nən dəmti ulki ki ci' bulti, bə hwotl ləba nə kundələn ki malu katlwai, nə dli inən ma."

¹¹ Amma bal mul ki ndə'dlom a ndə' nə ulnə Bulus dləmi u wai, tə gətli nə kub shilən ki mul kundələni nə mul dətl kundələn u.

¹² Nə dəm niki lu hwuntu a mbuni kundələn i' sə' ci watlən agimbi wai u, mbañen dibəli is mbəl shilən sə'tlə dəki, kowongi si ngashti bi mbəci tya Ponokiya sə'dəm tya ka. Age' lu hwu ki calgalt ki

Kalita, gunə dəya' bəgasi ki alewa nə kudu u.

Bundələn a dləlka

¹³ Nə yetəlu gop hotti te'di ten ten u, tən lati mbadl ki mbalənisi sambi ulnə si lyamti u i; is dəl kundələn ki mali nə kali nə zhim dom is bəli tya malgən calgalt ki Kalita nja nə bigasi.

¹⁴ Aləm dəmtwai, i bal etəl tlətoh ge' calgatlı gunə də mabeti ki Yulokilidon.

¹⁵ Nə etəl li' ku ndəllən ki malisi u, hal taman nga'ti etəli ndan wai, in zaki katl i etəlli si go' jakənmi.

¹⁶ Nən bəli kal yakən calgatlon u mulshin Kauda, lu unə etəl bosda u, nəngeskən mi dləl ya kən kundəlləni.

¹⁷ Is sul yakən kundəllənni swa ge' bali u, si kupbanti is kə'kəndə zhim is gandəl bal kundəlləni da, gaki ba suge tisən ki bəgasi ki Siltis mul səga' mus ləba, iki is shit llutli ki tən kəndələnnisikə tən gaki tə yetəl jakən kundələni sida.

¹⁸ Gaki bundələn mul ndəlti də kundələnni eye', nə citlkəlu i mi' ndətl kundəlləni gop utti kaya taka swage'mal.

¹⁹ Nə mutti maki nə toh wasan kən sədla' ul kyautən ki kundəlləni taka.

²⁰ Mutti di bəli mayen cin nə cadləllwai, sai bal yetəlon kən də li'ti mi, in pe'kəl mbadl ki pe'ti.

²¹ Nə dəm niki aləm mutti ba dap ulki dəmi, i Bulus hilya gal adlom da si i'usu: "Mbalən, tə'ka kumən shilən i u tən bə zakən calgatl ki Kalita wai u, da kə'kən ndati

ge'ulkə ci' bultuwai nə hwol ləba u wai.

²² Ammi ndəllən mbadli, gaki nəgu mullən gudəl nəm kən gətl age' kini wai, sai dai tə hwol ku ndələni.

²³ Age' gaski hwuđi mul shikən ki Lya shilən nə ami. Ami zheli ki Lya kəni, ti ami pəlitti bəna. I' shin mul shinkə wassudi təm mbə makəni.

²⁴ I usu, 'Bəkum bəntwai Bulus. Kən dləlti kina də Kaisal, i ngu Lya a kumki ta ndəgi mus yelənsi lətwagi sən pe'ti.'

²⁵ Gaki nəgu ndəllən mbadlwakən, kini mbalən, a la' mbatl nə Lya tən ussu, kan u nəs dləmi u, nəgu tə pəldli.

²⁶ Amma nə ngeti etəl nən la'timin tya tən bəgasi."

²⁷ Age' gas ki mutti kutl nə upsi asi dətl mi age' dləlka ki Adaliya, abal gasi mi'dətl kundələni siyenti mə bal nja nə bəgasi i.

²⁸ Is cimbəl lolu' ki mali is mbi asan kutl cen nəm nə kutl ləbi lop. Nən lə kina ten ngulen u is cimbəli dadanu is mbi lolu tisi asan kutl ləbi nətapsi.

²⁹ Gaki kitəl'i li'ti zənga, is la' dom gudəl upsi ki kal kundələni, is shilən nə Lya tə lu dlewti də cilti.

³⁰ Mi'dətl kundələni is ngau kitəl də ge' kundələni, hal sashi' yakən kundələn age' mali, gaki tə yen dli kənə sə shit dom ki bikina ki kundələni ni is za'si.

³¹ I Bulus ul bal mul kəndə dlom ki Loma su nə mi'kəndə dlom, in mbalən i adləl ge'

kundələn uwai u, ka mbə'cini ki' pe' twai."

³² I mi'kəndə dlomi is bəbatl zhim ki tən yakən kundələni is za' kundələni i mal kami.

³³ Nə lu ʃal nja tə cilu. I Bulus ulsisu sən na'dam ulən, "A səti mutti kutl nə upsi ngu, aki dəp ki butti, bə ka dəmən ulən wai."

³⁴ Gaki nəgu ami shetl kini ki'dəməni, gaki dliwakən, gaki nəgu mulən gudəl nəm medlən ki gawakən kən gəltwai.

³⁵ Nətl dləmi nəgu u, i' kan biledi i' shilən nə Lya akina wasan, i' chali it gop dəməti.

³⁶ Musswasən is kum ndəlti, sima is dəm ulki dəməni.

³⁷ Musi nən age' kundələni mi kutl cen lop nə kutl ləbi ningi nə mə'ka ni.

³⁸ Nəs dəməni nə kəmsi u, is gop bosı' kundələni di bətlətaka, is gop utti alkama swa ge' mali.

³⁹ Nələcili, saman atlu nəsi ləbi uwai, amma is yen lu-won multisən is kəndə shilən is ussu in mul pəkkən u as təla kundələni atən tisəni.

⁴⁰ Is bəbatl zhim domi taka is zaki age' mali, age' cini a si təngəl ul jakkə kundələni, is tləl lulut ki tən kina ki kundələni tən kina yetəl. Is nga bigasi tya.

⁴¹ Amma nəm mbəci gelu unə dləlkə pəl dandle u, is jakən kundələni i gami te'ge' tisən, hal kundələni taman utti nuwai i kal kundələni kan tatlıt gaki tlitti ki bəs ki mal.

⁴² Amma mi'kəndə dlomi lyami sə'tlwa mi' ginə ge'lü

kəndə mbalən i, bas pe' ge' mali as kitəli.

⁴³ Amma nə bal mul kəndə dlom ki Loma lyami tə pekəl Bulus su, in nge. I' balsi zhil i' ulsisu mulnə man malu as ndaswa ge' malu as lə tən bigasi,

⁴⁴ Gen ne is to'tən ancın ki kundələn genne tən use ki kundələnisi. Nənəgu is mbəci lau.

28

Bulus tən Bigasi ki Malta

¹ Kal ki ma pe'ti nən in kumi shin ki dani i ki Malta.

² Mbalən ki ləbi is pəlimi ulkə zoki is njemi mus, is hwotimi utu gaki mal də mbəti a etəti kən ngu.

³ Bulus dwam ancın te'di ti utti utu ngu, i uci won pe'todi nən kum utu i' gobpi Bulus toh.

⁴ Nə mbalən ki ləbi yen uci a sənkəli Bulus toh u, is ul elsənisi, "Mulu mul tlo' mbalən kəni; ko nə' ta pe' ki bal malu, ngonənagu ngashtwas də bəttli kali sai nə ta məci."

⁵ Amma I Bulus dladla'toh wasi idldla'uci i swa utu amma ulən a mbitwai.

⁶ Mbalən ni də yenti ləbi nən kətti ko anda amməci, amma kalkə ləb dəmti nəbə sa yen ulən a mbitwai u, is shilən dadənu is usu ti lya won kəni.

⁷ Nja nə Ləbi, lu ki mul kina ki dani i, mul shin Pubilus. Ti njemi a libi dəkka, i' shimmi ge' nalti hal mutti maki.

⁸ Mulzə' Babiliyas tə ki muđi atli ti gonti. I Bulus su

mati, i' shilən nə Lya i' zi' toh ga i muli ndokki.

⁹ Nə nda nəgu u, i mus ginə də gonti kitən da ni, is gop mbəti asi mbi' ndo'ti.

¹⁰ Is nalmi tən shitu dimbəli; nətən tlə ge' kundələn ki malu, is domimi mus ulnə mi lyamti u.

Bulus Mbəkəci a Loma

¹¹ Kal ki limaki in tlə ge' kundələn ki mali ki Iskandariya, gunə ci watlən atən dani u. A pəl'i Iwadi kəndi ngugəs ki lyayen.

¹² Nəm mbəci silakusu in mu'maki aləbi.

¹³ Nən za'ləbə u in gandəli mingu sai a Lhegium. Nəm mudu, i etəl tləte'kudu Nə lucilu in mbəci a puteoli.

¹⁴ A kikən məma ne'elsəni mi'bəlti, is ngyemmi tən pəl mutti ningi ne'si. Nənəgu immbəci Loma.

¹⁵ Nə elsəni inən mi' bəlti ki Lom kum mbətinən u, is mbəsə ullimi dem hal Age'lu dobga ki Abiyus, gu nə si mbetti ki maciya maki. Nə Bulus ma ne'mbalə ni u, i'gode Lya i ndətl mbiti.

¹⁶ Nən tye Loma u, i ndəgi Bulus tə'dəm tən gawasi nə mul kəndə'dlom mul buttiti u.

Bulus də Dləp Shilən ki Lya a Lom a də Buttiti

¹⁷ Kalkə mutti maki, i Bulus taki bas mi' kina ki Yahudawa bi. Nəs domga u, I Bulus ulsisu: "Yelsəni ini, ko nəbə aleu wi mbalən inən mbadlwai u, ko pətl gokkə mi'zə'mini, ngonə nəgu is goppəni a Ulshelima is bəl ami ki kəndi a toh də Lomawa.

¹⁸ Nəs ngyemən u si' lyamti sə za kəni, gaki a pəl bezən ulnə təla tlotu wai.

¹⁹ Nə Yahudawa nge' ndətu, i dəmi hwel ta təla shilən u a kina də Kaisal. Gaki mbalən i kən ta təla shiləni dawai.

²⁰ I laki ya lyam shilən ne ki da, gaki zə' mbatl ki Isla ilawa i ami ki ki kəndi nə zhim dom da."

²¹ Is ndəgit, "Mibo ma mbi lwabbaton ma' Yahudawa gawagwai, mulən a mbəl shilən wa' gi ge elsəni inən wai, ko idləm besən shilən won tən kwai.

²² Amma mi lyamti tən kum shilən a bi wagi, mə mani mbalən hu a una si dləb bezən shilən tən pyal kushti kəlagatu."

²³ Nəs zə cin ki ma' ne' Bulus, sə' en Bulus age' cin u nəs dləlli u, Is mbə nə mbalən dibəli age' lu unə tida nə dəmtu. I' pallisi shilən daga nə kyau hal a su'ti, ati dləmissi shilən atən gu' ki Lya, ati lyap shetlsi tə ndəlsi te' ma' Yesu tən shitu zhil ki Musa nə lwabat ki mi'nje' shin kən ki Lya.

²⁴ Gen is ndə nə shilən wasi gen ne is nge'ndətti.

²⁵ Nəs nge ndətti nə elsəni daddəsi u, nəs balkə sə'za' ləbi u i Bulus dləmisi shilən nəm i'usu, "Ase yal ki mbatl ki Lya a dləm bali, nə' dləmi mi'zə'mi zə'kini tu'bi də Ishaya mul nje'shinkən ki Lya də usu,

²⁶ "Ləma' mbalən i ki' usu, "Kən kumtini amma kəkən mantini wai; kən yentini amma kəkən mantini wai."

²⁷ Gaki mbatl ki mbalən i a ndəndəli, sa cak kəmwə sən i sa idla dwadən wasən i. Gaki

bas yeni nə dwadən wasən as kumi nə kəmmwasən. Gaki səp mani nə' mbadlwasən as palte' makəni a ndokəlsi."

²⁸ "To manin ca, Lya shinkən ki pekətl mbalən, hal ginə bə Yahudawa wai u, sikuma sən ga'ti kəm!"

²⁹ (Nədləmi nəgu u, i Yahuawa hilya is gob shotibi ne' elsəni.)

³⁰ Hal hwon lop a Bulus ki dəmi age' libi ki əbatlıt, ti nje'mus ginə mbə ma'ti sə' entu.

³¹ A ti dləb shilən ki te' ge' gugkə Lya ati kulci' mbələn ləba ki mulban Yesu Almasihu nə ndətl ki mbadli bənə bultwai!

YAKUBU

Shinniti

¹ Tu'ma' Yakubu, zheli ki Lya, nə mulban Yesu Almasihu, swamak gəs kə kutl nə lopi ginə dla'ga tən dəp ləba u. shinni' mulnalti.

La'ti mbadli na Shindətl ga

² Yelsəni ini, ən undi' bəna kə shoti a mbi kini u a' pəllin hwol tugi,

³ Kə manini cimbitl la'ti mbadlwakən u, nən də zə' ngashtibi.

⁴ Ikə ngashtibi nən njikə' kyautən wasi, nən la'ti a' dəm mul nalti nə ngaptiga, i la'ti bə kəkən hwotl ullən wai.

⁵ In gonwakən a hwol ma'ulən u, an ngyem Lya, mul bəlti nə toh kə zoki, bənə la'ti biwai, Lya nən bətlti.

⁶ Amma an gyemi nə la'ti mbadli, bənə cetl mbadlwai, gaki mul cetl mbadli kənə lakumi kəge' balmal kənə sida, ginə etəl də katti u, a də jakənti

⁷ Bə undi mulu la'mbadli tən mbi' ulən ama mulban wai.

⁸ Gaki timul mbatl lob kəni, tida zəm mbatlwas nəmmwai age' lu mus kyautən waswai.

Ulkətoh na Bəna

⁹ Mul shindətl ga təppə bulmən nə nal twasi.

¹⁰ mul usən təmpətl bulmən nəshindətl gawasi, ama təm pa'ti kənə buzhame.

¹¹ In cin a celga nə mattwasu, me nən kokənti, a buzhewas lwaki a mbuntwas

gəli. nəgu təmul usən gəli ge' dlom kə təleti nə palliti wasi.

Bəna na Cibəlti

¹² Albalka tən mul ngacci' cimbətl bi, inta ngash bi ge' cimbəltu, tən mbi' ul kəndə ga kə Gu kə mbidli, gunə mulban pəli mi' lyapti ndətu.

¹³ In ka mbi cimbil tu, bə' usu "Lya kən də cimbitl ki wai." Gaki Lya da cimbitl mulən nə bezən ləba wai, kən pəti a cimbələn Lya nə bezən wai;

¹⁴ Amma in mulən ambi gawas ge' cimbiltu lawaskən shelti, a tle gawasi.

¹⁵ Bezən lyap ləba in apəl tugu, nənzə' byas ləba. in byas ləba analu nən mbətl məshti.

¹⁶ Bəs gəl kini waica, mil yelsəni ini mudli nə mwani.

¹⁷ Mus mbuni bəlti ki njə'ni, sul lya kən də pe'ti, mul mbə'sum ma' Mulban kə cilti, gunə bə da shottwai u kənə gwasən mul sha'ti.

¹⁸ I' oli təp bələn min zəti tu'ma shilən ki bali, gaki tən dəmni kənə nyoh ki kina kə mus halitta wasi

Kub Shilən na pəlti

¹⁹ Mil yelsəni ini mudli nə mwani, manəngu: dleuwonkin də ga'ti kəm, bə dlewon kin də shilən ko də leutl mbadli wai,

²⁰ gaki leukə mbatl ki yakən mbalən da tala'ti də pətl kyautən ki zoki ki Lya wai.

²¹ Gaki nəgu, a' lakən mus kyautən ki bezən ləba takə nə ngyem mbiti ki mbalən,

shilən u nə dlilli ge' mbadlwakən u, ndə'ni nə nali ge' shindətl ga, gaki tinə ndətl kə pekkətl dliwakən.

²² Dəmni mi' petl shiləni, bəmi' kumti katlwai, aki shatl gawakən wai.

²³ gaki mus mulnə mul kup shiləni katlu, bə mul pəltiwai u, kənə mul nə də yak kinawas age' boka u ni.

²⁴ gaki tən yak kinawasi azzəga, aləbi aləbi am musni nə tetwası.

²⁵ Amma mus mul nə də ya' njikə'kə zhil ki mbi' ga u, inngash bi tənki u, tadəm mul kumtikatl ammus niwai, addəm mul pəlti nə botlti, gu səppəli' albalka age'ulnə ti pəlti u.

²⁶ In mulən də patl gawasi ti mul bətl Lya kən u, amma bə ta ngab biwaswai u, iki bətl Lya wasu bali wai.

²⁷ Bətl Lya ki zoki gunə bə bezən ulən da gibi wai u, akina də Lya bwasinən', iki kizi gulsi mudli, nə' milu nə bə mi' zəssi dawai u, dwaşən ge' bəna wasən u, a' pekkəl gawa'taka dəge' bezən ləba ki dəp ləba.

2

Matti tange' elsəni

¹ Yelsəni ini mudli nə mwani, mi' la'ti mbatl tən Yesu Almasihu mul nalti, bə' shimən otl elsəni ge' mbadlwakən wai.

² In mululkə shimi toh kə zinaliya nə lu'ləgəl kə zokki a mbə ge'lu dobga wakən u, i mul nə bə ulən niddawai u a tete' kə dlili nə keci lu'ləgəl.

³ In ka ngətlin nə natl mul la'ti zo' lu'ləgəl, i' ulən tisu, "Kundən kəngu kə zoki gawagi," Amma i' ulən mul nə bə ulən niddawai usu, "dlil tyaka" ko "kuma dəm atli a kina daka,"

⁴ Ase bə otl elsəni ge' dlomwa kən nə dambətl kə ngashti age' dlomwakən wai wa?

⁵ Kumini yelsəni ini mudli nə mwani: Ase, Lya wolən mi' ləshi ulən kə dəp ləba səddəm mi' usən ge' la'ti mbadlwaiya? si kə mi' mbi' gu' kə Lya nə pəl dləlti tən ginə də lyapti uwai ya?

⁶ Amma ki mbətl mi' gini bə ulən nisi dawai u. Ase, mi' usəni də mbitl kini waiwa? sidə dətl kini twakina də mi' pətl shilən waiwa?

⁷ Si də dləb shilən kə kabbi tən shin mul naltu nə də mbekkin nə nali uwai wa?

⁸ In ka shindələn ga tən kushti kə gu' kə Lya u gunə ge' shilən kə Lya kə laci u də ussu, "lyam else dəm twagi kənə gawagi," ka pəlin kə zokki i.

⁹ Amma in ka pələn lyab ga ge' dlomwakən u, ka pələn bezən ləba u ngu, tən kushti kə Musa ka dəmni mi' cel zhili.

¹⁰ Amma mus mul nə də katli' zhil kə Musa u, amma it cel gudəl nəmu, to mus ta cel zhili balu.

¹¹ To ti u nə' usu, "Bə pəl kontwai u" Ti usu dada nu, "Bə tlo mbalən wai." To, in kapəl kontwai u, amma i' tlo mbalən u, to, ka dəm mul cel zhili balu.

¹² Gaki nəgu, shilən wakən nə kyautən wakən tə dəm kə

mi' ginə nən pəlissi shilən kə zhil kə mbi' ga.

¹³ Amma gas pətl shilən Lya kən zə' gontwai ma' mulnə bə da zə' gontwai u. Amma zə' gonti nən də tle' ga kə zə' batlti.

La'ti mbadli Bə nə Kyautən kən wai u Use Kəni

¹⁴ Kini yelsəni ini, ya kə mbuntwasi tə yakən mbałən usu la'ti mbatl nidda, bə kyautən was dawai u? anya, la'ti mbadlwasu nən pekkətl ti wa?

¹⁵ Cibəlti, in yelsəni mudli ko mwani, si dəmti bə lulut nisi dawai u, hu anəmi bə ulkə dəmi da kəpsiwai.

¹⁶ In gon wakən a ulsisu, "To, mbəkəcən swaca, tə Lya bəlkin ulkə dəmi nə ulkə tle, nə ulkə laki" Bəka bələnsi ulənwai u, mbuntwas nuna?

¹⁷ Nəgu da la'ti mbadli nəm nə gwasi, bənə kyautən waswai u məcini.

¹⁸ Amma mulən nən ussu" ai, kibo la'ti mbatl ni' da, ami ne bo sai kyautən." To, mboki toh tən la'ti mbadlwagu, bə nə kyautən wai u, ami ne a mboki' toh tən kyautən, yenti kə dwadən kə la'ti mbadli.

¹⁹ Ka ndəgi Lya bo nəm kəma? A mbuni! to mi'gatl ma sa la'mbatl nəti i, amma hal si nepti kə dli nə banti.

²⁰ Ki mul ləshi ma' ulən! ko kəndə lyamti hal nəguni ki'mani la'ti mbadli bə nə kyautən kən wai u, use kəma?

²¹ Cin u nə bwasi nən Ablahim ta' yakuwas Ishiyaku tən lu kyetl ulnə də mbilli' Lya u, ashe gaki

kyautən waskən manti ti mul zo' mbatl kən waiya?

²² Ka yeni la'ti mbadlwas də lə' ne' kyautən wasi, kuma la'ti mbadwas a njikən tu' ma' kyautən wasi.

²³ I njikən shilən kə Lya nə usu, "Iblahim a la'mbatl nə Lya i, la'ti mbadlwasu i bildli mbatl kə zokini ma'ti," I mbekki yelən ki Lya.

²⁴ To ka yenini, Lya də pekkətl yakən mbałən gaki kyautən wasi, bə gaki la'ti mbadlwas nəmwai.

²⁵ Gaki nəgu Lahab mul pən ne' mwani mbi pe'ti gaki kyautən wa swaya? nən nje mi'shinkən i u, ippekkəlsi tu'tən shitu won.

²⁶ Kənə kan unə dli da bə lu shu'ti nidda wai u hwunini, nəguma la'ti mbadli bənə kyautən wai u hwunini.

3

ləga mul kon nə shilə

¹ Kini yelsəni ini, bə dəmni kumwakən mi'kulci' mbałən wai, gaki manti wakan kəni, mi mi'kulci' mbałən nən pəlimmi shilən nə bəna iye.

² Gaki musinən mini mi'lwestini dibəli, in yakən mbałən da dləb use ge' shilən wa swai u, to muli kə njə'ni tida, tən ma'ngapti mus kutlakən ki dli wasi.

³ Cibəlti ngu, in a shimi bəs ul kəndə bi u gaki tə' kumimi bi dəni, nənəgu mən ma'bəlti nəti mus lu u nəmi lyamti u.

⁴ Nə yanən kundələn kə mal, ko nə si bazi u ndətl kə yetəl də jakə'si, mus nənəgu nə yakən domkən mul dəlti

də gandətl ti mus lu u nə tin ngaki da u.

⁵ Nə gu ləga ma da, tigu yakən ulən kəni, sai bas la'tibi! yanən kan unə yakən masdi də lakik bal dəlgən utu u.

⁶ Ləga ma utu ca! Age' mus ku tlakən kə dli inən, ləga tikə gəskə bezən ləba ti kon nə mus dli, mul hotti mbadli atliti, tine libi kə utu də hottiti.

⁷ Yakən mbalən nən ma' tlegga kə mus ləba kə dəlgən nəkə ban, nəkə ge' mali nə yadli nə mi' dətl tugi.

⁸ Amma yakən mbalən kən ma' tlegga ki ləga wai, ngashti ni gunə bəkən ma' dlətl ti wai u, kə nji' ni da nə igən kə tloti.

⁹ Nə nali mi natl mul ban nə bwasi nən, nə nali mi byatlı mbalən ginə pəlsi ge' te' kə Lya u.

¹⁰ Nə bi nəm kən də natlti, nə byalti dadanu, yelsini ini, ai, gu a mbunwai!

¹¹ Ko shu mal nəm nən ma' bətl mal mul təmtə, nə mal mul kukkudu ya?

¹² Mil yelsini ini, pəkkə ka nəm ma' utti mil kə zaitu ya? ko pəkkə innabi nəm ma' zəm mil kə ka ya? Tu' nəgu shu mal mul bətl mal kə kukkudu kən bətl mal təmiwai.

manti kə bali

¹³ Mul manti nuna nə mul kal ləba laplap a ge' kini? An mbo' tohtənki tuma zo'dəm twasi, nə kyautən kə zoki gunə ti pəlti nə shindətl ga gunə də pe'ti ge' ma' ulən u.

¹⁴ Amma in bezən ngət mbalən nikin da nə lyap ga u age' mbadlwakən u, bə' pən

bulmən nə nə guwai, aki ngət baliwai.

¹⁵ Undi manti gu sul lya kən də ndassudwai kə dəp ləbani, kə lyap mbatl kəni kə shədən.

¹⁶ mus ge'lu unə ngət da nə lyap ga u, aləbi dlati nə mus bezən ləba ma da.

¹⁷ Amma manti kə sul lya u, kə kina kə zokini, mul shindətl ga kəni, mul natl kə ga kən wai, mul zo' mbadli, mul lyap dəb kə zoki, alhe-lini, mul zo' mbadli mul bi nəm, mul pətl bali, mul nə bə da wotl mbalən wai u.

¹⁸ Undi mutti kə mbadli gunə u mi' bwasti dlati də watlti u, i mbətl zo' mbadli.

4

Pətl Yelən nə dəp ləba

¹ Yakən də mbətl nge' elsəni nə dlati a ge' dlomwakən? ase, bə lyap ləba hukkən də latikin də dlan nə yelsəni ambadwakən wai ya?

² Kən lyap ləba a' hwolini, a'tlo mbalən. kən lyap ləba, bə kəkkən mbitini wai, a' tlilən dlati. Ki hwoltini gaki ki da shilən nə Lya wai kəni.

³ Kən shilənti nə Lya a' hwolini, gaki ki nə bezən mbatl kən ki pəlini, gaki ki konni nə nali tən kup təp kə gawakən.

⁴ Kini mi' ləshi zo' mbadli! Ki manini yelən nə dəp ləba ngel Lya kən waiya? gaki nəgu, mus mulnə də lyap pətl yelən nə dəp ləba u, ta pal gawas mul ngel lya u ngu.

⁵ Kin nə yentini tən swi kən shilən kə Lya usu, "Yal kə mbatl kə Lya gunə Lya shimi

ge' mini u nən də mbuttimi
iye ya?

⁶ Amma ti bətl min alheli
dibəli. I laki da shilən kə Lya
usu: "Lya də nge'mi'natl kə
ga, amma ti pəli'mi'shindətl
ga alheli."

⁷ Gaki nəgu takkən
gawakən ma'Lya, a'nge ləba
kə shedan, ti kuma tən kitəlli
'kini.

⁸ Sha'ni ma'Lya tima
tən sha'ti makini. Dəmnj
nə mbatl kə zokki, kini
mi'bezən mbadli, wokələn
mbadlwakən takə, kini
mi'mbatl lop.

⁹ Pələn du mbadli, kulni,
pələn lu. hwe tə getltwakən
pal kulu, hwol tuggwakən
təpal du mbadli.

¹⁰ Shindələn gawakən
ma'mulban, tima tən natl
kini.

Bə'zi yelse kapbi wai

¹¹ Kini mil yesəni ini,
bə'byalən yelsəni wai. Gaki
ko wokən byal yelse wasi
mul bəlti, ko mul nə a zi
yelse was kapbi u, ta byal
pətl shilən u balu, ta zi'kapbi
u ngu. In ka zi pətl shilən
kapbi u, ki mul bitl tiwai, ki
mul zitti kapbi ni.

¹² Mul bətl shilən nəm kəni,
tikə mul pətl ti, tikə mul
ndətl kə pekkəlti nə məcəlti.
to, kikə wongi ki'zi yelke
wa'kapbi?

Bə'pəl la'ti bi gaki kyau wai

¹³ Gakən kəm, kini u nə
də usu, "Asəti ko akyau mən
ləti ge'gatl gwa', an pəl hwon
tyaka, ami ulti nə ulti takə
am mbi ulpi."

¹⁴ I ngu kə manən ulnə
tə nda kyau uwai. Undə
dli ukən nikini? ai, kənə
wolkəndə da, aləm dəmtu nən
gəlti.

¹⁵ Mbun ni kə ulnisu, "In
Lya a ndəgu, in mi ge'mi'dli
u, mən pətl gu nə gu."

¹⁶ Amma i ngu, nəguni ki
la'tibi nə dun ngesi. Undə
la'tibi gu bezən ulən kənə.

¹⁷ Gaki nəgu, mus mulnə a
man zo'ləba u, in nge pəlti u,
ta pəl bezən ləba u ngu.

5

Dəli' mi' Usən Kəm

¹ To kumini kini mi' usən!
Kulni nə la'ti yali gaki bəna
u nətə mbətən kini u.

² Usən wakən mus bosini,
lu'ləgəllwakən mus shisshil a
dam i.

³ Zinaliya nə azulpa wakən
sa koni, kontwasən u nən
dəmti yenti kə dwadən tən
kini, kən dap tlu kə dli dəkini
kənə utu. Ka domi gawakən
usən i age' pa'ti kə ndalləba
i.

⁴ Yanini! upkə mi'kyautən
u nə' nge batl tisi u si kulu
ma'Lya. Kulu kə mi' otlikin
ləba takə a mbəkəci kəm də'
"Lya mul nalti i.

⁵ Ka pələn dəp ləba i ge'
təmti, ki dəamtı nə tleti nə
kon nə ləba. To, ka katlən
gawakən i gaki cin kə poshti.

⁶ Ka pocı mul zo'mbatl
batlti, kuma tloti, bə ta lwe
mbatl nə kini wai.

Ngashti bi age' Bəna

⁷ Gaki nəgu mil yelsəni,
ngacem bi, hal gas patl kə
mulban. Yanən kan unə mul
kotl lu də ngashti bi də butti

cin unə tə guwas bəl gwe kə zoki u. Nə ngashti bi iye ti butti mal kə otlti o nə mal kə gisi.

⁸ A'dəmni nə ngashti bi. A' dləllən mbadlwakən, gaki mbə' kə mulban bal nja i.

⁹ Yelsəni bə nalən ni tən yelsəni wai, gaki ba zikin batlti, i ngu mul pətl shilən baltən bidlabi i!

¹⁰ Tən cimbəlti nə ngashtibi ge' bəna, yelsəni, yanən mi'nje'shinkən ki Lya ma nəs shilən nə shin kə mulban u.

¹¹ I ngu, məndə ndwa'ti ginə ngashbi i, ka kumən un ndi ngashtibi unə Ayuba pəli u, ka yenən un ndi pa'ti bisi u nə "Lya kə njı'ni, nə kup ci' gonti, mul zə' gonti.

¹² Amma tən ko yan ngi, yelsəni, bə' lenceniwai, ko nə lya, ko nə atl, ko mus undi lenceti ukəni. Ənka ulnisu "E u," A dəm tən "E" katl, ən ka ulnisu "O' o", A dliltən "O' o" i katl, gaki in nəgu wai u nən zikin batlti.

¹³ Ən gon wakən də tle' bəna u, to, a' shilən nə "Lya, ən gon wakən də kup hwol tuga? To, a'ul wul kə dwati "Lya.

¹⁴ Ko gon wakən nən də gonti? To, am mbe kolsi kə İkilisiya bi as ngemi' "Lya, asi swatitti mil nə shin kə mul ban."

¹⁵ Ngep Lya ki la'ti mbadli, nən ndokətl mul gonti Lya nən tlilti lya, in ma tapəl bezən ləba u, nən pecitti.

¹⁶ Gaki nəgu, a'gopən dlimi' yelsəni bezən ləba wakən, a ki ngemi yelkəni Lya, gaki ki' mbi do'ti da. Shilən nə Lya kə mul zo'mbadli kyautənwəs ndəlni iye.

¹⁷ Iliya yakən mbalən kəni kənə mini, amma nə' gob ngep Lya u gaki bə mal mbəwai u, sai nəpəl hwon maki nə li məkka bə mal a mbə ge' atlowi.

¹⁸ Kal ki nəgu nən ngem Lya dadənu u, i mal mbə sul lya, atl ne ibbəl gwei ləba wasi.

¹⁹ Yelsəni ini, in gon wakən a za'shitu kə Lya u, a gon wakən palti te'tən shitu.

²⁰ Am maninca mus mulnə a pal mul pətl bezən ləba te'tən shitu u ta pekkəl mul bezən ləba i dəge' məshti, gu nən dəmti shitu kə peshti lipən dibəli.